



KEMENTERIAN PENDIDIKAN
MALAYSIA



UNICEF

BUDAYA, PANTANG LARANG DAN AMALAN KESIHATAN ORANG ASLI SEMENANJUNG MALAYSIA



PUSAT PERKEMBANGAN KURIKULUM
KEMENTERIAN PENDIDIKAN MALAYSIA
dengan kerjasama
UNITED NATIONS CHILDREN'S FUND
(UNICEF)

DISEMBER 1998

Cetakan Pertama 1998

© KEMENTERIAN PENDIDIKAN MALAYSIA

Hak Cipta Terpelihara. Mana-mana bahan dalam buku ini, tidak dibenarkan diterbitkan semula, disimpan dalam cara yang boleh dipergunakan lagi, ataupun dipindahkan dalam sebarang bentuk atau cara, baik elektronik, mekanik, penggambaran semula mahupun dengan cara perakaman, tanpa kebenaran terlebih dahulu daripada Ketua Pengarah Pendidikan Malaysia, Paras 7, Blok J, Pusat Bandar Damansara, 50604 Kuala Lumpur

Perpustakaan Negara Malaysia Data Pengkatalogan-dalam-Penerbitan

Budaya, Pantang Larang dan Amalan Kesihatan Orang Asli Semenanjung Malaysia.

ISBN 983-9229-60-5

I. Indigenous people—Semenanjung Malaysia—Social life and customs. I. Malaysia. Pusat Perkembangan Kurikulum.

II. United Nations Children's Fund.

306.089992305951

306.089992305951
L115
f ✓

Dicetak oleh

Percetakan Haji Jantan Sdn. Bhd.
No. 12 Jalan 4/118C, Desa Tun Razak,
Cheras, 56000 Kuala Lumpur.
Tel: 03-9731997, 9732004
Fax: 603-9731835

APB 982763
SASAKAN PEMERINTAHAN
PERPUSTAKAAN NEGARA MALAYSIA

06 JUL 2000

KANDUNGAN

BAB	TAJUK	MUKA SURAT
	Prakata	i
	Pendahuluan	ii
	Summary	iii
	Senarai Jawatankuasa Penggubal Buku Budaya, Pantang Larang dan Amalan Kesihatan Orang Asli	v
	Penghargaan	vi
	Sejarah Kedatangan Orang Asli Ke Tanah Melayu	1
	Taburan Penduduk Orang Asli Mengikut Suku Bangsa	3
1	Suku Kaum Jakun	5
2	Suku Kaum Temuan	15
3	Suku Kaum Jahut	27
4	Suku Kaum Temiar	35
5	Suku Kaum Mah Meri	43
6	Suku Kaum Seleter	51
7	Suku Kaum Semai	61
8	Suku Kaum Semelai	91
9	Suku Kaum Orang Laut	109
10	Suku Kaum Orang Jahai	113


PRAKATA

Bersyukur kepada Allah s.w.t. dengan izinNya, satu buku panduan tentang budaya, pantang larang dan amalan kesihatan Orang Asli di Semenanjung Malaysia telah dapat disediakan.

Buku panduan ini diharap dapat dijadikan sebagai bahan rujukan, khusus dalam penyediaan kurikulum bagi program khas sekolah Orang Asli dan juga dalam penyediaan guru peringkat tertentu program tersebut. Ia selaras dengan salah satu Sasaran Kerja Utama (SKU) Kementerian Pendidikan pada tahun 2000 di mana sekolah JHEOA yang diambilalih akan disediakan dengan guru-guru terlatih mengikut keperluan.

Pusat Perkembangan Kurikulum (PPK) telah mengambil inisiatif menyediakan buku panduan ini pada tahun 1997. Usaha-usaha menyediakan buku panduan tersebut telah dibuat dengan bantuan kewangan daripada pihak United Nations Children's Fund (UNICEF) melalui Bahagian Perancangan & Penyelidikan Dasar Pendidikan (BPPDP), Kementerian Pendidikan Malaysia dalam urusan percetakan.

Bagi pihak Pusat Perkembangan Kurikulum, saya ingin merakamkan setinggi-tinggi penghargaan dan terima kasih kepada semua pihak yang telah memberi kerjasama menghasilkan buku panduan ini.



(DR. NOOR AZMI BIN IBRAHIM)

Pengarah
Pusat Perkembangan Kurikulum
Kementerian Pendidikan Malaysia

Kuala Lumpur
1 Disember 1998.

PENDAHULUAN

Salah satu Sasaran Kerja Utama (SKU) Kementerian Pendidikan tahun 2000 ialah semua sekolah JHEOA yang diambilalih akan disediakan dengan guru-guru terlatih mengikut keperluan. Bagi mencapai SKU tersebut, beberapa langkah telah dikenalpasti. Antaranya ialah memastikan guru-guru bersedia mengajar di sekolah Orang Asli. Seiringan dengan usaha tersebut guru-guru seharusnya dibekalkan dengan panduan dan pengetahuan tentang latar belakang kaum Orang Asli.

Pada tahun 1995, satu kajian tentang budaya, pantang larang dan amalan kesihatan Orang Asli telah dijalankan, diikuti dengan beberapa siri bengkel menulis buku panduan. Bengkel-bengkel tersebut yang telah disertai oleh pelbagai suku bangsa Orang Asli di Malaysia dengan kerjasama Jabatan Hal Ehwal Orang Asli (JHEOA) telah diadakan di Ipoh, Melaka dan Kuantan. Pusat Perkembangan Kurikulum (PPK) telah mengendalikan dan menyelaraskan bengkel-bengkel tersebut dengan peruntukan Pusat itu sendiri.

Buku panduan ini mengandungi 10 bab yang menerangkan tentang sosio budaya, kepercayaan, pantang larang, adat resam, dan amalan kesihatan 10 suku bangsa Orang Asli di Semenanjung Malaysia. Suku bangsa tersebut terdiri daripada Jakun, Temuan, Jahut, Temiar, Mah Meri, Orang Seletar, Semai, Semelai, Orang Laut, dan Jahai.

Setiap suku bangsa mempunyai latar belakang, kepercayaan, adat resam, budaya dan amalan kesihatan yang berbeza. Namun demikian, kebanyakan suku bangsa ini berkefahaman 'animisme', iaitu mempunyai kepercayaan kuat kepada kuasa-kuasa 'ghaib' dan makhluk 'halus' yang berbentuk binatang.

SUMMARY

CUSTOMS, SUPERSTITIONS AND HEALTH PRACTICES OF THE ORANG ASLI OF PENINSULAR MALAYSIA

This guidebook on Customs, Superstitions and Health Practices of the Orang Asli has been specifically prepared for teachers who will be teaching in Orang Asli schools. This document aims to provide information on the lifestyle and customs of the Orang Asli community. It also provides information for individuals who wish to know more about the common sub-groups of the Orang Asli in Peninsular Malaysia.

This book comprises ten chapters that explore the socio-cultural beliefs, superstitions, customs and health practices of 10 sub-groups of the Orang Asli in Peninsular Malaysia.

Each sub-group practises its own set of beliefs, customs, cultural and health practices that are different from each other. Many of these sub-groups believe in animism and hold strong beliefs in the powers of the supernatural.

History has shown that the Orang Asli of Peninsular Malaysia originated from the neighbouring countries of Cambodia, Indo-China, Burma and Sumatra. The Orang Asli represent an earlier group of people of Malay origin who had come to Peninsular Malaya before 1304 and so have many similarities in their physical customs to the Malays.

The first wave of the Orang Asli to Malaya were from Indo-China and they now live in the northern part of Malaya. The second wave was from Palembang, Sumatra and most of this group settled in the southern part of Malaya.

The three main groups of Orang Asli are Negritos, Senoi and Proto-Malays. These are subdivided into 18 smaller groups traditionally live in small groups of 10-50 families. Almost thirty per cent of the Orang Asli live in the interior and the rest are found near Malay villages, along the banks of rivers in Selangor, Johor and Pahang or near the forests of the Titiwangsa range of mountains.

This book is about 10 of these groups of Orang Asli.

The Jakun are Proto Malays that stay in the southern part of the peninsular. They originate from Yunan in South China and emigrated to Peninsular Malaya about five thousand years ago. They still practise animism and their lives are influenced by their environment.

The Temuan are Proto-Malays found in Selangor, Melaka, Pahang, Johore and Negeri Sembilan. In Negeri Sembilan, they practise the local 'adat perpatih' custom.

Jahut are found in Temerloh and Jerantut in Pahang. Their livelihood is from , fishing, hunting, farming and collecting rattan and damar for sale. Temiar stay away from large pools

of water or swamps due to their beliefs in water spirits. They often begin by living in longhouses after which, families break off to live on their own.

Many Mah Meri were fishermen because they live near the sea. They are believed to have emigrated from the southern islands of Johor. In trying to escape their enemies, they moved to the coastal areas near Selangor. They are animists who are undergoing change in their way of thinking and their development. Their culture is individualistic and they believe a lot in spirits.

The nomadic Seletar are Sea Gypsies living along the coastline and estuarine areas in southern Johore and northern Singapore. Their animistic traditions are tied to the products of the sea although some of the Seletar have converted to Islam.

The Semai live in communal groups of 60-300 inhabitants. They also form the largest group of Orang Asli in Malaysia.

The Semelai are Proto-Malays mainly found in central Pahang and the border between Pahang and Negeri Sembilan.

The Orang Laut live near the sea and are humble folk. They have a strong belief in supernatural forces and water spirits.

The Jahai live near river mouths and by the lakes. These are nomadic Negritos which form the smallest group of Orang Asli compared to the Senoi and the Proto-Malays. They are dark-skinned and have crinkly hair, round eyes and flat noses.

This guide book thoroughly explains many of the customs and practices, as well as the cultural superstitions of these various sub-groups of Orang Asli. The aspects of appointing the Headman, weddings, births and deaths and many festivals and superstitions and customs regarding simple activities of daily life like visiting people, medicinal practices and etiquette are elaborated in this book.

It is hoped that this book will serve as a useful guide to teachers who will be teaching in schools for Orang Asli children and provide interesting and informative reading for it has been a dedicated effort by many people, including representatives of the Orang Asli themselves who have come together to produce this invaluable document. It is hoped that not only will this document assist teachers in their interaction with these pupils but also in the preparation of teaching-learning materials.

Senarai Jawatankuasa Penggubal Buku Budaya, Pantang Larang Dan Amalan Kesihatan Orang Asli.

1. Win Bin Mat - JHEOA
2. Saidon Bin Suratman - Sek. Keb. Pengkalan Tereh, Johor.
3. Azizan a/l Mokhtar - Sek. Keb. Sg. Mok. Rompin. Pahang.
4. Sulaiman Bin Puteh - Sek. Keb. Senderut. Kuala Lipis. Pahang.
5. Ayub Bin Ekal - Sek. Keb. Kg. Putra. Negeri Sembilan.
6. Judin Bin Hek - Sek. Keb. Iskandar. Pahang.
7. Hodin a/l Biau - Sek. Keb. Bukit Gemuruh. Pahang
8. Jogan a/l Salam - Sek. Keb. Lanai. Pahang.
9. Roslan Bin Renjis @Abdullah - Sek. Keb. JHEOA. Kuala Lipis. Pahang.
10. Bah Katik a/l Raja Kecut - JHEOA. Kuala Lipis. Pahang.
11. Syed Ami Bin Abdullah - JHEOA . Kuala Lumpur.
12. Mustafa Bin Mat - JPN. Pahang.
13. Tuan Hj. Wahab Bin Juan - Sek. Keb. Bukit Gemuruh. Pahang.
14. Razali Bin Basiron - Sek. Keb. Tonggang. Perak.
15. Mohd. Rahaimi Bin Nasir - Sek. Keb. Tonggang. Perak.
16. Muslim Bin Napiah - Sek. Keb. Jermang. Perak.
17. Abu Hurairah Bin Abd. Samad - Sek. Keb. Sg. Tiang. Perak.
18. Anjang Sandang a/l Itam - Sek. Keb. Tenau. Perak.
19. Aslan Bin Mat - Sek. Keb. Musuh. Perak.
20. Kaharudin Bin Lian - Sek. Keb. Denai. Rompin. Pahang.

Penghargaan

Pusat Perkembangan Kurikulum (PPK), Kementerian Pendidikan Malaysia, ingin merakamkan setinggi-tinggi penghargaan kepada semua pihak yang telah memberi kerjasama dan cadangan membina dalam menyiapkan buku Budaya, Pantang Larang dan Amalan Kesihatan Orang Asli.

Ucapan penghargaan dan terima kasih kepada UNICEF di atas sumbangan kewangan dan Bahagian Perancangan & Penyelidikan Dasar Pendidikan, Kementerian Pendidikan (BPPDP) di atas kerjasama untuk menjayakan program ini.

Ucapan terima kasih khusus ditujukan kepada Jabatan Hal Ehwal Orang Asli (JHEOA) dan guru-guru suku bangsa Orang Asli yang sama ada telah memberi ulasan secara bertulis atau menyertai perbincangan dalam bengkel-bengkel yang di adakan.

Ribuan terima kasih juga disampaikan kepada Tuan Haji Shamsuddin bin Ahmad selaku ketua editor serta editor En. Win bin Mat, En. Idris bin Abd. Kadir, Puan Ropitah bt. Abd. Hassan dan En. Arifin bin Zainal Abidin, yang telah bertungkus-lumus bersama-sama menyemak, mengulas, membincangkan dan menaip semula bahan tersebut.

Akhir sekali tidak ketinggalan diucapkan terima kasih kepada individu-individu yang telah sedikit sebanyak memberi input, bantuan dan sokongan dalam menjayakan penghasilan buku ini.

Pusat Perkembangan Kurikulum
Kementerian Pendidikan Malaysia
1998

ORANG ASLI SEMENANJUNG MALAYSIA

LATAR BELAKANG

Sejarah telah membuktikan bahawa Orang Asli sebenarnya berasal dari negara jiran seperti Champa, Indo China, Burma dan Sumatera. Walaupun mereka serumpun dengan orang Melayu dan terdapat banyak persamaan dari segi fizikal adat, tetapi mereka merupakan suku kaum yang terdahulu datang ke Tanah Melayu sebelum tahun 1304.

Kumpulan Orang Asli yang mula berhijrah ke Tanah Melayu dipercayai berasal dari Indo China, kini menetap di bahagian Utara Tanah Melayu. Mereka mempunyai persamaan dari segi pertuturan, paras rupa dan cara hidup dengan salah satu daripada 200 lebih etnik yang terdapat di Myanmar dan Selatan Thailand. Contohnya daripada segi bahasa yang digunakan oleh Orang Asli seperti "manuk" (ayam), "kak" (ikan) dan "cuok" (anjing) sama seperti yang dituturkan oleh kaum etnik Myanmar.

Kedatangan kumpulan kedua pula, dipercayai berasal dari kawasan Palembang, Sumatera. Orang Asli kumpulan kedua ini kebanyakannya tinggal di bahagian Selatan Tanah Melayu. Paras rupa dan budaya hidup mereka ada persamaannya dengan orang Melayu dan Orang Asli di sebelah selatan pada masa kini. Sebagai contoh hampir 70% bahasa orang Asli suku bangsa Jakun menggunakan Bahasa Melayu. Begitu juga dari segi penggunaan nama gelaran seperti Panjang, Kuntum, Melati, Along, Angah, Alang, Andak, Uda, Itam, Ateh dan Busu turut digunakan oleh Orang Asli.

Walaupun bagaimanapun Tamadun Islam di Sumatra sedikit sebanyak telah mempengaruhi budaya kumpulan kedua. Justeru itu, ada di antara mereka, termasuk suku bangsa Semelai, sehingga kini, masih mengamalkan adat istiadat berkhatan untuk anak laki-laki. Malahan bagi suku bangsa Jakun, Temuan, Semelai dan Semai, sudah menjadi kebiasaan mereka dalam setiap upacara jampi serapah dimulakan dengan bacaan "Bismillah" dan diakhiri dengan berselawat.

Kedatangan Orang Melayu ke Semenanjung disambut baik oleh Orang Asli pada ketika itu. Mereka bersama-sama hidup dengan harmoni di pinggir sungai. Hubungan rapat kedua kaum ini terjalin dari peringkat bawah hingga ke pembesar-pembesar dan raja-raja Melayu. Ikatan persaudaraan ini terbukti dalam satu pakatan bersama menentang campur tangan British dalam urusan kehidupan Orang Melayu. Akibatnya J.W.W. Birch mati dibunuh oleh orang suruhan Datok Maharaja Lela, Puntum bin Pandak, dari Suku Bangsa Semai. Pada masa itu perlantikan ketua Orang Asli dimasyhorkan oleh raja-raja Melayu dengan penganugerahan berbagai-bagai gelaran seperti "Datok Singa Merojan" dan "Datuk Singa Merban".

Malangnya hubungan yang begitu erat akhirnya menjadi renggang setelah kedatangan pendatang dari Sumatera ke Tanah Melayu. Mereka ini lebih maju dari Orang Melayu. Namun

begitu kehadiran pendatang ini tidak disenangi Orang Asli kerana ramai di antara Orang Asli telah diperalatkan dan dijadikan hamba dan orang suruhan. Ianya telah menimbulkan kemarahan di kalangan Orang Asli sehingga teretusnya "*Perang Sangkel*" yang akhirnya menyebabkan Orang Asli lari jauh membawa diri dan terus tinggal menetap di pedalaman hinggalah ke hari ini.

Seperti Orang Melayu, Orang Asli juga termasuk dalam golongan bumiputera. Hak dan keistimewaan mereka termaktub dalam Perlembagaan Persekutuan di bawah Akta 134 (Akta Orang Asli).

TABURAN PENDUDUK ORANG ASLI

Orang Asli terbahagi kepada tiga suku kaum iaitu Negrito, Senoi dan Melayu Asli yang terbahagi kepada 18 suku bangsa berjumlah 92,523 orang (lihat Jadual 1 perangkaan JHEOA 1995). Hampir 30% daripada Orang Asli tinggal di pedalaman dan yang selebihnya tinggal menetap berjiranan dengan kampung-kampung Melayu atau tinggal berkampung di sepanjang persisiran pantai Selangor Darul Ehsan, Johor, dan Pahang. Mereka juga tinggal di kawasan hutan Banjaran Titiwangsa dan kawasan-kawasan lain di seluruh Semenanjung (lihat Jadual II).

Kebanyakan daripada mereka tinggal di hutan belantara dan di tanah-tanah tinggi di antara 2,000 hingga 6,000 kaki dari paras laut, terdapat 40% daripada mereka tinggal di tanah-tanah rendah dan di persisiran pantai.

Secara tradisi, Orang Asli hidup dalam kumpulan-kumpulan kecil yang terdiri dari 10 hingga 50 kelinan. Walaupun ada sebahagian daripada mereka yang masih hidup secara berpindah-randah, tetapi 80 % hingga 90% sudah pun menetap di kampung-kampung seperti orang Melayu.

**TABURAN PENDUDUK ORANG ASLI MENGIKUT
SUKU KAUM DAN SUKU BANGSA**

SUKU KAUM	RUMPUN BANGSA	BILANGAN	TABURAN PENDUDUK
SENOI	Semai -	26,070	Selatan Perak/Barat Pahang
	Temiar	15,200	Utara Perak Selatan Kelantan
	Jahut -	3,193	Pahang Tengah
	Semoq Beri	2,469	Pahang Tengah
	Mah Meri -	2,181	Pantai Selangor
	Che Wong	321	Pahang Tengah/Terengganu
	Jumlah Kecil	49,434	
MELAYU ASLI (Proto Malay)	Temuan	16,070	Selangor/Negeri Sembilan
	Semelai -	4,055	Pahang Tengah/Negeri Sembilan
	Jakun -	16,637	Pantai Pahang
			Rompin/Pekan/Johor Utara
	Orang Kanak	62	
	Orang Kuala -	2,492	Kota Tinggi, Johor
Orang Seletar	801	Pantai Johor	
	Jumlah Kecil	40,117	
NEGRITO	Kensiu	416	Timur Laut Kedah
	Kintak	286	Utara Perak
	Jahai -	1,005	Timur Laut Perak / Barat
	Lanoh	313	Kelantan
	Mendriq	138	Kelantan, Terengganu
	Bateq	814	Timur Laut Pahang / Kelantan
	Jumlah Kecil	2,972	Utara Perak / Terengganu
	JUMLAH BESAR	92,523	

Statistik 1995 JHEOA

PETA PERTABURAN PENDUDUK
ORANG ASLI MENGIKUT SUKU BANGSA



SUKU	KAUM		
	NEGRITOS	SENOI	PROTO-MALAYS
B A N G S A	KENSU	TEMIAR	TEMUAN
	KINTAK	SEMAI	SEMELAJ
	LANOH	SEMOQ BERI	JAKUN
	JAHAI	CHE WONG	ORANG KANAQ
	MENDRIQ	JAHUT	ORANG KUALA
	BATEQ	MAHMERI	ORANG SELETAR

Bab 1

SUKU BANGSA
JAKUN



(Seorang gadis dari suku bangsa Jakun)

JAKUN

1. PENGENALAN

Bangsa Jakun (Orang Ulu), daripada suku kaum Melayu Asli (Melayu Proto) yang tinggal di selatan Semenanjung, berasal dari Yunan (Selatan Cina) dan mula berhijrah ke Semenanjung, berasal dari Yunan (Selatan Cina) dan mula berhijrah ke Semenanjung Tanah Melayu kira-kira 5000 tahun yang lalu.

Mereka masih mengamalkan animisme. Kehidupan mereka dipengaruhi oleh alam sekitar seperti gunung, bukit, lembah, sungai, batu, gua, dan sebagainya. Mereka percaya kampung mereka akan dilanda bencana sekiranya ada di antara mereka yang melanggar pantang larang.

2. SOSIO BUDAYA

2.1 Perlantikan Penghulu

Setiap kampung diketuai oleh seorang ketua yang dipanggil "*Batin*". Batin berkuasa penuh di atas segala hal ehwal kampung. Dia juga bertindak dan bertanggung jawab dalam urusan nikah kahwin, sebagai ketua adat, dan pentadbiran kampung. Biasanya Batin akan dibantu oleh beberapa orang seperti Mangku, Jukrah, dan Setia dalam urusan mentadbir kampung. Semasa ketiadaan Batin di kampung, tugasnya akan dipangku oleh Mangku.

2.2 Majlis Perkahwinan

Majlis ini merupakan satu majlis bersukaria. Mereka tidak menjemput tetamu secara rasmi ke majlis perkahwinan tersebut. Penduduk kampung lazimnya hadir tanpa dijemput. Kebiasaannya pengantin akan menjalani istiadat mendengar nasihat yang berkaitan dengan rumah tangga. Sesiapa sahaja boleh memberi nasihat, walaupun pada kebiasaannya ada golongan tua. Ianya memakan masa yang panjang hingga beberapa hari.

2.3 Kelahiran Anak

Sisामी atau jiran akan menghebahkan berita kepada jiran yang berhampiran apabila sudah sampai masanya siisteri akan bersalin. Pada ketika ini kaum wanita akan datang menolong sehingga bayi dilahirkan.

Sudah menjadi adat dan kepercayaan bagi masyarakat Orang Ulu di mana suami terpaksa turut sama berpantang semasa isterinya mengandung. Suami dilarang memakan atau menyentuh benda-benda yang menyerupai dan mempunyai bentuk

dan sifat seperti haiwan dan menjala ikan kerana ia dipercayai boleh mendatangkan kesusahan kepada siibu semasa hendak melahirkan anak dan membawa akibat yang buruk kepada bayi yang dilahirkan nanti. Suami dan isteri juga tidak dibenarkan memakan daging rusa dan kijang. Pelawat dilarang memuji kecantikan bayi tersebut.

2.4 Kematian

Apabila berlaku kematian di sesebuah kampung aktiviti harian seperti berladang, memburu dan sebagainya akan diberhentikan serta merta. Mengikut kepercayaan mereka sesiapa yang meneruskan pekerjaannya, setelah mengetahui adanya kematian, ianya akan ditimpa malapetaka atau pun jatuh sakit.

Lazimnya pada hari kematian, telinga kanak-kanak diconteng dengan kapur sirih atau arang yang telah dijampi. Selama tujuh hari berturut-turut, arang akan disapu dikening, dada dan tapak kaki pada waktu malam sebagai pendinging untuk mengelakkan gangguan hantu dan syaitan yang telah membunuh simati.

Pada hari kedua, setelah mayat selamat dikebumikan, keluarga simati akan menghantar makanan serta memasang api di tepi kubur itu. Di bawah rumah simati pula dipasang unggun api. Pasir halus yang telah dijampi akan ditabur di sekeliling halaman dan dinding rumah supaya terkena mata hantu-hantu yang masih ada lagi di kawasan rumah tersebut. Kesemua amalan ini dilakukan selama enam hari.

Tetamu atau pelawat tidak dibenarkan mengambil semula sebarang makanan atau rokok semasa yang terjatuh ke tanah kerana dipercayai hantu mayat akan menuntut barang tersebut. Denda "*Bangun Nyawa*" akan dikenakan kepada mereka yang melanggar larangan tersebut mengikut kadar yang ditentukan oleh batin atau pawang yang menguruskan pengebumian tersebut.

Mereka tidak boleh bersukaria (menyanyi, bersiul, bersorak-sorak, menjerit) dan berpakaian cantik semasa dalam tempoh berkabung untuk menghormati simati dan rohnya.

Barang-barang kepunyaan simati seperti pakaian, alat memburu, memancing dan sebagainya tidak boleh digunakan oleh orang lain. Harta pesaka peninggalan dibahagi-bahagi kepada kaum keluarganya.

Alat-alat yang digunakan dalam upacara pengebumian seperti cangkul, parang dan sebagainya tidak boleh dibawa naik terus ke rumah. Barang-barang tersebut hendaklah direndam dalam air selama satu malam sebelum dibawa naik.

Orang yang terlibat dalam aktiviti pengebumian hendaklah mandi terlebih dahulu sebelum naik ke rumah. Pakaian yang dipakai semasa menziarahi kematian juga tidak boleh dibawa naik ke rumah sebelum dibasuh.

3. KEPERCAYAAN

Suku Bangsa Jakun di Negeri Johor percaya wujudnya dua tuhan (Tuhan Atas dan Tuhan Bawah), dewata, keramat dan roh-roh penting dalam kehidupan mereka. Tuhan Bawah, suami kepada Tuhan Atas, menjaga bumi sementara Tuhan Atas pula, sebagai isteri, memayungi bumi atau Tuhan Bumi. Mereka mempunyai pegangan *Ruyub* dan *Raib* (kitab suci masyarakat Jakun dalam bentuk lisan) yang diwaris dalam bentuk lisan.

3.1 Hari Perayaan

Perayaan ini akan diadakan pada setiap tahun. Kebiasaannya diadakan semasa cuti Tahun Baru Cina. Ini disebabkan pada hari tersebut semua penduduk ada di kampung dan mendapat cuti sempena Tahun Baru Cina tersebut. Tujuan mengadakan perayaan ini ialah memuja dan menjauhkan dari segala bencana untuk kampung dan semua penduduk kampung tersebut. Perayaan ini juga ditetapkan dan didahului oleh seorang Tok Pawang atau bomoh kampung.

Pada ketika ini, kunjung-mengunjung tidak digalakkan, malahan tidak dibenarkan langsung. Orang luar tidak dibenarkan masuk ke kampung yang sedang menjalankan istiadat ini. Ini dipercayai disebabkan takut kalau-kalau hantu-hantu jahat mengikut masuk bersama mereka tersebut.

Tok Pawang akan mendahului upacara dengan mengadakan satu tempat khas bagi memuja dan menghalau segala syaitan di mana kawasan dipasangkan sangkak dan menyediakan satu tempat makan bagi "sajian" hantu dan syaitan yang dipanggil untuk bersama-sama makan. Perkara ini hanya diketahui oleh Tok Pawang sahaja. Pada saat ini Tok Pawang dan pengiringnya memuja dan mengelilingi sangkak yang telah disediakan dengan penuh adat istiadat dan kepercayaannya.

Penduduk lain yang diketuai oleh Ketua kampung atau Batin akan menyediakan makanan yang agak luar biasa dari hari kebiasaannya. Juadah tersebut seperti lemang, kuih-muih dan lauk yang lazat seperti ayam, daging dan bermacam-macam lagi.

Selama tiga hari, orang kampung dilarang:

- Mencangkul tanah atau membajak
- Mandi secara riuh rendah
- Memetik segala daun-daun yang hidup seperti pucuk ubi.
- Mengupas batang pisang atau kulit kayu yang menyerupai cahaya putih.
- Membenarkan orang-orang kampung lain masuk ke kampung yang telah "*dibela*" (pagar).

3.2 Berjerom

Orang Jakun masih percaya kepada hantu, keramat, dewa-dewa dan adat istiadat mengubat pesakit secara berjampi masih diamalkan lagi. Semangat puaka yang berkaitan dengan Tuhan Atas dan Tuhan Bawah masih tebal dalam ingatan mereka.

Upacara berjerom akan diadakan di tempat-tempat berpuaka seperti batu besar, gua batu, lubuk sungai, pokok-pokok seperti pokok sena, pokok beringin, ara, merbau dan meranti. Oleh itu sekiranya orang luar yang tidak mengetahui tempat-tempat ini telah diberjerom tidak dibenarkan sama sekali mengusik barangan yang telah diletakkan ditempat-tempat tersebut.

Pada hari itu mereka akan menurunkan segala ilmu tangkal jampi serta kepandaian bomoh kepada individu yang telah dipilih. Semua penduduk kampung akan berkumpul dalam upacara tersebut di mana sebelah malamnya bomoh-bomoh akan menurunkan segala tangkal jampi kepada bakal bomoh yang baru.

4. PANTANG LARANG

4.1 Ladang Baru

- (a) Tiada siapa pun dibenarkan mencabut atau mengubah kayu-kayu yang ditanam atau dijadikan sebagai sempadan di antara satu ladang dengan ladang lain. Jika tidak seseorang itu akan jatuh sakit atau terkena pawang yang akan menyebabkan segala tanaman di situ tidak menjadi dan dimusnahkan oleh musuh tanaman.
- (b) Sangkak yang ditanam dalam kawasan ladang sangat penting untuk pemujaan hantu dan syaitan supaya menjaga segala tanaman serta membawa hasil yang lumayan kepada ladang tersebut.
- (c) Dilarang seseorang itu mengambil buah-buahan di dalam ladang yang baru sebelum pawang memulakannya terlebih dahulu atau membuka pantang.

4.2 Makanan

Adalah kurang sopan bagi tetamu menolak jamuan atau minuman yang diberi oleh tuan rumah. Masyarakat Orang Asli suku bangsa Jakun sangat suka sekiranya tetamu sudi menjamah atau menikmati jamuan yang diberi untuk mengeratkan lagi perhubungan silaturahmi di antara tetamu dengan tuan rumah. Tetamu dianggap kurang sopan dan tidak menghormati tuan rumah sekiranya tidak menjamah makanan yang disediakan.

Sebelum meninggalkan rumah, tetamu biasanya akan meninggalkan pesanan yang baik dan tuan rumah akan membalas dengan ucapan selamat dan berharap tetamu akan datang lagi pada musim buah-buahan atau menuai.

Selain itu beberapa pantang larang berikut perlu dipatuhi:

- (a) Kebanyakan jenis binatang yang hidup di darat tidak boleh dimasak atau dimakan bersama-sama dengan hidupan/binatang dalam air. Umpamanya ikan dengan daging lembu tidak boleh dimakan bersama. Jika tidak ia akan jatuh sakit seperti demam kuning, keguguran rambut, batuk darah, sakit paru-paru, serta kudis dalam kulit yang kebiasaannya terdapat disekeliling pinggang.
- (b) Dilarang membuang sisa makanan dimerata tempat yang mungkin dimakan oleh semut atau binatang atau pun dihanyutkan oleh air. Oleh sebab itu sisa makanan hendaklah dikumpulkan untuk ditanam atau dibakar atau sipembuang akan dapat busung.
- (c) Air-air yang bertakung di dalam tin dan botol atau pun di batang-batang kayu tidak boleh dilangkah atau didekati kerana seseorang boleh mendapat sakit busung.
- (d) Dilarang memakan buah-buahan yang pokoknya tumbuh di bawah kayu teras atau yang berapit serta dahan atau batangnya bertakung air kerana dikhuatiri akan mendapat sakit.
- (e) Mengeji dan mengata kepada benda-benda makanan akibatnya boleh mendatangkan sakit cirit dan kembung perut yang berpanjangan.
- (f) Kanak-kanak dilarang memakan daging seperti rusa, kijang dan burung helang. Di setengah-setengah tempat pula ada yang melarang anak mereka memakan telur ayam. Akibatnya mereka ini akan mendapat sawan. Telor ayam biasanya menyebabkan kanak-kanak sakit dan selalu menagis.

4.3 Pantang larang dalam rumah

- (a) Jatuh di rumah yang sedang dibina.

Adalah kurang baik jika seorang itu terjatuh di rumah yang sedang dalam pembinaan. Akibatnya mendatangkan sial atau kurang sihat kepada penghuni yang mendiami ruang tersebut.

- (b) Tidur tidak cukup tiga hari di rumah baru siap.

Jika seseorang itu bermalam di rumah baru siap seeloknya bermalam sehingga tiga malam berturut-turut. Jika kurang daripada itu ia akan mendatangkan perkara yang tidak baik kepada tuan rumah.

- (c) Rumah baru dijampi dan direnjis dengan tepong penawar.

Tiap-tiap rumah baru mestilah diadakan kenduri atau direnjis dengan tepong tawar. Akibat dengan tidak melakukan boleh mendatangkan sial kepada pencarian nafkah penghuni rumah tersebut.

Rajah campuran makanan yang boleh atau tidak boleh dimakan

1	2	3	4	5	6	7	8	9	10	11	12
	A	Ikan	Telur	Kerbau	Rusa	Babi	Ular	Kunyit	Landak	Kulat	Ikan Pari
1	Ikan	#	x	x	x	x	x	#	x	x	#
2	Telur	x	#	x	x	x	TP	#	x	x	*
3	Kerbau	x	x		x	x	TP	#	x	x	*
4	Rusa	x	x	x	#	x	TP	#	x	x	x
5	Babi	x	x	x	x	#	TP	x	x	x	x
6	Ular	TP	TP	TP	TP	TP	#	TP	TP	TP	TP
7	Kunyit	#	#	#	#	#	TP	#	#	x	x
8	Landak	x	x	x	x	x	x	#	#	x	x
9	Kulat	x	x	x	x		TP	x	x		*
10	Ikan Pari	#	x	x	x		TP	#	*	*	#
11	Minyak Kelapa	#	#	#	#	#	TP	#	#	#	#
12	Serai	#	J	J	J	#	TP	#	#	#	#
13	Berok	x	x	TP	TP	TP	TP	x	TP	x	x
14	Burong	x	x	x	x	x	TP	#	x	x	x

Petunjuk:

- X - Tidak boleh (pantang) dicampur dengan ruangan A
- * - Tidak Boleh dicampur dengan ruangan A (sangat ditakuti)
- TP - Tidak pernah dicampur atau makan dengan barangan lain.
- J - Jangan dilakukan.

Rumah mereka mempunyai banyak tanda isyarat dan larangan yang perlu diketahui. Tetamu hendaklah memerhatikan persekitaran lorong dan jalan masuk ke kampung hinggalah ke pintu rumah. Jika terdapat daun-daun digantung di hadapan muka pintu atau di dalam rumah tandanya di rumah itu ada orang sakit. Pada ketika ini tetamu dilarang berkunjung atau memanggil tuan rumah tersebut.

Sebelum menaiki rumah mereka, sebaiknya tetamu menunggu di halaman rumah terlebih dahulu sambil memberi isyarat "terbatuk-batuk" agar diketahui oleh tuan rumah terlebih dahulu. Tetamu juga boleh menyeru nama tuan rumah tersebut dengan sopan. Kebiasaannya panggilan dibuat

dengan menyebut nama anak sulung contohnya jika anak sulung bernama Awang, maka tuan rumah dipanggil Pak Awang atau Bapak Awang.

Sekiranya dipelawa naik ke rumah, eloklah tetamu memastikan yang rumah tersebut tidak dalam pantang dengan bertanya kepada tuan rumah. Tetamu mesti menanggalkan kasut sebelum naik ke rumah kecuali dengan kebenaran.

4.4 Pantang-larang terhadap binatang buas.

- (a) Dilarang bercakap besar, atau mengata-ngata dengan menunjukkan bekas-bekas tapak kaki atau najis binatang buas dengan senjata merbahaya (cakap takbur). Akibat dari perbuatan ini, binatang buas akan mengetahui dan timbul perasaan marah terhadap orang itu.
- (b) Jangan sekali-kali mengambil sisa binatang buas untuk dimakan, akibatnya sama seperti di bahagian (a).
- (c) Tempat-tempat binatang buas membunuh manusia tidak boleh ditempuhi atau dilalui. Akibatnya terkena sakit atau mungkin mengigau ternampak binatang buas itu.
- (d) Dilarang menyebut nama-nama binatang buas semasa dalam perjalanan seperti harimau, gajah, buaya dan sebagainya. Boleh disebut dengan nama binatang samaran bersesuaian dengan binatang tersebut, seperti harimau dipanggil Pak Belang.

4.5 Pantang menunjukkan dan menegur kepada sesuatu benda yang ganjil.

Orang Asli Suku Kaum Jakun takut menunjukkan atau menegur sesuatu benda yang ganjil seperti melihat gua-gua yang besar, pokok yang menyerupai binatang dan sebagainya. Akibat dengan menegurnya itu akan jatuh penyakit atau cacat kepada dirinya.

4.6 Ketawa kepada benda-benda atau perbuatan menggelikan hati

Orang Asli dilarang mentertawakan telatah binatang yang menggelikan hati mereka seperti berok, manusia yang menyerupai diri berok atau bertopeng untuk berjenaka. Sekiranya mentertawakan kura-kura ataupun cacing ia boleh mendatangkan petir atau ribut yang kuat serta berlaku banjir di tempat-tempat pantang yang dilanggar. Orang Ulu dan Suku Kaum Semai memanggil "Celau".

Telah berlaku satu peristiwa, apabila seorang budak mentertawakan seekor kambing berjalan dengan berdiri dua kaki sahaja, akibatnya berlaku ribut dan petir tidak berhenti-henti selama dua hari. Seorang pawang kampung terpaksa mengadakan upacara menghiris sedikit di bahagian telinga budak itu dan kambing tersebut untuk mendapatkan darahnya, kemudian dicampurkan tanah tempat kejadian dan dimentera serta dijampi. selang sejam kemudian ribut dan petir reda dan pulih seperti sediakala.

4.7 Mungkir janji

Tidak boleh mungkir janji dengan Orang Asli, jika tidak mereka (Orang Asli) akan ditimpa kemalangan.

4.8 Lain-lain pantang larang

- (a) Rotan panjang dibawa dengan cara ditarik dimuka bumi dari hutan masuk kekampung. Rotan boleh dibawa masuk dengan menggulungnya atau dikandar di atas bahu.
- (b) Buluh dengan daun-daunnya ditegah ditarik masuk dari luar kekampung. Buluh boleh dibawa masuk jika dipotong pendek dan diberkas dengan kemas dan dipikul.
- (c) Membuat hingar-bingar atau bising dalam kampung di waktu pagi.
- (d) Melakukan perkara yang kurang sopan.

Kesemua di atas dipercayai mengikut pantang larang Orang Ulu akan menarik perhatian harimau buas masuk kekampung dan mengganas mengikut jejak tarikan rotan dan buluh. Hingar-bingar membuat binatang buas mengetahui dimana mangsanya. Manakala melakukan perkara yang kurang sopan dikhuatiri mengancam adat resam dan kesopanan kampung.

5. MENDAMPINGI ORANG JAKUN

Di kalangan masyarakat ini lawatan dan kunjungan merupakan amalan biasa seperti masyarakat lain. Mereka mengalu-alukan tetamu terutamanya dari masyarakat lain. Lawatan dan kunjungan juga digalakkan pada musim buah-buahan, waktu kenduri dan perayaan-perayaan khas seperti "Buka Pantang".

5.1 Menziarah

Pada waktu malam dan pagi adalah waktu yang sesuai untuk membuat lawatan. Dalam perbincangan pelawat haruslah menerima pendapat mereka dahulu sebelum mengulas atau memberi pendapat. Mereka sangat suka kalau tetamu ingin belajar adat istiadat kaum mereka.

Ketika sampai di rumah, tetamu seharusnya tidak terus naik kerumah sehingga dipelawa. Semasa berada didalam rumah, tetamu hendaklah memilih tempat yang sederhana. Dilarang duduk atau masuk ke tempat tidur.

- Patut memilih tempat yang sederhana.
- Jangan duduk atau masuk kekawasan tempat tidur.
- Ditegah mengusik atau menyentuh barang-barang dalam rumah seperti sumpitan dan sebagainya.

5.2 Memulakan perbualan dan perkenalan.

- Menjamu rokok atau tembakau
- Dihulurkan kepada ketua keluarga dahulu.
- Menjamu rokok atau sebagainya hendaklah kepada lelaki dahulu.
- Untuk perempuan atau gadis tidak dipelawa kepada mereka tetapi hendaklah melalui keluarga mereka. Tujuan untuk mengelakkan timbul perasaan cemburu kaum lelaki kepada pelawat.

6. AMALAN KESIHATAN

Pesakit dilarang memakan semua jenis makanan dari jenis binatang buruan, ikan-ikan jenis bersengat, buah-buahan, dan sayur-sayuran. Semua orang dilarang naik ke rumah tanpa kebenaran bomoh kecuali ahli keluarga sendiri dan bomoh. Pesakit juga dilarang keluar rumah untuk mengelakkan perkara berikut:

- Cahaya matahari (berpanas)
- Hujan
- Lalu di bawah ampaian kain
- Mandi
- Waktu senja
- Kibas kain ke lampiran si pesakit.

6.1 Tanda Ada Pesakit Di Dalam Rumah

- Pintu sesebuah rumah dipalang kayu
- Daun-daun berubat digantung dan dihalang dalam rumah.
- (Jambak daun lebar, bunga-bunga, buluh pancur)
- Daun disangkut di hadapan pintu/di tepi tangga rumah.

7. PERAYAAN

7.1 Berlancang

Perayaan ini diadakan setahun sekali iaitu hari bagi memuja sungai dengan mengadakan berjenis-jenis masakan. Ia dimakan sambil bermandi selepas patung dan perahu kecil yang dihias dihanyutkan ke sungai.

Bab 2

SUKU BANGSA TEMUAN



(Seorang gadis dari suku bangsa Temuan)

TEMUAN

1. PENGENALAN

Orang Asli Temuan adalah dari kumpulan Melayu Asli (Malay Proto) .Mereka tinggal di negeri Selangor , Melaka ,Pahang, Daerah Muar, Johor, dan Negeri Sembilan. Suku Bangsa Temuan di Negeri Sembilan mengamalkan adat pepatih dan tidak banyak bezanya daripada adat Suku Bangsa Temuan di negeri lain.

2. SOSIO BUDAYA

2.1. Perlantikan Batin

Batin dilantik mengikut keturunan. Jika seseorang itu dilantik sebagai Batin, pengantinya mestilah dari pihak "perut perempuan" (adik atau sepupu kepada batin).

Perlantikan batin berdasarkan kepada ketokohan dan kebolehnya. Biasanya, seseorang yang hendak dilantik mestilah berpengetahuan luas tentang adat istiadat serta pantang larang. Pemilihan batin juga mengambilkira aspek moral dan nilai-nilai murni diri seseorang itu selain daripada kewibawaan dan potensinya sebagai pemimpin.

Sekiranya seseorang Batin itu meninggal dunia atau meletak jawatan, satu mesyuarat tergepar yang diuruskan oleh "Juru Kerah" akan diadakan. Semasa perjumpaan ini satu perundingan yang menggunakan "Bahasa Adat" (secara serius dan jujur) dijalankan.

Ahli mesyuarat mestilah terdiri daripada "perut" yang sama, dan mereka boleh menyandang jawatan Batin (Telapak Batin). Dalam mesyuarat ini Juru Kerah memainkan peranan sebagai jurucakap. Setelah dipersetujui oleh semua ahli "seperut", maka hari perlantikan batin akan ditetapkan. Sekiranya seseorang batin ingin meletak jawatan, satu mesyuarat ahli "seperut" juga diadakan di rumah batin. Sekiranya alasan yang diberi munasabah seperti masalah kesihatan, maka perletakan jawatan akan diterima. Juru Kerah akan mengumumkan kepada anak buahnya tentang perletakan jawatan tersebut.

Sekiranya batin melakukan sesuatu kesalahan yang "melanggar adat", dia boleh dilucutkan jawatan oleh "perut" dan pemilihan baru akan dibuat.

Sebagai seorang batin, ia berkuasa ke atas perkara-perkara berikut:

- Pantang larang dan adat resam.
- Mengeluarkan arahan untuk bergotong-royong
- Merestui perkahwinan dan mengahwinkan "kes" perkahwinan sesama suku.
- Tempat menyelesaikan masalah, pergaduhan, penceraian dan sebagainya.
- Membuka kampung dan ladang baru.
- Menentukan kawasan dan sempadan kampung, kediaman penduduk dan sempadan kuasa ahli-ahli yang dilantik.
- Boleh mengubati pesakit atau menjadi bomoh secara tradisional.
- Menentukan perjalanan adat istiadat dan pantang larang yang telah dikuatkuasakan dan dipatuhi oleh seluruh penduduk kampung dan orang yang datang berhijrah dan pengunjung yang datang ke kampungnya.
- Sebagai tempat perantaraan dan mendapatkan maklumat dari luar dengan masyarakat setempat. Berhubung dengan agensi kerajaan untuk memajukan kawasannya dan menyelesaikan masalah kampung dengan pihak yang berkuasa.

Kelebihan Batin:

- Dihormati dan disegani.
- Semua anak buah patuh kepada arahnya.
- Mempunyai bidang kuasa yang tinggi tetapi tertakluk kepada adat dan pantang.

2.1.1 Menteri (Penasihat Batin)

Menteri ialah seorang yang mahir dalam hal adat dan pantang larang dan memainkan peranan sebagai penasihat kepada Batin, Jurukerah dan Tok Jenang dalam menjalankan tugas harian lembaga adat, walau bagaimanapun beliau tidak boleh menjatuhkan hukuman.

2.1.2 Tok Jenang

Tok Jenang adalah ketua Lembaga adat yang diwarisi secara keturunan. Beliau mempunyai bidang kuasa yang terhad dalam menjatuhkan hukuman.

2.1.3 Jurukerah

Diwarisi secara keturunan dengan mendapat persetujuan daripada Lembaga adat dan seluruh kampung. Beliau boleh menjatuhkan hukuman yang ringan dan menjadi wali (jurunikah) dalam adat istiadat perkahwinan.

2.1.4 Panglima

Dilantik oleh batin setelah mendapat persetujuan daripada Lembaga Adat. Pemilihan adalah berdasarkan kewibawaan dan kebolehan kepemimpinan serta sifat yang disegani. Tugas utama panglima ialah menjaga dan mengurus kebajikan anak-anak buah.

2.1.5 Pemangku

Jawatan pemangku diwarisi secara keturunan. Ia menjalankan tugas yang diamanahkan oleh batin serta berkuasa menjatuhkan hukuman.

2.2. Sistem Kekeluargaan

2.2.1 Perkahwinan

Si teruna akan memberitahu keluarganya jika ia berkenan kepada seseorang gadis. Bapa saudara si teruna akan pergi merisik melalui bapa saudara si gadis untuk mendapatkan persetujuan. Sekiranya kedua-dua pihak bersetuju maka hari pertunangan akan ditetapkan.

a. Pertunangan.

Apabila tiba hari pertunangan pihak lelaki akan menghantar tanda kepada pihak si gadis berupa sebetuk cincin. Sepasang persalinan dan alat solek. Si teruna akan menyarungkan cincin kepada bakal isterinya. Jika berlaku 'langkah bendul' (adik yang dipinang dahulu) maka persalinan dan pemberian yang sama juga perlu diberi kepada kakaknya. Setelah itu tarikh perkahwinan akan ditetapkan. Hantaran dan belanja hangus akan ditentukan oleh pihak si gadis mengikut darjat sesuatu keturunan. Hantaran yang paling tinggi ialah bagi anak-anak yang terdiri daripada pemegang lembaga adat. Bermula dari kedudukannya yang didahului oleh anak Tok Batin, Pemangku, Menteri, Tok Jenang dan Jurukerah.

Dalam tempuh pertunangan, si teruna akan memberi belanja kepada tunangnya melalui bapa saudara atau ibubapa si gadis. Sekiranya pihak si teruna ingin membawa tunangnya berjalan-jalan dia mestilah ditemani oleh keluarga si gadis. Si gadis juga tidak dibenarkan keluar bersendirian.

Sekiranya berlaku perselisihan semasa dalam pertunangan dan pihak lelaki memutus pertunangan maka tiada denda yang akan dikenakan. Belanja yang diberi selama ini dikira hangus. Pihak si gadis cuma akan memulangkan cincin tanda pertunangan dan pakaian persalinan kepada pihak teruna.

Jika berlaku perkara di sebaliknya, maka pihak perempuan akan dikenakan denda dengan membayar balik dua kali ganda hantaran yang telah diberikan oleh pihak lelaki.

Jika tiada timbul masalah dalam tempuh pertunangan maka belanja hantaran yang diberi oleh pihak lelaki akan digandakan semasa majlis perkahwinan. Belanja ini dipanggil sebagai 'belanja hangus'.

b. Majlis Perkahwinan

Pasangan pengantin akan diiring dan dimandikan di tempat yang berasingan. Kemudian akan disolek dan diberi pakaian pengantin mengikut kemampuan. Bakal pengantin akan dikurung di dalam bilik rumah pengantin lelaki sementara menunggu untuk diiring ke rumahnya.

Pengantin lelaki diiring oleh sanak-saudara, paluan kompong dan gesekan biola di rumah pengantin perempuan untuk majlis persandingan. Pihak perempuan akan menyambut ketibaan pengantin lelaki dengan membuat halangan di depan pintu. Pihak lelaki akan menggunakan kata-kata kiasan untuk masuk ke rumah. Mereka akan bersoal jawab untuk melepasi halangan yang dibuat oleh pihak pengantin perempuan sebelum bersanding.

Semasa bersanding, Jurukerah (jurunikah) akan melaksanakan akad nikah. Setelah selesai akad nikah, pengantin akan makan sehidangan. Pengantin lelaki akan menyuap nasi kepal ke mulut pengantin perempuan dan begitu juga sebaliknya. Kemudian barulah mereka makan nasi bersama-sama sepinggan.

Upacara "Makan Sirih" dan "merokok" akan dilakukan di mana pengantin lelaki menyuapkannya ke mulut pengantin perempuan sambil tangannya merangkul bahu pengantin perempuan.

Seterusnya mereka akan diberi nasihat oleh pihak lelaki dan perempuan tentang hidup berumah tangga. Kemudian kedua-dua pengantin akan bersalaman dengan semua sanak-saudara dan para hadirin.

c. Tangkap Basah

Pasangan yang berkenaan akan dibawa ke rumah Jurukerah dan seterusnya dibawa ke rumah batin. Perkahwinan mereka dilangsungkan pada hari itu juga. Pasangan tersebut dikenakan denda 'Sesalah'. Jamuan 'Makan Nasi Segeluk' dan minuman ringan akan diadakan.

2.2.2 Kelahiran

Suami juga turut sama berpantang semasa isterinya mengandung. Mereka dilarang melakukan perkara-perkara berikut:

- Membunuh binatang - bayi akan seman (kenan) atau sawan
- Menggali tiang rumah - susah bersalin

- Menuang timah batu pancing - susah bersalin
- Mengempang sungai - susah bersalin
- Membakar ladang - bayi berkudis
- Menyimen - susah bersalin
- Memelihara binatang liar - bayi akan seman (kenan)
- Memaku - susah bersalin
- Tidak boleh memegang atau memakan kura-kura - bayi akan seman (kenan)

Bidan akan membantu ibu semasa bersalin dan menyambut kelahiran bayi. Tali pusat bayi akan dipotong dan seterusnya bayi akan diberi gelaran 'nama pusat' (nama timangan) .

Darah ibu yang jatuh ke bumi semasa bersalin , akan ditimbus dengan tanah terlebih dahulu sebelum diletakkan daun mengkuang ke atasnya. Ini untuk melindungi ibu daripada diganggu oleh hantu.

Semasa dalam pantang si ibu tidak dibenarkan memakan makanan yang pedas dan ikan yang berbisa seperti ikan sembilang , baung dan semua ikan yang mempunyai sengat dan ikan yang memakan anak kerana anak yang masih menyusu nanti akan terkena kudis.

Semasa anak itu berusia lebih kurang dua atau lebih tiga bulan upacara 'bercukur' atau 'bayar badan' akan dilakukan . Si bapa akan membayar adat dengan mengadakan hari keramaian . Kepala bayi mesti dicukur oleh bidan . Nasi pulut kuning dan putih diletakkan di dalam sebuah pinggan . Di sebelahnya diletakkan seekor ayam yang telah dipanggang dan dipotong-potong mengikut bahagian- bahagiannya iaitu kepak , peha , kaki dan kepala yang dicucuk di sekeliling pulut tadi. Kain merah dan wang adat dibungkus dalam sapu tangan dan diserahkan kepada bidan. Pulut kuning dan kelengkapan di dalam pinggan tadi ditutup dengan daun pisang . Tuan rumah akan menerangkan tujuan kenduri itu diadakan. Setelah bidan membuka daun pisang yang menutup pulut kuning tadi barulah para hadirin boleh menjamu selera. Tuan rumah akan mempersilakan para tetamu menjamah hidangan yang disediakan.

2.2.3 Kematian

Apabila berlaku kematian kebanyakan penduduk di kampung itu akan datang menziarahi simati. Mereka akan memberi derma ikhlas mengikut kemampuan. Penduduk-penduduk di kampung akan berkabung menghormati si mati. Mereka menanggungkan semua aktiviti harian sehingga selesai upacara pengkebumian untuk mengelakkan bencana seperti mendapat luka dan sebagainya.

Sebelum mayat dikembumikan ia akan dimandikan dan dikapankan. Semasa menunggu mayat, orang yang ada di sekitar itu tidak boleh bercakap besar. Mereka tidak boleh menyebut perkataan 'bangun'.

ditakuti mayat akan bangun dan mengganggu orang ramai. Mayat juga dijaga untuk mengelakkannya daripada dilangkah oleh binatang seperti ayam, kucing dan sebagainya.

Semasa mayat itu masih belum dikebumikan, jika benda-benda yang kita makan jatuh ke tanah tidak boleh kita ambil lagi. Dipercayai roh dan semangat orang mati tadi hendak juga apa yang kita makan. Penduduk juga tidak boleh bersuka-ria sebagai tanda menghormati si mati. Mereka juga dilarang mengutip benda-benda makanan yang jatuh ke tanah sebelum mayat dikebumikan kerana dipercayai roh dan semangat si mati akan menuntut makanan tersebut.

Di dahi atau di telinga kanak-kanak pula akan dicalit dengan kapur sirih atau abu kain hitam yang dibakar untuk mengelakkan gangguan roh si mati.

a. Pengkebumian

Mayat akan dikandar dengan diiringi oleh sanak saudara dan penduduk kampung ke kubur. Semasa dalam perjalanan itu mereka pantang melafazkan "berat". Jika seseorang itu telah letih maka ia perlu diganti dengan orang lain.

Sebelum mayat dikebumikan, di dalam liang lahad akan dibakar kemenyan dan diperasapkan sekelilingnya sebanyak tujuh kali sambil menjampi serapah serta menyeru agar roh simati akan aman bahagia di tempat yang istimewa dipanggil "Pulau Buah". Tanah yang digunakan untuk menimbus kubur mesti bersih daripada akar. Kemudian cangkul yang digunakan tadi diketuk sebanyak tujuh kali di atas kubur dan seterusnya kemenyan akan dibakar di atas kubur tersebut.

Sebelum balik, pelita (dinyalakan) akan diletak di atas kubur. Pelita ini akan dipasang selama tiga hari berturut-turut pada sebelah petang.

Apabila balik dari kubur, mereka akan ditabur dengan serai wangi dan ramuan daun-daun hutan yang dipilih (orang yang menaburnya bersembunyi untuk membuang sial dan menghalau hantu-hantu yang mengikut mereka pulang ke rumah. Mereka juga akan membasuh tangan dengan menggunakan beras yang direndam untuk membuang sial).

Pada hari yang ketiga roh si mati akan diberi makan di atas para yang di sediakan di luar rumah (pinggannya daripada daun). Keluarga si mati akan berseru untuk memaklumkan bahawa makanan telah disediakan. Pada hari yang ketujuh keluarga simati akan pergi ke kubur dengan membawa hidangan untuk si mati. Makanan tersebut diletakkan di atas kubur dan diperasapkan sekelilingnya sebanyak tujuh kali. Pada hari yang keseratus diadakan kenduri yang dinamakan "Hari Nauk Tanah" (kenduri arwah).

3. KEPERCAYAAN DAN PANTANG LARANG

3.1 Pantang Larang

Mengikut kepercayaan dan fahaman yang dianuti oleh Suku Bangsa Temuan, perkara-perkara berikut mestilah dipatuhi:

- Tidak boleh kencing di atas batu yang ada penunggu kerana dipercayai mendatangkan mudarat seperti susah untuk membuang air kecil dan mendapat sakit yang berpanjangan.
- Tidak dibenarkan bermain di kawasan yang dianggap keras dan ada penunggu kerana ditakuti "keteguran" terutama pada hari hujan panas dan masuk waktu senja.
- Tidak boleh menegur bunyi-bunyian yang pelik di tengah hutan atau di waktu malam kerana dipercayai akan dimakan harimau.
- Pokok-pokok besar dan batu-batu tempat orang bernazar (bayar niat) juga tidak boleh dipermain-mainkan.
- Mendapat kesusahan atau ditimpa malapetaka apabila kempunan.
- Apabila menanam uri bayi, tidak dibenarkan menoleh ke belakang kerana dipercayai mata anak akan juling.

3.2 Lawatan dan Kunjungan

Beberapa pantang larang juga harus dipatuhi apabila berkunjung ke kampung atau rumah mereka seperti berikut:

- Tidak dibenarkan datang ke rumah, jika ada tanda-tanda tertentu seperti daun-daun, bunga atau kayu berpaling yang menunjukkan rumah tersebut dalam pantang berubat orang sakit.
- Tidak boleh naik ke rumah, jika tidak ada orang lelaki.
- Apabila berada di dalam rumah, sebaik-baiknya jangan memandang ke kiri atau ke kanan dengan mata yang liar.
- Memegang barang-barang yang ada di dalam rumah tersebut tanpa mendapat keizinan terlebih dahulu.
- Jika ingin memberi sesuatu barang, berilah kepada ibu atau bapanya dengan hormat dan sopan.
- Jangan bercerita atau berbual-bual mengenai perkara-perkara yang boleh menyakiti hati mereka.
- Dilarang melafazkan perkataan Sakai, orang hutan, orang bukit, ra'ayat kerana ia adalah satu penghinaan.

3.3. Cara Berubat

3.3.1 Berjampi/ Tangkal

Jampi adalah satu cara perubatan tradisi di kalangan masyarakat Orang Asli. Orang yang sakit akan dijampi oleh bomoh atau dukun selama tiga hari berturut-turut. Jika pantang yang telah ditetapkan oleh bomoh diingkari, maka pesakit itu tidak boleh diubati dan pesakit boleh mati.

Apabila seseorang itu telah dijampi, mereka dikenakan pantang selama tiga hari. Pantang larang yang dikenakan ialah:

- Berjalan-jalan di halaman rumah
- Mandi
- Makan daging
- Makan ikan yang berduri/berbisa (baung,sebilang)
- Makan makanan yang pedas-pedas.

3.3.2 Berubat (sawai)

Alat-alat yang digunakan semasa bersawai adalah seperti berikut :

- Daun kedah (palas) sebanyak tujuh batang.
- Daun calon sebanyak tujuh batang.
- Kemenyan.
- Daun lebak.

Sebelum tiba hari bersawai peralatan seperti di atas mestilah disediakan terlebih dahulu. Semasa mengambil daun-daun tersebut cuacanya mestilah baik dan tiada halangan di dalam perjalanan untuk mengelakkan pesakit daripada mendapat mala petaka yang boleh membawa maut . Daun-daun yang dipilih mestilah menghadap ke arah matahari naik.

Pada sebelah petangnya pula kaum ibu (yang mahir) akan menyediakan peralatan tersebut. Mereka akan membuat beberapa bentuk mengikut arahan Tok Puyang. Daun-daun itu digantung di tengah rumah untuk mengubat sipesakit. Pada sebelah malam lebih kurang jam 9.00 malam, upacara bersawai pun dijalankan . Pesakit akan dibaringkan di tengah rumah . Tok Puyang akan duduk di tiang tunjuk langit berhampiran dengan pesakit. Tok Puyang akan membakar kemenyan dan memerasapkan semua kelengkapan yang digunakan. Bau kemenyan akan menolong mengubat pesakit tadi dengan bantuan '*anak-anak mainnya*' (penunggu yang ada dari gunung ke gunung) dalam nyanyiannya. Tok Puyang juga diiringi oleh pengiring-pengiring yang dipanggil '*Taron*'.

Semasa upacara bersawai itu diadakan semua penghuni di dalam rumah mestilah senyap untuk mengelakkan Tok Puyang terkejut. Di larang memasang lampu picit ke arah Tok Puyang dan tetamu tidak dibenarkan naik ke rumah . Jika ini berlaku Tok Puyang akan terganggu dan boleh membawa mala petaka kepada pesakit dan Tok Puyang.

Apabila selesai menyanyi pesakit "ditepung alin" yang telah diperasapkan dahulu dengan kemenyan oleh Tok Puyang untuk mengeluarkan punca penyakit. Pesakit "ditepung alin" bermula daripada bahagian kepala , diikuti dada dan akhir sekali belakang . Rambut dan kekotoran yang ada ditepung alin hendaklah dibakar oleh Tok Puyang.

Pesakit tidak boleh memakan ikan yang berbisa seperti ikan yang mempunyai sengat, lauk yang disimpan semalaman dan membasuh kepala semasa mandi selama tiga hari. Pesakit hendaklah mandi dengan membasuh kepalanya menandakan tamat pantang. Tok Puyang perlu mengulang semula aktiviti sawai sekiranya pesakit tidak sembuh dengan berniat mengadakan hidangan untuk memulihkan pesakit. Dia akan berseru dan meminta "anak mainannya" untuk memulihkan si pesakit. Dia akan berjanji akan menghidangkan pada keramat supaya membantunya berdasarkan alamat di dalam mimpinya. Setelah pesakit sembuh hidangan seperti sepinggan pulut kuning, tujuh biji telur, ayam panggang dan buah-buahan akan dihidangkan.

4. PERAYAAN

4.1 Musim Buah-Buahan

Musim buah-buahan disambut setelah selesai musimnya. Penduduk kampung itu akan berkongsi mengeluarkan belanja untuk membeli barang-barang keperluan untuk mengadakan keramaian. Penduduk kampung akan dijemput meraiikannya. Mereka mengadakan majlis tari menari sebagai tanda kesyukuran kerana hasil buah-buahan bertambah dan akan berlipat ganda di musim akan datang.

4.2 Sambutan Untuk Tetamu Kehormat

Kehadiran tetamu kehormat biasanya disambut dengan permainan alat muzik dan bunyi-bunyian seperti Kong-kong, Tung-tung dan Geng-gong diikuti dengan pelbagai acara persembahan yang menarik seperti berikut:

4.2.1 Tarian Tradisi

Di antara tarian tradisi yang biasa dipersembahkan ialah Tarian siamang tunggal, Kapal terbang, Mengutip buah, Tarian limau manis.

Tarian ini ditarikan oleh anak gadis Temuan yang lengkap dengan pakaian tradisi, perhiasan daun kelapa yang dianyam (selempang) yang dililit di pinggang, kepala dan dada.

5. PETEMPATAN

Pemilihan sesuatu petempatan atau perkampungan ditentukan oleh batin dan anak buahnya dengan mengambil kira perkara berikut:

- Batin dan anak buahnya mendapat alamat yang baik (melalui mimpi)
- Kawasan tanah pamah yang berhampiran dengan sungai.

- Kawasan itu tidak terletak di antara dua bukit (genting) kerana dipercayai tempat laluan hantu-hantu dan makhluk halus.
- Tempat-tempat yang "keras" (Berhantu)

Bab 3

SUKU BANGSA JAHUT



(Seorang gadis dari suku bangsa Jahut)

JAHUT

1. PENGENALAN

Suku Bangsa Jahut terdapat di daerah Temerloh dan Jerantut di Negeri Pahang. Di daerah Temerloh mereka tinggal di kawasan-kawasan yang dipanggil Kerdau-Paya Paleng, Paya Mengkuang, Kuala Krau - Penderas, Mendoi, Seboi, Pasu, Piau, dan Galong. Di daerah Jerantut mereka tinggal di Sungai Kiol dan Kekwel(Kol). Mereka menyara hidup dengan mencari rotan dan damar untuk dijual, di samping menangkap ikan, memburu binatang dan berladang dengan menanam padi huma, jagung, dan ubi.

2. SOSIO BUDAYA

2.1 Perlantikan Batin

Mengikut tradisi, jawatan Batin diwarisi turun-temurun oleh anak lelaki sulung. Beliau juga harus mempunyai pengetahuan tentang adat istiadat kaum dan perubatan tradisional. Perlantikannya juga perlu persetujuan Penghulu Mukim dan diresui oleh Sultan.

Walau bagaimanapun pada masa ini perlantikan Batin dilakukan melalui undian penduduk. Seseorang yang berhasrat menjadi Batin mestilah berpelajaran, berwibawa dan mendapat sokongan pihak Jabatan Hal Ehwal Orang Asli (JHEOA).

2.2.1 Tanggungjawab Batin

- Ketua Pentadbiran Kampung
- Ketua Adat.
- Orang perantaraan dengan agensi kerajaan dan kampung jiran.
- Tetamu khas dalam majlis dan upacara tertentu di kampung sendiri, di kampung jiran dan pada hari kebesaran negeri.

2.2 Perkahwinan

Upacara perkahwinan mengikut hukum adat yang diwarisi turun temurun supaya keharmonian masyarakat terpelihara. Pasangan yang akan mendirikan rumah tangga bebas daripada mempunyai perhubungan antara adik beradik, sepupu, dua pupu, anak saudara, emak saudara, anak tiri, bapa tiri, emak tiri, menantu, tunang orang, dan isteri orang.

2.2.1 Perkenalan

Perkenalan antara teruna dan dara biasanya bermula pada upacara "nisaoi". Nisaoi ialah upacara mengubat penyakit yang diadakan pada waktu malam. Pada malam itu teruna akan memberi sedikit buah tangan (hadiah) kepada sidara. Jika hadiah diterima tandanya sidara bersetuju. Kemudian teruna akan meminta keluarganya supaya meminang gadis idamannya.

2.2.2 Bertunang

Bapa saudara pihak teruna akan pergi ke rumah keluarga perempuan untuk bertanya dan berunding. Jika pihak perempuan bersetuju pertunangan akan dilaksanakan. Satu majlis pertunangan akan diadakan di rumah pihak perempuan. Dalam majlis itulah tarikh pernikahan di tetapkan. Tempoh pertunangan biasanya tidak lebih daripada tiga bulan. Bakal suami harus memberi wang belanja kepada bakal isterinya mengikut kemampuan.

Semasa dalam pertunangan bakal isteri harus bertandang ke rumah keluarga bakal suami (waktu siang) untuk membantu kerja harian bakal ibu mertua seperti menumbuk padi, mencari kayu api dan mengambil air. Bakal suami pula dikehendaki mengusahakan ladang, mencari peralatan membina rumah dan membina rumah.

2.2.3 Melanggar Syarat Pertunangan

Sekiranya pihak perempuan mungkir janji, ia terpaksa membayar denda pada kadar dua kali ganda perjanjian asal. Jika pihak lelaki pula yang mungkir janji, dia dikehendaki membayar adat "bayang" (mas kahwin) berdasarkan kedudukan keluarga pihak perempuan. Bayaran untuk anak Batin ialah RM 30.00; anak Menteri RM 25.00; dan anak orang biasa RM 22.50.

2.2.4 Pernikahan

Majlis pernikahan dijalankan pada waktu malam di rumah pihak perempuan. Hanya keluarga kedua-dua belah pihak sahaja dijemput hadir. Walau bagaimanapun orang lain boleh hadir sama.

2.2.5 Aturcara Pernikahan

Pengantin diiringi oleh pengapit untuk menikmati satu jamuan khas 'Makan Beradap'. Pengantin lelaki duduk berhadapan dengan pengantin perempuan bersama pengapitnya.

Setelah selesai upacara itu, pihak lelaki akan menjamu pihak perempuan dengan sirih pinang dan rokok. Sambil itu pihak perempuan akan memberi kata nasihat kepada kedua-dua pengantin.

Dalam majlis itu keluarga pengantin perempuan akan menghadihkan pasangan itu peralatan asas dapur seperti sebuah periuk dan kuai, dua keping pinggan dan dua biji mangkuk serta dua batang senduk dan sudu.

Majlis di rumah pengantin lelaki dilangsungkan pada keesokan harinya pula. Dalam majlis itu akan diadakan upacara 'pembayaran adat' dan memberi nasihat oleh pihak lelaki kepada pengantin. Pada sebelah petang kedua-dua pengantin balik ke rumah pengantin perempuan.

Mengikut adat tradisi kaum Jahut, anak perempuan tidak boleh duduk berjauhan dari keluarga asalnya. Kini adat ini sudah agak longgar kerana isteri terpaksa berpindah ke tempat suami bekerja.

2.3 Kelahiran

Perempuan yang hamil dilarang membuat kerja seperti mengikat, memaku, dan menyembelih binatang. Suami pula tidak boleh membuat kerja yang sukar seperti mendirikan tiang rumah, tiang pagar dan mengikat. Jika perbuatan tersebut dilakukan dikhuatiri anak dalam kandungan akan menjadi kenan atau ibu akan mengalami kesukaran semasa bersalin.

Kelahiran bayi diuruskan oleh bidan. Jika tiada bidan, suami dikehendaki menyambut kelahiran anaknya. Setelah bayi lahir, tali pusatnya dipotong dengan menggunakan sembilu buluh yang telah dijampi. Bayi dimandikan dan selepas itu diselimutkan. Uri dan temuni dibersihkan oleh suami dan ditanam di tempat yang jauh dari laluan orang. Semasa membawa temuni, suami tidak boleh menoleh kekiri atau ke kanan kerana dikhuatiri mata bayi menjadi juling.

Tempoh berpantang bagi ibu ialah selama empat puluh empat hari. Semasa berpantang ibu dilarang memakan makanan berminyak, pedas dan berbau keras serta hanyir kerana ditakuti anak akan menjadi bantut. Ibu juga dikehendaki duduk beralaskan daun ubat dibahagian yang berwarna hijau.

Setelah tamat tempoh pantang, suami akan menyediakan ramuan untuk isterinya 'membayar langir' kepada bidan. Ini dilakukan dengan cara mencuci rambut bidan oleh isteri menggunakan limau nipis dalam bilangan yang ganjil. Setelah selesai upacara melangir, nasi kunyit beserta lauk ayam akan dihidangkan.

2.4 Gelaran Dalam Masyarakat

2.4.1 Panggilan kepada Ibu bapa

Anggota masyarakat memanggil nama jiran yang telah berkeluarga berdasarkan nama anak sulung mereka. Misalnya jika anak sulung bernama Abu maka panggilan kepada bapa ialah Pak Abu / Pak Abu atau Tai Abu. Ibu pula dipanggil Mak Abu / Deh Abu atau Wei Abu. Tidak ada panggilan khusus bagi anak-anak.

2.4.2 Panggilan Umum

Suku kaum Jahut masih mengamalkan panggilan mesra terhadap jiran atau anggota masyarakat setempat berdasarkan umur atau jantina.

2.5. Pantang Larang

2.5.1 Pantang Berubat

Kaum Jahut percaya bahawa semua penyakit disebabkan oleh gangguan hantu atau syaitan. Puyang memainkan peranan dalam perubatan cara tradisi. Bagi sakit yang tidak berapa berat cara mengubatnya ialah dengan air atau kapur sirih. Bahan dari tumbuhan seperti akar, daun, kulit dan bunga juga digunakan.

Bagi sakit yang agak tenat mengubatinya ialah secara "nisaoi" (Sawai) dan menggunakan ubat-ubatan. Cara mendapatkan ubat-ubatan itu mestilah mengikut prosedur yang hanya boleh dilakukan oleh puyang sahaja. Oleh itu semasa berubat mereka banyak mengamalkan pantang larang seperti berikut:-

- Hanya puyang dibenarkan naik ke rumah supaya keadaan pesakit bertambah baik.
- Pesakit tidak boleh memakan makanan pedas, berbau hanyir, dan ikan yang bersengat.
- Pesakit tidak boleh berjalan di tengah panas.

Bagi sakit biasa pesakit biasanya berpantang selama tiga hari. Pada hari keempat pesakit dikehendaki mandi. Bagi sakit yang berat tempoh berpantang ialah selama tujuh hari.

2.5.2 Tanda Rumah Sedang Berpantang

Ada kalanya kaum Jahut tidak mengizinkan tetamu naik ke rumah. Oleh itu tetamu hendaklah peka kepada isyarat seperti terdapat daun hijau di tangga rumah dan pintu di tutup walaupun waktu siang. Binatang ternakan juga dilarang memasuki rumah.

2.5.3 Pantang Semasa Menuai Padi

Padi dipercayai mempunyai semangat. Oleh sebab itu mereka mempunyai larangan tertentu yang mesti dipatuhi semasa menuai padi selama tiga hari seperti berikut:

- Bercakap dengan orang yang lalu di ladang.
- Membawa naik ke rumah alat-alat seperti parang, songkok dan selepang.
- Mengeluarkan barang-barang dari rumah.

2.5.4 Pantang apabila berlaku kematian.

Apabila berlaku kematian penduduk kampung dilarang:

- Bekerja pada hari kematian
- Berpakaian cantik
- Pergi ke hutan
- Memulakan pembinaan rumah
- Bersuka ria
- Membuat peralatan memburu kerana dipercayai tidak akan memperolehi hasil.
- Menghias diri iaitu tujuh hari bagi perempuan dan enam hari bagi lelaki.

2.6. Kepercayaan

Kaum Jahut menganut animisme. Mereka percaya bahawa setiap benda mempunyai semangat atau penunggu. Mereka juga percaya akan adanya kuasa ghaib, hantu dan syaitan. Oleh itu adat istiadat dan amalan hidup mereka adalah berlandaskan kepada kepercayaan tersebut.

Sebagai contoh, kaum Jahut percaya bahawa padi mempunyai semangat. Oleh itu mereka sangat menjaga adab-adab ketika menuai padi supaya semangat padi tidak tersinggung. Di antara perbuatan yang boleh menyinggung semangat padi ialah bersiul dan memakan nasi di sisi padi.

Kepercayaan-kepercayaan lain yang berkait dengan fahaman animisme adalah seperti berikut:

- Tempat baru serta benda-benda yang dianggap pelik seperti batu hampar, gua dan pokok beringin mempunyai penunggu.
- Setiap penyakit disebabkan oleh gangguan hantu atau syaitan.

Selain itu terdapat juga kepercayaan-kepercayaan yang berbentuk larangan. Sekiranya larangan tersebut tidak dipatuhi ia akan membawa keburukan. Di antara perkara yang ditegah adalah seperti berikut:

- Menjala ikan pada waktu senja;
- Bermain waktu senja (bagi kanak-kanak);
- Masuk ke hutan bagi pasangan yang baru berkahwin (dalam tempoh tujuh hari);
- Menegur atau menyapa orang yang hendak memasang jerat atau mengail;
- Membuang air besar ketika memuat perangkap;
- Memuji kecantikan anak kecil;
- Bersiul pada waktu malam,
- Memijak batang padi ketika menuai dan
- Memberi hasil tuaian kepada orang lain selain isi rumah dalam masa tiga hari.

2.7 Pembukaan Tempat / Perkampungan

Puyang (pawang) memainkan peranan penting menentukan sama ada sesuatu kawasan itu sesuai atau tidak untuk dijadikan perkampungan. Kriteria utama pemilihan ialah kawasan yang berhampiran dengan sungai atau pancur air.

2.8 Membina Rumah

Rumah dibina berdekatan antara satu dengan lain. Jiran terdekat biasanya terdiri dari keluarga sendiri seperti anak-beranak, adik-beradik dan saudara mara.

Sebelum rumah dibina, pawang akan menentukan sama ada tapak rumah itu baik atau pun tidak. Kaum Jahut percaya jika tapak rumah tidak baik penghuninya akan mudah ditimpa penyakit. Pembahagian tapak rumah atau kawasan ditentukan oleh ketua keluarga dan diputuskan oleh batin.

Rumah-rumah dibina secara "derderau" (gotong-royong) bergilir-gilir, bermula dengan rumah batin.

Pembinaan rumah dimulakan pada awal bulan Islam. Seberapa boleh rumah harus siap dibina dalam bulan itu juga. Semua bahan untuk membina rumah boleh didapati di dalam hutan. Misalnya lantai dibuat daripada buluh atau rotan, dinding daripada kulit kayu kepong dan atap daripada cucuh, pedor dan sermang (pelepah palma). Bahan ikatan semua menggunakan rotan.

3. AMALAN KESIHATAN

3.1 Pemakanan

Seperti kaum-kaum asli yang lain makanan utama kaum Jahut ialah nasi. Jagung dan ubi. Selain itu mereka makan sayur-sayuran seperti bayam, pucuk paku dan pucuk ubi. Mereka juga membeli bahan-bahan seperti minyak masak, garam, gula, kopi dan susu dari kedai.

Kaum Jahut juga mempunyai pantang larang dari segi makanan. Mereka percaya ada makanan yang tidak boleh dimakan serentak. Contohnya, terung tidak boleh dicampur dengan telur ayam.

3.2 Punca air

Kaum Jahut mendapatkan air untuk keperluan harian dari sungai, perigi dan air paip.

4. AMALAN SOSIAL

4.1 Hubungan Dalam Keluarga

Seerti dalam masyarakat lain juga, setiap anggota dalam masyarakat kaum Jahut perlu menghormati dan mengamalkan adat atau peraturan hidup yang telah menjadi amalan kaum mereka turun-temurun.

Di kalangan anggota keluarga misalnya anak-anak mestilah menghormati kedua ibu bapa mereka; malahan mereka tidak boleh membantah cakap ibu bapa.

Satu amalan Kaum Jahut yang agak unik ialah daripada segi perhubungan ibu dan bapa mertua dengan menantu mereka. Ibu mertua dengan menantu lelaki dan bapa mertua dengan menantu perempuan tidak boleh berinteraksi secara terus. Mereka berinteraksi melalui perantara orang ketiga. Contohnya mesej bapa mertua kepada menantu perempuan disampaikan menerusi isteri atau anaknya; begitulah juga sebaliknya.


4.2 Hubungan Dengan Jiran

Bagi menjaga kerukunan di dalam kampung, adat menggariskan peraturan-peraturan seperti berikut:

- Mengamalkan sikap memberi dan menerima apabila memperolehi rezeki, jiran tidak dilupakan.
- Menziarahi jiran yang sakit.
- Bila berlaku kematian, berita itu hendaklah diberitahu kepada semua anggota masyarakat.
- Menziarahi rumah yang ada kematian dan menghulur khidmat tenaga dan sumbangan lain untuk meringankan kesusahan keluarga si mati.
- Beri isyarat bila sampai di halaman rumah jiran dengan cara berdehem(batuk kecil) supaya tuan rumah itu tahu akan kedatangan tetamu.
- Tidak boleh memasuki rumah jiran tanpa izin. dan
- Buka kasut sebelum masuk ke rumah.

Bab 4

SUKU BANGSA TEMIAR



(Seorang lelaki dari suku bangsa Temiar)

TEMIAR

PENGENALAN

1 PETEMPATAN

Pemilihan penempatan suku Bangsa Temiar di sesuatu tempat ditentukan oleh penghulu. Ini dilakukan dengan cara berhalaq (jampi) atau mimpi. Tempat yang hendak didiami jauh dari tanah perkuburan, bebas daripada adanya kayu keras seperti "merbau" dan sebagainya.

Mereka juga tidak membuat penempatan di kawasan berpayau (takungan air) kerana ditakuti berpenunggu. Begitu juga kawasan air terjun dan sungai besar juga tidak sesuai kerana ditakuti ada puteri sungai/lata yang akan mengganggu.

Mereka membina rumah daripada kayu (selain daripada kayu jenis keras) secara bergotong-royong. Di peringkat awal petempatan, mereka membina rumah panjang. Setelah beberapa lama tinggal di rumah panjang tersebut, barulah mereka berpindah dengan keluarga masing-masing dan membina rumah sendiri.

Mereka menyara keluarga dengan bercucuk tanam, berburu dan mencari tumbuhan hutan.

2 SOSIO BUDAYA

2.1 Perlantikan Penghulu

Jawatan Penghulu diwarisi mengikut keturunan. Penghulu biasanya mempunyai ciri-ciri kepimpinan dan pemilihannya dibuat melalui mesyuarat Jawatan Kuasa Kerja Kampung (JKKK) dan dipersetujui oleh pihak HEOA.

2.2 Kuasa Penghulu

Kuasa Penghulu terikat dengan adat resam dan pantang larang suku kaumnya. Beliau berkuasa mengarahkan anak-anak buahnya untuk bergotong-royong menjalankan aktiviti kampung serta merestui sesuatu perkahwinan. Beliau juga memainkan peranan sebagai hakim, penasihat dan penghubung dengan masyarakat serta agensi luar. Penghulu juga mempunyai kebolehan sebagai bomoh tradisional (Halaq).

Perpecahan kuasa penghulu boleh berlaku sekiranya ada diantara keluarga yang tidak bersetuju dengan kepimpinannya. Kuasa penghulu juga akan gugur jika beliau mengasingkan diri dengan berpindah ke petempatan baru.

3. KEKELUARGAAN

3.1 Perkahwinan

i) Adat menanggung (Meyakinkan bakal mertua)

Bakal menantu lelaki perlu dapat meyakinkan mertua akan kewibawaannya dengan menawarkan diri untuk menguruskan kerja-kerja seharian. Ini bererti bahawa beliau mempunyai kesanggupan menanggung bakal keluarganya. Adat ini dikenali sebagai 'Adat Menanggung'.

ii) Merisik

Kedua belah pihak mengadakan perbincangan dan mendapatkan persetujuan daripada kedua-dua pasangan. Kemudian kedua-dua belah pihak berjumpa dengan penghulu untuk mendapatkan restu dan seterusnya menetapkan tarikh perkahwinan.

Majlis perkahwinan diadakan pada waktu malam. Kedua-dua pihak membawa pengiring daripada ahli keluarga masing-masing. Pihak perempuan menyediakan sebuah bilik khas bagi kedua pengantin dan pengiring tidur bersama. Pengiring akan memerhati gerak laku pengantin baru dan melaporkannya kepada ibubapa kedua belah pihak.

Majlis jamuan akan diadakan pada malam kedua. Pada malam itu juga mereka membakar kemenyan dan menabur bertih agar rumah tangga yang dibina sentiasa bahagia dan dijauhi daripada penyakit serta perkahwinan ini juga diresui oleh penduduk kampung. Majlis ini biasanya akan diikuti dengan tarian sewang di dewan/tempat khas yang disediakan.

3.2 Kelahiran

Semasa isteri mengandung kedua pasangan terpaksa mematuhi berbagai pantang larang seperti berikut:

- Suami tidak boleh memegang alat menangkap ikan kerana dikhuatiri bayi yang dilahirkan itu nanti akan terlekat uri.
- Tidak boleh memancing ikan kerana dipercayai tali pusat bayi akan putus semasa bersalin.
- Memotong buluh/tebu mesti mengikut ruas untuk mengelakkan bayi dalam kandungan dalam keadaan songsang.
- Tidak boleh makan kijang, ayam hutan dan ikan yang mempunyai sengat ditakuti bayi terkena 'kenan' dan mengidap sakit 'sabat (sawan).

- Tidak boleh makan binatang buruan yang ditembak kerana dipercayai kandungan akan gugur.

Ibu ditempatkan disebuah bilik khas (biasanya di bahagian dapur). Tempat tidur disediakan dalam kedudukan condong 20 darjah untuk memudahkan ibu bersalin. Suami dan saudara-mara terdekat (perempuan) boleh turut sama duduk di sisi. Tok bomoh dan bidan dipanggil untuk menjampi dan membantu ibu bersalin. Mereka ini memainkan peranan sebagai "Tuhad" (penyelamat). Bidan akan menolong dan mengurus ibu hingga bayi dilahirkan. Bidan akan balik setelah ibu 'buka pantang' iaitu seminggu selepas bayi dilahirkan. Uri bayi akan digantung di pokok yang dipercayai tiada gangguan.

3.3 Pantang Selepas Bersalin

Selepas bersalin ibu dan bidan akan berpantang selama seminggu. Mereka tidak boleh makan semua jenis binatang dan garam. Begitu juga kepada suami jika dia menyentuh bayi tersebut ketika dilahirkan.

Bayi yang baru dilahirkan tidak boleh dipuji dan diberi nama sebelum ibu 'buka pantang' kerana ditakuti terkena 'beranik' (sampuk) yang dipercayai boleh membawa maut.

i) Adat Buka Pantang

Untuk mengadakan majlis ini persiapan kenduri disediakan oleh kedua pihak keluarga. Ibu dan bidan akan dihidangkan dengan makanan khas yang berlainan dari tetamu. 'Tuhad', ibubapa, mertua dan bidan akan berbincang untuk memberi nama bayi.

4. ADAT ISTIADAT

4.1 Sewang

Sewang adalah upacara menurun untuk mendapatkan ilham. Senikata lagu sewang diperolehi oleh Tok Halaq melalui mimpi. Upacara ini dilakukan pada malam hari dan berjalan selama 3 hingga 7 hari berturut-turut bergantung kepada makanan yang ada. Mereka menari dengan cara bergerak sekeliling pentas secara berpusing. Terdapat dua jenis Sewang iaitu Sewang Pantang dan Sewang Umum. Setiap Sewang memakan masa selama 15 minit yang dijalankan oleh 'Juru Sewang'. Juru Sewang akan berdendang hingga tidak sedarkan diri (pengan). Mereka akan dipulihkan oleh Tok Halaq.

4.2 Sewang Kelahiran

Upacara Sewang Kelahiran dilakukan dengan memuja bayi dengan harapan bayi tersebut mendapat kebaikan apabila dewasa kelak. Bayi dijamu dengan bertih

padi/jagung dan diletakkan bau-bauan supaya kehidupan bayi sentiasa harmoni dan aman damai.

a) Sewang Kematian

Upacara ni dimulakan oleh Tok Halaq dengan membuka pantang melalui nyanyian (gabak) iaitu memuja roh simati sambil mengetuk buluh centong dengan kedudukan ruasnya ke bawah. Dalam upacara ini hanya kaum keluarga terdekat yang dibenarkan bersewang bersama Tok Halaq. Selepas upacara buka pantang selesai barulah majlis sewang dibuka kepada tetamu/orang ramai. Sewang Kematian diadakan selepas tamat tempoh berkabung (selepas 40 hari) selama tiga hingga empat malam berturut-turut bergantung kepada bekalan makanan.

b) Sewang sebelum dan selepas membuka ladang

Ia dimulakan dengan nyanyian Tok Halaq memohon agar tanaman mereka mengeluarkan hasil yang memuaskan. Selepas menuai diadakan pula sewang tanda kesyukuran kerana hasil padi yang memuaskan dan terus bertambah pada tahun hadapan.

c) Sewang Berubat

Tok Halaq akan bersewang untuk memohon daripada penunggu supaya menyembuhkan pesakit. Pesakit terpaksa mematuhi beberapa pantang-larang yang telah ditetapkan oleh Tok Halaq .

5. BAHAN PERUBATAN

Suku Kaum Temiar masih mengamalkan perubatan tradisional dengan menggunakan akar dan tumbuh-tumbuhan berikut sebagai bahannya:

- Akar Tongkat Ali
- Kacip Fatimah
- Tunjuk Langit
- Bunga Pakma
- Pokok Dukung Anak
- Pokok Gajah Beranak
- Rempat Gunung
- Pisang Hutan
- Kulat Susu Harimau
- Akar Sempelas

6. KEPERCAYAAN

6.1 Karei / Engkuu

Ia dipercayai sebagai satu makhluk yang besar dan berkuasa yang tinggal di angkasa. Karei akan marah dengan menurunkan bala jika mereka melanggar pantang dan melakukan perbuatan keji.

6.2 Penunggu

Masyarakat Temiar percaya, tempat seperti lubang, lata, teluk, gua, bukit dan gunung ada penunggunya maka ia harus dihindari dan tidak diganggu. Mereka dilarang menegur atau berkata sesuatu di tempat tersebut kerana ia akan disampuk oleh penunggu terutama bagi mereka yang lemah semangat.

6.3 Kayu Merbau

Mereka percaya bahawa teras kayu merbau boleh memanah dan kemungkinan terkena sesiapa sahaja yang lalu di situ terutama pada waktu subuh, senja dan ketika hujan panas serta ada pula pelangi.

6.4 Pantang Harimau

Pertemuan di antara dua orang yang telah berjanji untuk bertemu harus ditunaikan. Jika salah seorang mungkir janji, dipercayai 'jelmaan harimau' akan datang mengganggu orang itu.

6.5 Bunga Pakma

Bunga Pakma tidak boleh dipetik kecuali 'Tok Halaq'. Jika terjatuh dan bergolek ketika membawanya, dipercayai ia boleh bertukar menjadi harimau (ruai).

6.6 Buah-buahan Hutan

Buah perah dan buah-buahan lain di dalam hutan hendaklah dipetik dalam sesuatu musim dengan satu upacara bergotong-royong untuk dibuat kenduri. Selepas itu barulah ia boleh diambil. Jika mereka melanggar pantang dipercayai 'ruai' buah-buahan akan mengarahkan harimau mengganggu orang ramai.

6.7 Kempunan (selantap)

Suku Kaum Temiar juga percaya jika sesuatu keinginan/ niat tidak tercapai maka mereka akan kempunan. kempunan bermakna mereka akan ditimpa bala/ kesusahan.

6.8 Suara Burung

Apabila burung 'Chiap Chereyet' berbunyi, ini bermakna ia menegur roh simati yang sedang berkeliaran. Sesiapa yang mendengar bunyi ini hendaklah mengasap

badannya dengan asap supaya 'badi' roh tidak mengganggu atau merasuk keluarga mereka.

7. AMALAN SOSIAL

7.1 Bertandang

- Tetamu hendaklah pasti ada orang di rumah sebelum bertandang. Tanpa memakai kasut tetamu boleh naik ke rumah setelah dijemput.
- Tetamu mesti menegur ketua rumah terlebih dahulu dan bertanyakan khabar.
- Tetamu selalunya menghadihkan sesuatu kepada ketua rumah seperti rokok atau tembakau.
- Tetamu akan minta diri untuk balik dan bertanyakan pesanan untuk dibawa kepada penghulunya (jika tetamu dari kampung lain).

7.2 Adab Bercakap Dengan Mertua

Menantu lelaki tidak boleh bertentang mata dengan ibu mertua dan menantu perempuan tidak boleh bertentang mata dengan bapa mertua semasa bercakap. Mereka boleh bercakap melalui orang tengah (orang perantaraan).

8. ALAT MUZIK TRADISIONAL

Alat muzik tradisional masih digunakan dalam majlis sewang dan untuk hiburan. Di antara alat muzik tradisional mereka ialah:

- Siol (Seruling Buruh)
- Gooh (Buluh Centong)
- Genggong (Ranggot)
- Bataq (Gendang)
- Kerep (Gitar Buluh)

9. KEMATIAN

Apabila berlaku kematian, Tok Halaq akan mengesahkan kematian tersebut. Berita kematian akan diberitahu kepada penghulu dan seterusnya kaum keluarga terdekat.

Mayat tidak boleh dimandikan atau dibersihkan. Ia dipakaikan pakaian baru dan diselimutkan dengan kain baru kemudian digulung dengan tikar baru dan diikat. Selepas itu, ia diletakkan di atas pengandar (usungan) yang dibuat dari buluh cincang. Sebelum mayat dikuburkan, unggun api dinyalakan di bahagian kaki atau kepala simati untuk mengelakkan roh simati mengganggu ahli keluarganya.

Nyanyian 'Chinchemm' (lagu sedih) dinyanyikan semasa mengiringi mayat ke tanah perkuburan. Tanah perkuburan biasanya terletak di seberang sungai untuk

mengelakkan hantu yang membawa kematian balik. Liang dikorek lebih kurang sedalam dua meter. Semua harta kepunyaan simati akan ditanam bersama-sama mayat sementara barang-barang lama dan rumahnya dibakar.

Sekiranya 'Tok Halaq' meninggal dunia, mayatnya tidak terus ditanam sebaliknya diletakkan di dalam bilik khas di rumahnya. Kaum keluarga akan menyalakan unggun api di bawah rumah tersebut selama tujuh hari untuk mengelakkan mayat daripada diganggu oleh binatang buas. Kaum keluarga akan berpindah ke tempat baru. Dalam tempoh berkabung selama 40 hari semua aktiviti dalam bentuk hiburan diharamkan. Setelah selesai berkabung barulah majlis kenduri diadakan.

9.1 Acara Buka Pantang Kematian

Setelah tamat tempoh pantang selama 40 hari, diadakan pula 'Acara buka Pantang Kematian'. Tiga hari sebelum upacara ini dijalankan, kaum keluarga dijemput berkumpul semula dengan tujuan untuk mengumpulkan bahan makanan bagi majlis kenduri.

Mereka dibahagikan kepada dua kumpulan. Kumpulan pertama menguruskan penyediaan makanan dan kumpulan kedua menyediakan tempat bersewang. Tempat sewang akan dihias dengan pucuk 'calon' buah kelapa (palas) untuk dijadikan seludang palas (*Tempok Kuar*) dan bunga.

Bab 5

SUKU BANGSA MAH MERI



(Seorang lelaki tua dari suku bangsa Mah Meri)

MAH MERI

1. PENGENALAN

Mah Meri bermakna "Orang Hutan" sementara dalam istilah bahawa Mah Meri disebut "bersisik". Mereka juga dikenali sebagai orang laut kerana mereka tinggal berhampiran dengan laut dan bekerja sebagai nelayan.

Tidak ada bukti sejarah yang tepat tentang asal usul mereka, walau bagaimanapun mereka ini dipercayai berhijrah dari pulau-pulau di selatan Johor ke pantai negeri Selangor kerana lari dari musuh.

Kini masyarakat Mah Meri telah mengalami perubahan dari segi pemikiran dan pembangunan hasil dari percampuran dengan masyarakat lain.

2. SOSIO BUDAYA

Pada keseluruhannya masyarakat Mah Meri masih mengamalkan budaya dan adat resam serta pantang larang yang tersendiri. Mereka masih mengamalkan kepercayaan animisme di mana objek di persekitaran mereka seperti pokok, pokok besar, batu, dan sungai dipercayai mempunyai kuasa baik dan jahat. Kuasa ini dipanggil "Orang Halus" atau "moyang". Bagi mereka hantu menggambarkan kejahatan.

2.1. Perlantikan Batin

Masyarakat Mah Meri akan melantik seorang ketua yang digelar Batin di kalangan keluarga mereka bagi menangani masalah berhubung dengan kematian dan adat istiadat. Jawatan batin merupakan jawatan yang tertinggi. Mereka mempunyai struktur organisasi tersendiri yang lazimnya diwarisi secara keturunan dan disandang sepanjang hayat. Berikut ialah struktur organisasi masyarakat Mah Meri serta bidang kuasa mereka:

- | | |
|----------|---|
| Batin | : Bertindak sebagai ketua kampung yang bertanggung jawab dalam urusan nikah kahwin dan ketua adat. |
| Jenan | : Merupakan orang Kanan Batin yang bertindak sebagai penasihat kepada orang kampung dan boleh memangku jawatan batin semasanya ketiadaanya. |
| Penghulu | : Membantu Jenang dan bertindak sebagai penyelarasan kegiatan kampung serta menjadi saksi di dalam upacara perkahwinan. |

- Jukrah : Membantu dan memberi arahan dalam melaksanakan aktiviti dalam kampung dan keluarga.
- Penggawa : Memainkan peranan sebagai penasihat, penyiasat, pendakwa berkaitan masalah kampung dan keluarga.
- Laksamana : Membantu dalam melaksanakan arahan daripada jawatan kuasa di atas (ada di antara kampung yang telah menghapuskan jawatan ini).

2.2 Sistem Kekeluargaan

Dalam masyarakat Mah Meri ikatan perkahwinan merupakan satu perkara suci yang diberi perhatian sewajarnya. Di kalangan mereka perkahwinan berlaku dalam kelompok suku kaum diantara suku kaum dan luar suku kaum.

Pasangan yang akan melangsungkan perkahwinan biasanya mendapat restu daripada kedua-kedua belah pihak dan mereka jarang berpoligami.

2.2.1 Peminangan

Dalam menentukan jodoh, masyarakat Mah Meri tidak mempunyai kriteria yang khusus untuk memastikan kesesuaian pasangannya selain daripada mendapat persetujuan pihak perempuan.

Dalam proses peminangan, pihak lelaki akan diwakili oleh "wali" (abang atau adik lelaki disebelah bapa) untuk merisik dan bertemu dengan ibu bapa dan "wali" pihak perempuan untuk memastikan anak gadis tersebut belum mempunyai. Sebagai tanda persetujuan, pihak lelaki akan memberi sirih dan cincin perak sebagai tanda. Kedua-dua belah pihak akan menetapkan hari dan tarikh yang sesuai untuk mengadakan majlis pertunangan.

2.2.2 Pertunangan

Apabila tiba masa yang ditetapkan rombongan pihak lelaki akan bertandang ke rumah pihak perempuan untuk melangsungkan pertunangan. Rombongan pertunangan akan diwakili oleh beberapa orang waris bersaksikan Batin, Jenang dan lain-lain ahli jawatan kuasa. Majlis pertunangan ini diserikan lagi dengan barang-barang hantaran dari pihak lelaki mengikut kemampuan termasuk cincin emas atau perak. Majlis pertunangan dilangsungkan dengan disaksikan oleh semua anggota masyarakat. Secara tidak langsung majlis pertunangan ini bertujuan untuk memaklumkan kepada ahli masyarakat bahawa anak mereka telah ada yang punya. Para tetamu akan diberi jamuan mengikut kemampuan mereka.

2.2.3 Perkahwinan

Untuk menetapkan hari upacara perkahwinan atau pernikahan, mereka masihterikat dengan kepercayaan dan pantang larang. Belanja untuk majlis perkahwinan akan ditanggung oleh kedua-dua belah pihak mengikut kemampuan. Menjelang hari perkahwinan, ahli masyarakat diminta membantu menyediakan persiapan dan membekalkan peralatan untuk membina bangsal dan sebagainya.

Sekiranya upacara perkahwinan yang dilangsungkan agak besar maka kerjakerja memasak akan dibuat pada malam sebelumnya sambil dihiburkan dengan bunyi-bunyian muzik tradisional hingga pagi, sementara untuk majlis perkahwinan yang kecil pihak pengantin hanya memberi jamuan untuk keluarga terdekat sahaja.

Sehari sebelum upacara perkahwinan pihak lelaki akan datang dan menumpang di rumah jiran yang berhampiran dengan rumah pengantin perempuan. Rumah tersebut akan dikawal untuk mengelakkan perkara yang tidak diinginkan berlaku. Di samping itu makanan akan di hantar setiap kali tiba waktu makan oleh pihak pengantin perempuan.

Apabila tiba upacara persandingan, pengantin lelaki akan diarak oleh saudaramara ke rumah pengantin perempuan. Pengantin perempuan akan turun untuk menyambut pengantin lelaki di pertengahan jalan. Mereka akan berjalan seiring dan terus duduk di atas pelamin. Upacara seterusnya adalah mempersembahkan silat, berinai dan menepung tawar kepada kedua-dua mempelai.

Pada malam tersebut, pengantin lelaki dibolehkan bermalam di rumah pengantin perempuan. Pada keesokan harinya kedua-dua mempelai akan dimandikan dengan air mawar sebanyak 7 tempayan untuk membuang sial. Kedua-dua mempelai juga dimestikan mengasah gigi. Upacara ini dijalankan oleh seorang bomoh khas. Bayaran yang di anggap "hadiah" akan diberi selepas bomoh selesai menjalankan upacara mengasah gigi. Upacara yang terakhir dalam majlis perkahwinan Mah Meri ialah upacara "pengenalan" kepada wali pengantin kedua belah pihak dan seterusnya akad nikah. Dalam majlis ini pengantin akan diberi tahu tentang tanggung jawab masing-masing terhadap kebahagiaan dan keharmonian rumah tangga mereka dengan merujuk kepada wali (pengantin perempuan akan merujuk kepada wali pengantin lelaki dan pengantin lelaki akan merujuk kepada wali pengantin perempuan).

2.2.4 Kahwin Lari

Maksud kahwin lari ialah seorang lelaki membawa lari anak gadis dan bersekedudukan tanpa pengetahuan dan restu ibu bapa. Perbuatan sedemikian amat memalukan kerana perbuatan tersebut akan menjatuhkan maruah keluarga. Anggota masyarakat akan berusaha mencari dan menemukan pasangan tersebut dengan keluarga masing-masing bagi mencari jalan penyelesaian. Di atas perbuatan tersebut, adat tebus malu

dikenakan kepada keluarga pihak lelaki dan perempuan, jika kedua-duanya bersetuju mereka akan dinikahkan mengikut adat istiadat kaum Mah Meri. Dalam masalah ini majlis persandingan tidak akan diadakan.

3. KELAHIRAN

Apabila kandungan ibu mencapai enam hingga tujuh bulan, pasangan suami isteri akan menempah seorang bidan pilihan mereka. Sebagai kata pengikat janji mereka akan membawa barang-barang seperti kain ataupun apa-apa sahaja barang yang termampu. Bidan tersebut akan mengurut dan memeriksa kandungan ibu.

Bidan akan meletakkan daun pandan berduri dan puting parang di bawah rumah semasa ibu hampir bersalin. Tujuannya untuk menjauhkan polong dari menghampiri rumah tersebut.

Ibu juga diberi minum air selusuh yang dijampi untuk memudahkannya bersalin. Kelahiran bayi biasanya disambut oleh seorang bidan serta dibantu oleh seorang bomoh yang berpengalaman dalam jampi mentera. Setelah bayi dilahirkan, bidan akan memotong tali pusat bayi tersebut sambil menyebut nama yang telah dipilih oleh keluarga tersebut serta mendoakan supaya bayi tersebut sentiasa berada di dalam kebaikan dan kesejahteraan. Dalam tempoh 44 hari bidan akan mengurut ibu dan memandikan bayi.

Kaum Mah Meri menganggap bahawa uri adalah saudara kembar kepada bayi berkenaan. Oleh itu mereka akan membersihkan dan menanam uri tersebut dengan sempurna di dalam tanah yang kering, di belakang rumah dan selamat dari gangguan binatang. Mereka percaya jika uri ditanam jauh dari rumah, bayi berkenaan akan merantau jauh apabila dewasa kelak.

Semasa dalam pantang, si ibu tidak boleh memakan makanan yang dianggap boleh membawa penyakit seperti telur, keladi dan benda-benda sejuk kepada ibu dan bayi tersebut. Makanan yang pedas, berempah dan ikan berduri juga tidak boleh dimakan.

Selepas 44 hari siibu bolehlah mengadakan upacara "cuci lantai". Upacara ini adalah satu majlis "membuka pantang" dan ia boleh diadakan pada bila-bila masa bergantung kepada kemampuan keluarga tersebut. Dalam upacara ini siibu dan bidan akan "menepung tawar" (tepung beras) antara satu sama lain untuk membersihkan diri dan membuang sial. Tok Bomoh akan memainkan peranan untuk menjampi serapah. Di pergelangan tangan siibu, bidan, bayi dan tok bomoh akan diikat dengan benang berwarna merah menandakan tamat pantang. Bidan akan diberi sedekah berupa wang dan juga pengeras berupa barangan seperti pisau, jarum, benang dan gunting.

4. KEMATIAN DAN PENGKEBUMIHAN

Jika berlaku kematian, anak yang tertua (waris terdekat) dalam keluarga tersebut akan berjumpa dengan Batin. Selepas itu Batin akan mengarahkan anak buahnya untuk menyebarkan berita sedih itu kepada semua saudara mara dan kawan-kawan simati.

Sementara menunggu kedatangan saudara yang jauh, mayat akan diletakkan di tempat yang lapang seperti di serambi. sebagai tanda menghormati mayat tersebut, setiap orang yang menziarah akan membakar kemenyan dan berserapah serta mendoakan agar simati berada di dalam keadaan yang baik. Bagi mereka yang mempunyai kemampuan sumbangan wang akan diberi.

Selagi mayat berada di dalam rumah, mereka tidak dibenarkan makan dan minum kecuali untuk roh semati di mana satu hidangan diletakkan di tempat khas. Mayat dijaga supaya tidak dilangkah oleh binatang terutamanya kucing. Mengikut kepercayaan kaum Mah Meri, mayat yang dilangkah oleh binatang akan dirasuk hantu dan ia akan bangun dan berjalan serta mengganggu ahli keluarganya.

Pengebumian akan diuruskan oleh batin atau bomoh. Mayat akan dikebumikan di dalam lubang sedalam dua meter. Sebagai mengingati simati, majlis pemujaan akan diadakan pada hari ketujuh, keempat puluh empat dan keseratus hari. Harta peninggalan simati akan diserahkan kepada anak yang tertua dalam keluarga tersebut untuk dibahagi-bahagikan di kalangan keluarganya. Balu simati biasanya tidak akan berkahwin dalam tempoh seratus hari selepas kematian.

5. PANTANG LARANG

5.1 Majlis Perkahwinan

- Rumah pengantin tidak akan disapu dengan penyapu lidi sepanjang majlis diadakan.
- Tidak boleh berlaku pergaduhan.
- Peralatan yang dipinjam semasa majlis itu hendaklah dikembalikan selepas tiga hari.

5.2 Ibu Mengandung

- Suami/isteri tidak boleh memaku atau mengikat kerana dikhuatiri siibu akan mengalami masalah "lekat uri" semasa bersalin.
- Suami/isteri tidak boleh membunuh atau menyembelih binatang kerana dikhuatiri akan terkenan pada bayi yang akan dilahirkan.
- Menyumbat atau menutup lubang kerana dipercayai bayi yang dilahirkan itu nanti tidak mempunyai lubang dubur.
- Suami/isteri dilarang membelit kain ke leher kerana dikhuatiri bayi yang akan dilahirkan nanti akan terbelit tali pusat.
- Tidak boleh memakan ikan lidah, menebang dan menetak batang pokok kerana dipercayai bibir bayi akan terbelah (sumbing).

- Dilarang memakan pisang kembar kerana dikhuatiri akan mendapat anak kembar.
- Dilarang menghina dan mengeji orang kerana dipercayai terkena badi bayi dalam kandungan.

6. PERAYAAN

6.1 Puja Pantai

Masyarakat Mah Meri akan mengambil satu hari dalam setahun untuk mengadakan hari pemujaan khas untuk "moyang laut" atau dipanggil "puja pantai". Upacara ini dibuat secara besar-besaran oleh penduduk kampung yang akan diketuai oleh bomoh. Mereka akan berarak dari kampung hingga ke tepi laut dengan iringan paluan muzik tradisional. Dalam upacara ini juga persembahan makanan kepada moyang akan dilakukan. Mereka percaya upacara ini dijalankan untuk memohon restu moyang supaya mereka mendapat hasil tangkapan laut yang banyak, juga memohon agar keselamatan mereka tidak diancam.

6.2 Musim Buah

Upacara ini dijalankan secara sederhana selepas musim buah-buahan. Penduduk kampung hanya mempersembahkan sajian makanan kepada moyang dan memberi jamuan makan kepada hadirin.

7. KEPERCAYAAN

Masyarakat Mah Meri menganggap bahawa sesuatu kejadian yang berlaku sama ada baik atau buruk merupakan petunjuk untuk mereka memulakan pekerjaan atau perjalanan.

Sehubungan dengan itu, masyarakat Mah Meri masih mengamalkan dan berpegang teguh kepada adat dan kepercayaan berikut:

- | | |
|-------------------------------------|---|
| • makan tebu waktu malam | - Seolah-olah menghisap darah keluarga yang telah mati. |
| • berjalan dalam panas | - tersampuk hantu |
| • menunjuk pelangi dengan jari | - jari akan putus |
| • tidak menghormati orang tua | - badan akan kurus dan selalu mendapat penyakit (Tulah) |
| • makan kerak nasi | - hutang tidak dapat dibayar. |
| • kedekut garam | - kubur akan dipenuhi air |
| • membasuh kelambu di sungai | - akan mati dimakan buaya |
| • menyembelih ayam pada waktu malam | - akan disumpah oleh ayam |

- menyiksa atau membunuh binatang dengan sengaja - akan ditimpa badi
- bersiul dalam rumah atau bersiul waktu malam - memanggil hantu atau sikap kurang ajar
- makan pisang dirumah orang mati - seolah-olah makan jari orang mati

8 Alamat /Petanda

- bergerak biji mata - tanda akan menangis atau melihat benda yang pelik
- gatal tangan - mendapat rezeki
- telinga gatal - ada orang yang mengata.
- kaki gatal - akan membuat perjalanan jauh.
- mulut atau bibir bergerak - bergaduh atau cakap besar.

9. TAFSIRAN MIMPI

Masyarakat Mah Meri menganggap mimpi adalah sebagai petunjuk untuk membuat tindakan, keputusan dan perancangan.

Mimpi yang membawa makna tidak baik.

- Naik perahu atau tanggal gigi. - akan berlaku satu kematian
- Disengat binatang bisa - akan ditimpa sejenis penyakit.

Jika kaum Mah Meri mengalami mimpi-mimpi di atas, mereka akan menangguh atau membatalkan pekerjaan yang akan dilakukan.

Mimpi-mimpi yang membawa makna yang baik.

- Bulan terang
- Makan buah yang manis

Kaum Mah Meri percaya mimpi yang tersebut di atas memberi petunjuk untuk mereka meneruskan pekerjaan.

Bab 6

SUKU BANGSA SELETAR



(Seorang wanita dari suku bangsa Seletar)

ORANG SELETAR

1. PENDAHULUAN

Orang Seletar atau "Sea Gypsies" merupakan kumpulan pengembara persisiran pantai dan laut yang tinggal dalam perahu, di pulau, persisiran pantai, dan kuala sungai. Kawasan utama petempatan mereka ialah di persisiran Pantai Selatan Johor dan Utara Singapura.

Secara taradisinya, mereka bergantung kepada hasil laut. Keadaan ini menyebabkan mereka hidup berpindah-randah. Walau bagaimanapun perubahan dalam sosio-ekonomi telah merubah cara hidup mereka. Kini mereka tinggal menetap di kawasan petempatan yang lebih teratur dan tersusun di Persisiran Pantai Selat Johor. Mereka juga menangkap ikan menggunakan peralatan moden. Ada di antara mereka yang bekerja di kilang perindustrian.

Mereka mengamalkan animisme dan ada di antara mereka yang telah menganut Agama Islam.

2. SOSIO BUDAYA

2.1 Perlantikan Batin

Perlantikan batin adalah berdasarkan kepada kebolehan dan kemahirannya sebagai seorang pelaut. Jawatan batin biasanya diwarisi turun temurun dan direstui oleh pengikut kumpulan berkenaan. Perlantikan akan dibuat secara wasiat batin kepada bomoh atau orang tertentu. Apabila batin mati, batin baru akan dilantik berdasarkan wasiat tersebut oleh orang yang dipertanggungjawab.

2.2 Kekeluargaan

Suami bertindak sebagai ketua keluarga yang dibantu oleh isteri dalam semua hal dan kebajikan keluarganya. Suami bertanggungjawab dalam semua hal dan kata putus mesti dipatuhi oleh ahli keluarga tersebut. Sebagai wakil keluarga beliau akan menghadiri sesuatu upacara yang melibatkan keseluruhan anggota komuniti kumpulan tersebut.

Ibu bapa lazimnya keberatan untuk melepaskan anak lelaki mereka berpisah jauh dari mereka setelah mendirikan rumah tangga. Mereka merupakan harapan kepada keluarga tersebut untuk menjaga ibu bapa yang telah tua di samping berperanan sebagai ketua keluarga.

2.3 Adat Perkahwinan

Orang Seletar berkahwin di kalangan suku kaum mereka sendiri. Waris pihak lelaki akan merisik untuk mendapatkan persetujuan pihak perempuan. Setelah itu waris pihak lelaki akan dihantar untuk melamar. Sebagai tanda peminangan pihak lelaki akan memberi sehelai kain batik dan pihak perempuan akan membalas dengan sehelai kain pelikat sebagai tanda bersetuju. Kedua-dua pihak akan menetapkan tarikh dan hantaran belanja untuk majlis perkahwinan. Menjelang hari perkahwinan perbincangan terakhir di antara kedua-dua belah pihak diadakan. Perbincangan ini dipengerusikan oleh batin. Dalam perbincangan ini, pihak lelaki biasanya bersetuju dengan keputusan yang dibuat.

Apabila semuanya telah dipersetujui kedua-dua pihak akan menjemput semua ahli keluarga jauh dan dekat. Adalah menjadi satu pantang sekiranya ada di antara mereka ahli keluarga tidak dijemput atau diberitahu mengenai majlis tersebut. Bantuan jiran dan ahli keluarga juga amat diperlukan bagi melancarkan majlis tersebut.

Pada hari perkahwinan kedua-dua pengantin berdandan dan berinai di rumah masing-masing. Mereka tidak boleh mandi laut kerana pengantin dipercayai berdarah manis. Oleh itu mereka akan terkena dinah dan hantu laut akan mengganggu kehidupan mereka.

Keberangkatan tiba rombongan pengantin lelaki ke rumah pengantin perempuan akan diiringi dengan paluan gendang dan bunyian ketukan dari tin dan tong sebagai satu isyarat. Semasa majlis persandingan, kedua-dua mempelai akan diberi nasihat oleh salah seorang waris yang telah ditentukan (sama ada batin atau ibu bapa pengantin). Seterusnya upacara makan berdamai diadakan. Semua tetamu diberi jamuan.

Majlis ini kadangkala berlarutan hingga malam. Pada sebelah malamnya majlis tari menari diadakan sebagai majlis bersukaria.

2.4 Kelahiran

Apabila isteri hampir bersalin, suami akan menjemput Mak Bidan dan memberitahu semua penduduk kampung mengenai perkara tersebut. Kaum wanita akan datang membantu dan juga memberi semangat kepada ibu tersebut.

Setelah anak dilahirkan adalah menjadi pantang kepada semua yang hadir memuji kecantikan bayi tersebut kerana dipercayai hantu-hantu atau roh-roh yang tidak diundang akan mengganggu kehidupan bayi berkenaan seperti terkena sawan atau penyakit.

2.5 Kematian

Apabila berlaku kematian semua penduduk kampung akan berkabung dan tidak dibenarkan menjalankan aktiviti seharian sebagai menghormati jenazah dan keluarganya. Jenazah akan dikebumikan segera setelah diberitahu kepada semua

ahli keluarga yang terlibat. Jenazah akan diiringi ke tanah perkuburan oleh kaum lelaki sahaja sementara kaum perempuan tidak dibenarkan ke tanah perkuburan sebelum jenazah dikebumikan.

Pelita akan dipasang di atas kubur selama enam hari enam malam berturut-turut. Semua peralatan simati akan diletak di atas kubur dan diselubungkan dengan jala. Perbuatan ini dipercayai dapat mengelakkan roh simati daripada mengganggu keluarga dan penduduk di situ.

2.6. Perayaan

Orang Seletar tidak mempunyai hari perayaan sendiri. Mereka menyambut perayaan yang diraikan oleh masyarakat sekeliling. Selain daripada itu mereka menganggap lawatan orang kenamaan ke perkampungan mereka sebagai satu perayaan yang tidak rasmi. Pada ketika itu semua penduduk kampung turut terlibat untuk memeriahkannya.

3. KEPERCAYAAN DAN PANTANG LARANG

Terdapat beberapa kepercayaan dan pantang larang dalam masyarakat Orang Seletar seperti berikut:

3.1 Hantu Pantai dan Laut

Dipercayai setiap pantai dijaga oleh hantu pantai dan laut pula dijaga oleh hantu laut. Oleh itu mereka dilarang menyebut atau memanggilnya apabila berada di tempat tersebut kerana dikuatiri akan menerima bencana seperti tangkapan ikan akan berkurangan kerana dipercayai ikan tersebut dimakan oleh hantu. Begitu juga jika mereka hendak menebang pokok bakau, mereka hendaklah meminta kebenaran terlebih dahulu daripada hantu pantai.

3.2 Cabul Mulut

Cabul mulut merupakan larangan bagi seseorang daripada menyebut sesuatu yang tidak elok seperti adanya hantu yang menyerupai sesuatu objek. Hantu itu dipercayai akan menyampuk dan orang berkenaan akan terkena "dinah".

3.3 Pantang Di Laut

Orang Seletar percaya bahawa laut merupakan tempat tinggal hantu dan penunggu laut. Oleh itu semasa berada di laut jika melakukan sesuatu tanpa meminta izin daripada mereka terlebih dahulu, maka ia dianggap telah mengotorkan tempat tersebut menyebabkan mereka akan dinah.

Orang yang "dinah" akan meracau tidak tentu arah. Untuk mengubati pesakit tersebut, Pawang akan meminta bantuan "Raja Mambang" ia itu Mambang Tali Arus Besar dan Kecil sebagai makhluk perantara di antara pawang dan

penunggu laut. Biasanya pesakit boleh diubati. Proses mengubatinya bergantung kepada berat atau ringan dinah yang ditanggung oleh pesakit.

3.4 Amalan Kesihatan dan Perubatan

Pawang atau bomoh memainkan peranan penting dalam masyarakat Orang Seleter. Mereka akan memberi penawar terlebih dahulu kepada pesakit sebelum pesakit mendapatkan rawatan hospital.

KOLEKSI GAMBAR BUDAYA, PANTANG LARANG DAN AMALAN KESIHATAN ORANG ASLI



Tempat Pemujaan



Tarian Sewang




Pakaian Dari Kulit Kayu



Pakaian Dari Kulit Kayu

KOLEKSI GAMBAR BUDAYA, PANTANG LARANG DAN AMALAN KESIHATAN ORANG ASLI




Jex (Belung)



Siol (Seruling Buluh)




Tabung Duit



Sikat

KOLEKSI GAMBAR BUDAYA, PANTANG LARANG DAN AMALAN KESIHATAN ORANG ASLI



Pacaq (Sanggul Buluh)



Kereb



Gooh (Buluh Centong)




Buluh Sumpit

KOLEKSI GAMBAR BUDAYA, PANTANG LARANG
DAN AMALAN KESIHATAN ORANG ASLI



Muzik Tarian Sewang



Majlis Persandingan




Muzik Tarian Sewang



Rumah Sewang

Bab 7

SUKU BANGSA SEMAI



(Seorang lelaki dewasa dari suku bangsa Semai)

SEMAI

1. PENGENALAN

Suku kaum Semai tinggal bertaburan di kawasan Banjaran Titiwangsa, meliputi Perak Tengah, Perak Selatan dan Pahang Barat. Bancian pada tahun 1993 menunjukkan jumlah mereka telah meningkat lebih daripada 42,000 orang dan merupakan suku kaum Orang Asli yang terbesar jumlahnya. Mereka hidup bermasyarakat. Sebuah kampung biasanya terdapat di antara 60 hingga 300 penduduk yang diketuai oleh seorang Penghulu atau "Batin" yang dilantik dari golongan berpengaruh seperti pawang, bomoh dan ketua adat.

2. SOSIO BUDAYA

2.1 Pemilihan Ketua

Dahulu seorang ketua dipilih daripada orang yang sangat berpengaruh, mengetahui adat resam masyarakat dan berilmu seperti pawang. Biasanya ia disandang hingga turun temurun. Walau bagaimanapun keadaan berubah mengikut peredaran masa. Beberapa faktor tambahan telah diambil kira sebelum perlantikan dilaksanakan, di antaranya ialah:

- mempunyai ilmu kebatinan
- berkebolehan berinteraksi dengan masyarakat luar.
- bertanggungjawab
- aktif
- bersikap perihatin
- penyabar
- pengesahan oleh kerajaan.

Penghulu / Batin bertanggungjawab dalam menentukan sistem adat, mentadbir kampung dari segi pembangunan dan keselamatan. Beliau juga bertanggung jawab ke atas perhubungan dengan masyarakat luar dan agensi kerajaan.

2.2 Mencari Jodoh

Pada masa dahulu jarak di antara satu perkampungan dengan satu perkampungan sangat jauh. Perjalanannya memakan masa di antara 4 hingga 6 hari berjalan kaki.

Seorang teruna yang ingin mencari jodoh akan merantau ke tempat lain. Setelah bertemu gadis idaman hati yang sesuai untuk dijadikan teman hidup, maka ia

pun akan bermalam di situ setelah mendapat persetujuan orang tua gadis tersebut. Biasanya kehadiran pemuda itu amat difahami oleh ketua keluarga tersebut.

a) Pelawaan

Apabila senja menjelang, si bapa akan menyuruh anak gadisnya membentangkan tikar di tempat tidurnya. Kemudian teruna tersebut akan dipelawa oleh bapa gadis tadi untuk memilih tempat tidur yang disukainya.

b) Persetujuan pemuda

Sekiranya si teruna berkenan dan bersetuju untuk menjadikan gadis tersebut sebagai teman hidupnya, maka beliau akan terus memilih tempat yang disediakan oleh gadis tadi. Pada malam itu juga mereka akan tidur bersama dan disahkan sebagai suami isteri.

c) Tidak setuju

Jika seteruna tidak bersetuju dengan gadis berkenaan ia akan memilih tempat tidur yang jauh di satu ruang yang berasingan dari tempat yang telah disediakan oleh gadis berkenaan. Walau bagaimanapun siteruna akan memberi alasan-alasan yang munasabah agar tidak menimbulkan salah faham di pihak gadis.

d) Jika anak gadis lebih dari seorang

Sekiranya ia mempunyai anak gadis lebih dari seorang, seperti biasa apabila senja menjelma, sibapa akan menyuruh anak-anaknya menyediakan dan membentangkan tikar tempat tidur mereka masing-masing. Kemudian ia akan menjemput teruna tersebut memilih tempat tidur. Sekiranya pemuda tersebut berkenan kepada salah seorang anak gadis itu, ia akan memilih tempat tidur gadis pilihannya. Kalau kesemuanya tidak sesuai, pemuda berkenaan akan tidur di ruang tamu.

e) Dipertemukan (kahwin)

Upacara persandingan tidak dilangsungkan. Perkahwinan kedua-duanya tidak memerlukan waris. Bapa si gadis adalah bertanggung jawab sebagai wali dan ibu mas.

f) Kriteria menantu lelaki pada masa dahulu

Pada masa dahulu pemilihan anak menantu lelaki adalah berdasarkan beberapa kriteria seperti berikut untuk menjamin masa depan anak gadisnya.

- Rajin dan kuat bekerja seperti menebang pokok dan membuka ladang buka.
- Pandai membina rumah untuk diri sendiri dan kedua-dua ibubapa.
- Rajin dan pandai membuat jerat binatang dan menangkap ikan dengan bubu dan sebagainya.
- Murah rezeki apabila berburu atau menangkap ikan, (beryas,bersenglug).

- Pandai menganyam nyiru dan juga pandai membuat “perdah” (mengikat rotan dan payu beliung).
- Mempunyai ilmu, jika tidak menjadi bomoh pun tetapi boleh menjampi, dan mengasap kemenyan anak sendiri apabila demam.
- Mempunyai tingkah laku yang baik

g) Kriteria menantu perempuan

- Rajin ke ladang menggali ubi dan mengutip sayuran.
- Rajin mengambil air dan mencari kayu api.
- Rajin memasak nasi atau ubi kayu dan lain-lain.
- Pandai menganyam tikar.
- Menjamu tetamu yang singgah sementara
- Mengagih-agihkan makanan yang diperolehi suami kepada mertua.
- Pandai menampi padi.
- Pandai menjaga suami dan mengasuh anak-anak.

h) Hukuman pada zaman dahulu

Seseorang yang melakukan kesalahan akan menerima hukuman denda yang berbentuk material kepunyaan pesalah tadi. Contohnya seperti berikut:

Denda ke atas lelaki

1. Jex (beliung)
2. Buluh sumpitan
3. Tabung sumpitan
4. Pal Dog (sudip racun ipoh)
5. Jeleg
6. Salek (raga rotan)
7. Parang
8. Lain-lain barang

Denda ke atas perempuan

1. Selampit
2. Pacaq (sanggul buluh)
3. Paciq
4. Tapong (dompit duit)
5. Kampit
6. Tikar
7. Sumpit
8. Lain-lain barang.

2.3 Adat Perkahwinan

Biasanya seorang teruna dan gadis yang telah mencapai umur di antara 17 hingga 18 tahun mula mencari pasangan hidup. Kelazimannya penyatuan mereka sama ada pilihan keluarga atau pilihan sendiri (suka sama suka). Penyatuan ini dilakukan mengikut proses adat istiadat yang telah ditetapkan seperti berikut:-

a) Merisik (berkenalan)

Setelah kedua-dua pihak bersetuju untuk berkahwin, mereka akan ditemukan dalam satu pakatan sulit antara pihak lelaki dan pihak perempuan.

b) Istiadat Meminang

Pihak lelaki akan menghantar alat adat meminang kepada pihak perempuan. Alat-alat berkenaan seperti berikut:

<u>Sebutan adat</u>		<u>Alat/banyaknya</u>
• Salin tiga	-	sepasang persalinan pakaian pengantin perempuan. Warna sebarangan tanpa corak.
• Belanja tubuh	-	wang RM60.25
• Selendang	-	1 helai
• Cincin perak	-	1 bentuk
• Sirih Pinang	-	1 tepak (digunakan waktu memulakan perbualan semasa meminang)

c) Tanggung Nafkah

Ketika masih dalam alam pertunangan pihak lelaki dikenakan Tanggung Nafkah bakal pengantin perempuan mengikut syarat-syarat yang ditetapkan dan dipersetujui bersama seperti berikut:

- Wang tunai sebanyak RM15.00 sebulan
- Jika material; barang-barang makan dihantar ke rumah pengantin perempuan.

d) Bertunang

Melalui proses pertunangan pihak lelaki dikehendaki menyediakan alat-alat berikut kepada bakal pengantin perempuan untuk digunakan pada hari perkahwinan:

- kelamin - 1 buah.
- kelambu bantal/tilam - lengkap satu set.
- salin tiga - sepasang salinan pakaian pengantin lengkap berwarna tanpa corak.
- kasut pengantin perempuan - 1 pasang.

Pihak lelaki juga dikehendaki membuat persiapan diri seperti berikut:

- kupiah/songkok (hitam) - 1 buah.
- kain selempang dada/selendang - 1 helai.
- pakaian melayu (lengkap - bersamping) - 1 pasang
- kasut - 1 pasang.

e) Hari Perkahwinan

Sebelum bersanding, kedua-dua pengantin dikenakan adat-adat berikut:

- Berinai di rumah masing-masing.
- Bergandik bagi pengantin perempuan.
- Gunting rambut bagi pengantin lelaki.
- Mandi limau (wajib) - kedua-dua pengantin diarak dan
- dimandikan limau (berjampi) untuk mengelakkan malapetaka.

Selepas itu kedua-dua pengantin akan dihias dengan pakaian cantik. Pengantin perempuan akan memakai pakaian salin tiga yang disediakan oleh pihak lelaki. Pihak lelaki akan berhias di rumah yang berasingan.

f) Keberangkatan pengantin lelaki ke rumah pengantin perempuan

a) Istiadat Berarak.

Pengantin lelaki diapit oleh ibu wali dan waris-waris diarak berjalan kaki ke rumah pengantin perempuan. Jika pengantin lelaki berketurunan anak penghulu atau batin, ia akan dijulung hingga ke rumah pengantin perempuan. Perarakan tersebut diiringi muzik biola, paluan rebana, paluan gong, serta mereka berbalas pantun.

Sementara itu, pengantin perempuan menunggu ketibaan pengantin lelaki di atas pelamin.

b) Merenjis/Menabur bertih

Hujung atap di bahagian pintu biasanya ditudungi daun pisang (cucur atap). Setibanya pengantin lelaki di muka pintu, sebelum dibenarkan naik tangga, air direnjis di atas daun pisang dan bertih ditabur. Pengiring-pengiring dengan serentak menyebut selamat kepada pengantin lelaki sebanyak tiga kali. "Selamat...., Selamat... Selamat....".

c) Memohon Tanda

Muka pintu biasanya dihadang dengan tirai kain. Di sebalik tirai inilah Ibu mas wali menunggu ketibaan pengantin lelaki dan rombongannya. Ibu Mas Wali akan memohon Tanda sebagai kebenaran masuk ke perkarangan pelamin. Kebenaran hanya diberi setelah permohonan dibuat sebanyak tiga kali. Permohonan tersebut kadang kala dalam bentuk pantun. Ibu Wali dan rombongannya memberi tanda sebilah keris sebagai tanda bahawa yang diarak masuk itu adalah pengantin lelaki yang sebenarnya.

d) Bersanding

Selepas menerima tanda masuk, Mas Wali akan membuka tirai di mana pengantin perempuan sedang menunggu di atas pelamin. Pengantin

lelaki yang diiringi oleh pengapit-pengapitnya dibawa duduk di sisi sebelah kanan pengantin perempuan. Istiadat menyuap Nasi Kuning/ Nasi Damai dan Makan Sirih akan disempurnakan. Upacara ini disaksikan oleh kedua-dua belah wali dan saudara mara terdekat.

Kedua-dua mempelai akan meneruskan persandingan di halaman rumah untuk memenuhi permintaan ramai yang belum puas menatap wajah pengantin.

2.4 Menyembah (Menerima nasihat)

Kedua-dua pengantin akan dibawa naik ke rumah untuk istiadat seterusnya.

Istiadat menyembah wali wakil, ibubapa mertua dan waris-waris.

Pengistiharan adat resam nikah kahwin.

Membenteng belanja dalam adat:

- belanja hangus RM100.00 (+belanja tambahan kenduri).
- belanja tubuh 60 tengah 3 (dalam adas atau kering).

(dalam adat - belanja tubuh dibayar separuh)

(kering - dibayar sepenuhnya iaitu tidak berhutang)

Nasihat-nasihat tentang kerukunan hidup berumahtangga dan seterusnya dengan membentangkan adat istiadat di hadapan kedua-dua wali, maka perkahwinan yang dijalankan ini telah sah daripada segi adat istiadat kaum Semai.

2.5 Pantang Larang Pengantin

Oleh kerana kedua-dua pengantin telah mandi limau (dijampi) sebelum ini, maka mereka dikehendaki mematuhi syarat pantang yang dikenakan seperti berikut:

Dalam tempoh 3 hari mereka tidak dibenarkan keluar rumah kecuali mandi dan ke tandas.

Dalam tempoh 7 hari tidak dibenarkan keluar daripada kawasan kampung kerana takut diganggu segala hantu dan syaitan.

2.6 Majat Badan

Seorang pemuda yang telah memikat gadis pilihannya akan bermalam dan tidur bersama dengan gadis berkenaan tidak kurang dari 3 malam hingga 6 malam atau lebih. Keadaan inui akan berterusan sehinggalah kedua-dua pemuda dan gadis telah mencapai kata sepakat untuk menjadi suami isteri. Pada akhirnya kedua-dua belah ibubapa merestui perhubungan itu. Setelah kata sepakat dicapai oleh pasangan terlibat, pada malam akhir pemuda tersebut tidur dengan gadis berkenaan sehingga pagi. Kaedah ini dinamakan Majat Badan atau tubuh kerana pemuda dan gadis tidur bersama sehingga ke pagi. Pihak keluarga perempuan akan mengemukakan beberapa soalan untuk mendapat kepastian tujuan pasangan ini melakukannya.

Kemudian pihak waris perempuan akan memaklumkan kepada waris pihak lelaki untuk perbincangan penyatuan pasangan terbabit. Tempoh penyatuan mereka mengambil masa yang tidak lama iaitu tujuh hari. Pada hari ketujuh barulah mereka disatukan tanpa ada upacara besar-besaran.

2.7 Majat Barang

Cara perhubungan dan penyatuan adalah sama. Kelainannya hanya pada malam terakhir pihak lelaki akan meninggalkan barangnya (barang-barang kemas/pakaian) kepada gadis yang ditidurnya untuk diserahkan kepada orang tua gadis itu. Hanya dengan barang kepunyaan lelaki ini sahaja pihak perempuan akan menghantar songkok atau kupiah sebagai tanda panggilan adat yang di bawa oleh waris perempuan. Kedua-dua pihak akan di pertemukan dalam satu majlis perjumpaan dengan Ketua Adat bagi membincangkan kedudukan pasangan berkenaan. Keputusan akan dibuat sama ada pasangan ini akan dinikahkan dalam tempoh sebulan atau lebih. Upacara perkahwinan ini sama dengan proses bertunang cuma barang hantaran/persalinannya tidak ada.

2.8 Tangkap Basah

Perkahwinan yang dilakukan melalui tangkap basah dianggap kurang baik di kalangan Orang Semai. Kejadian ini tidak semestinya berakhr dengan perkahwinan. Ini terpulang kepada keadaan pasangan dan situasi kejadian. Insiden ini biasanya berlaku semasa menyambut hari perayaan atau kenduri kahwin di mana sebelah malamnya ada keramaian. Pasangan ini ditangkap basah di tempat-tempat yang sunyi dan gelap oleh pihak waris perempuan.

Sekiranya kedua-dua pasangan tidak mahu berkahwin atau pihak Ibu Mas atau Pembela Kain Basah tidak bersetuju dengan pilihan anaknya, mereka akan menolak. Mereka akan membayar denda kepada mana-mana pihak yang tidak bersetuju. Setelah keputusan dicapai dalam perbicaraan yang dijalankan oleh ketua adat pada hari berikutnya, denda akan dibayar mengikut adat kampung di mana berlakunya insiden tersebut. Jika keputusan baik dicapai, kedua-dua pasangan akan dikahwinkan dalam tempoh tujuh hari setelah melalui proses istiadat yang sepatutnya. Mereka hanya diraikan dalam satu majlis ringkas tanpa mengadakan majlis keramaian sebelah malamnya.

2.9 Istilah Dalam Perkahwinan

a) Wali.

Wali ialah orang yang memainkan peranan penting dalam hal ehwal pernikahan. Keuda-dua wali lelaki dan pihak wali perempuan dimestikan hadir dalam majlis tersebut. Tanpa kehadiran mereka, istiadat perkahwinan dianggap sebagai tidak sah.

i) Wali Pihak Lelaki

Dikenali dengan panggilan Ibu Wali. Mereka terdiri dari empat orang adik

beradik berpangkat datuk kepada bakal pengantin lelaki. Yang tua sekali menjadi Ibu Wali dan tiga orang sebagai pengikut.

ii) Wali Pihak Perempuan

Dikenali dengan panggilan Mas Wali. Mereka ini terdiri empat orang adik beradik berpangkat datuk kepada bakal pengantin perempuan. Yang tua sekali menjadi Mas Wali dan yang lain menjadi pengikut. Oleh yang demikian ibubapa kedua-dua pengantin tidak memainkan peranan penting dalam adat perkahwinan anak mereka. Dalam adat Orang Semai kedua-dua ibubapa dikenali sebagai Pembela Kain Basah.

3. KELAHIRAN

Semasa mengandung, suami dan isteri akan mematuhi pantang larang dan menjaga pemakanan mereka. Perkara-perkara yang dilarang ialah:

- Mendekati binatang-binatang yang boleh memudaratkan kandungan dan bayi dalam kandungan. (kura-kura, beruk, ular).
- Kaum bapa tidak dibenarkan memasang, memaku (rumah)
- Tidak dibenarkan menghampiri orang mati
- Tidak dibenarkan memakan daging rusa, kancil, babi, ayam hutan dan lain-lain kecuali dijampi terlebih dahulu.
- Dilarang makan pisang yang patah tengkuk.

Bagi menentukan tarikh kelahiran dan kandungan sihat, siibu akan menemui bidan di kampung berkenaan. Apabila tiba masa kelahiran semua jiran wanita akan diberitahu. Di sini bidan memainkan peranan utama. Beliau akan bersama ibu hingga bayi selamat dilahirkan. Di samping itu juga beliau akan menyediakan air mandian bayi dan sembilu buluh yang telah diikat dengan kain hitam serta dijampi bagi tujuan memotong pusat bayi. Selepas bersalin ibu tersebut akan berpantang selama sebulan.

Semasa dalam pantang ibu berkenaan tidak dibenarkan memakan sayur-sayuran, ikan yang berbisa dan tidak tersisi, cili, minyak masak dan kelapa, air sejuk kecuali air kopi atau air suam. Mereka cuma makan nasi berlaukan ikan panggang atau digoreng tanpa minyak. Ibu tidak dibenarkan mandi air sejuk. Selepas habis pantang ibu tersebut boleh mandi di sungai dengan syarat ditangkal terlebih dahulu. Alat-alat atau bahan yang diperlukan ialah:

- Sedikit batu-batu kecil
- Kunyit tirus
- Tepung dari beras yang digiling (mengikut setengah daerah)

Bahan tersebut akan dijampi dan ibu berkenaan akan mengunyah separuh hancur kunyit tirus berkenaan dan disembur ke kaki dan sungai tersebut. Manakala batu-batu kecil tadi di tabur ke hulu dan ke hilir sungai. Selepas itu barulah ibu berkenaan boleh mandi dan mencuci lampin anaknya di sungai.

3.1 Mandi Putus Ubat

Selesai pantang, bayi berkenaan akan dimandikan dengan air daun dan bunga-bunga yang wangi yang dijampi dan diperam semalaman untuk pemutus ubat.

Bahan-bahan untuk tujuan ini:

- | | | |
|---|---|---|
| a) Daun lebak hutan muda yang dicarik-carik. | } | Dimasukkan ke dalam buluh/buyung |
| b) Daun-daun wangi dan duit syiling melebihi 25 sen | | |
| c) Bunga kemboja, bunga melor, bunga rose china dan lain-lain bunga yang wangi. | | |
| d) Sejenis akar (cincog) buluh/buyung | | |
| e) Buyung/buluh dua ruas | } | Untuk mencorakkan buluh dengan berbagai corak |
| f) Bedak buku | | |
| g) Buah kesumber | | |
| h) Arang campur minyak | | |
| i) Kemenyan | | |

Apabila bahan ini telah disediakan, bomoh atau bidan yang terlibat akan menjampinya. Pada keesokan harinya kemenyan akan dibakar dan diasap pada buluh berkenaan dan juga bayi tersebut. Kemudian buku buluh ditebuk dan anak berkenaan pun dimandikan. Di samping itu, bidan memohon restu semoga bayi berkenaan selamat dan tidak diganggu oleh hantu/syaitan. Dalam upacara ini, ibu bayi berkenaan tidak dibenarkan berpanas atau berdiang (matahari/palang api), luka, jatuh dan mengupas benda-benda yang mengeluarkan cahaya putih (ubi kayu) selama tujuh hari.

3.2 Mandi Bidan (Buang Banir)

Seorang ibu yang telah bersalin masih dianggap berhutang dengan bidan yang menyambut kelahiran bayi. Sebagai membayar hutang, beliau akan membuat "mandi bidan". Dalam perkara ini ibu tersebut perlu menyediakan bahan-bahan seperti mandian pemutus ubat dengan tambahan perkara berikut:

- Kain batik atau terpulang kepada kehendak bidan.
- Wang tunai sejumlah RM1.25
- Hadiah mengikut kemampuan.

Cara memandikannya adalah sama seperti mandi pemutus ubat begitu juga dengan pantang. Bidan berkenaan tidak boleh membuat kerja-kerja di luar rumah dan berpanas selama tiga hingga tujuh hari. Bidan akan jatuh sakit dan tidak akan pulih selagi upacara tersebut tidak dilaksanakan.

4. KEMATIAN

Apabila terdapat kematian di sesebuah kampung biasanya sanak saudara jauh dan dekat akan diberitahu. Penduduk tempatan akan datang menziarahi dan membantu upacara pengkebumian. Ahli masyarakat akan menangguhkan semua kegiatan harian mereka kerana dikhuatiri roh simati akan marah atau menegurnya dan akibatnya orang yang terlibat akan ditimpa malang. Kebiasaannya mayat tidak dikebumikan pada hari kematian dengan tujuan memberi peluang kepada saudara mara simati yang jauh datang memberi penghormatan terakhir.

Pada malam tersebut penduduk kampung akan berjaga di rumah simati sehingga pagi untuk mengelakkan mayat tersebut daripada diganggu oleh hantu atau dilangkah oleh kucing kerana dipercayai boleh menyebabkan mayat tersebut bangun dan mengacau. Api akan dinyalakan di sekeliling rumah untuk mengelak atau menghalau hantu yang menyebabkan kematian itu. Kanak-kanak akan di tangkalkan dengan menconteng arang di kedua-dua belah kening atau kedua-dua belah tapak kaki dan juga pada daun-daun yang dipercayai ditakuti oleh hantu.

Sebelum upacara pengkebumian, mayat tersebut akan dimandi dan dibungkus dengan kain baru atau kain putih dan seterusnya dibungkus dengan tikar, diikat kemas-kemas supaya senang diusung. Liang lahad digali sedalam 1 meter. Mayat dimasukkan ke dalam liang lahat. Sebelum dikambus, tiga kepal tanah bercampur arang yang telah dijampi akan diletakkan di kedua-dua belah telinga dan bahagian dada untuk memutuskan hubungan simati dengan keluarganya. Jika tidak keluarga yang hidup akan jatuh sakit dan boleh membawa mati.

Setelah dikambus, kayu yang diukir (ala kadar) dicacak di atas kubur sebagai penanda dan diikuti dengan upacara meletakkan makanan, minuman, dan rokok yang telah dinyalakan di atas kubur selama enam hari berturut-turut.

Pada hari keenam, kayu yang telah dibakar akan dialih untuk memberitahu simati bahawa dia sudah berada di alam lain. Upacara ini juga dilakukan dalam rumah simati. Setelah masuk hari ketujuh, keluarga serta penduduk kampung akan bergotong-royong menambak atau memadatkan tanah kubur tersebut agar tidak jerlus. Penanda sementara tadi diganti dengan batu nisan yang kekal. Sebelum meninggalkan kubur, makanan, minuman dan rokok akan diletakkan di atas kubur berkenaan. Salah seorang ahli keluarganya akan memegang batu nisan serta memanggil nama simati seolah-olah menggerakkannya untuk menjamu makanan dan minuman, di samping berpesan bahawa perjalanannya ke alam lain adalah selamat dan memohon supaya tidak mengganggu ahli keluarga yang masih hidup.

5. JENIS PERAYAAN

Kaum Semai mempunyai hari perayaan sendiri seperti *Hari Genggulang*/Menyambut Tahun Baru, *Hari Menuai* atau *Menggulung Tahun* dan *Hari Membuka Ladang Baru*.

5.1 Hari Genggulang

Kebiasaannya disambut oleh Suku Kaum Semai yang tinggal di kawasan Perak Tengah, Hilir Perak dan Selatan Perak pada akhir tahun ia itu akhir bulan Disember atau di awal tahun pada bulan Januari atau Februari. Ia merupakan upacara tahunan yang paling meriah dan penuh tradisi. Mengikut Kepercayaan turun temurun Suku Kaum Semai. Hari *Genggulang* diadakan untuk kesejahteraan dan keselamatan kampung. Namun begitu pada masa kini upacara tersebut sudah beransur berubah mengikut peredaran masa.

Perayaan di mulakan oleh pawang atau bomoh dengan mentera dan jampi, "*cenagoh*" untuk memanggil roh, keramat dan penunggu yang dipercayai wujud sejak zaman nenek moyang mereka. Pawang atau bomoh akan melaksanakan upacara tersebut di *balei* (rumah pemujaan) yang telah disediakan dalam satu kawasan khas. Balei ini dihias dengan anyaman daun serdang, mengkuang hutan, bunga-bunga dan lain-lain. Di hadapan *Balei* terdapat dua buah sangkak di mana di kiri kanannya diisi dengan arang untuk membakar kemenyan. Di dalam ruang balei dan di bawahnya dihidang dengan "jamuan hantu" yang mengandungi pulut, wajik periong (sejenis makanan seperti gulai bercampur sayur ubi, keledek, keladi, labu dan abu, pulut kuning dan telur ayam yang sedang diram dan berdarah di dalamnya). Setelah selesai upacara di balei, tok pawang akan mengikat pantang.

Kemuncak upacara adalah di mana setiap penduduk mengadakan kenduri di rumah masing-masing dan orang ramai dipelawa sama. Untuk memeriahkan lagi perayaan itu, ia disambut dengan joget orang asli atau *Modek* dan di setengah tempat mereka menggunakan muzik pengiring. Upacara ini biasanya berlarutan hingga ke pagi hari.

5.2 Menuai dan Menyulung Tahun

Suku Kaum Semai menyambut hari menuai padi dengan mengadakan kenduri pada hari pertama padi dituai. Hari itu merupakan hari yang paling sibuk kerana setiap orang menjalankan berbagai-bagai aktiviti seperti menangkap ikan, memburu, mengutip sayur, menuai, dan menumbuk padi sebagai persediaan untuk kenduri besar.

5.3 Membuka Ladang Baru

Membuat ladang merupakan tugas yang mesti dilakukan oleh Orang Asli kerana ia adalah punca pendapatan mereka. Setiap tahun mereka akan membuka ladang baru untuk mendapatkan makanan. Mengikut kepercayaan setiap hutan tebal, gunung, gaung, bukit, dan anak sungai ada keramat dan penunggu yang boleh mendapatkan bencana atau bala. Oleh itu untuk keselamatan diri dan tapak ladang, mereka akan mengadakan kenduri sebagai menjamu penunggu atau keramat di daerah itu. Kenduri ini biasanya diiringi oleh sewang di waktu malam hingga ke siang hari.

6. ADAB DAN TERTIB

6.1 Tertib Semasa Makan

Semasa makan suku kaum Semai tidak dibenarkan melakukan sesuatu perbuatan yang boleh mengganggu suasana sedang makan, seperti bercakap, meninggikan suara, bertengkar, menyanyi, bersiul, dan makanan bersepah kerana dikhuatiri semangat makanan akan hilang dan sukar mencari rezeki. Ia juga boleh menyebabkan orang yang sedang makan tercekek tulang. Kaum Semai tidak membenarkan mengucap perkataan bales ia itu mengejek jenis-jenis makanan yang dimakan kerana dikhuatiri berlakunya cirit-birit. Kaum Semai sentiasa duduk bersila (bagi lelaki) dan bersimpuh (bagi perempuan) ketika sedang makan.

6.2 Tertib Perbualan

Apabila memulakan perbualan, suku bangsa Semai biasanya menggunakan panggilan yang sesuai mengikut peringkat usia. Contohnya apabila orang muda bercakap dengan orang yang lebih tua, mereka menggunakan panggilan enjen. Sebagai isyarat memulakan perbualan, kebiasaannya kaum Semai menjamu (memberi) rokok, sirih, tembakau di tempat-tempat tertentu seperti di rumah atau semasa dalam perjalanan. Orang tua menggunakan panggilan bei, chong, nyam (untuk panggilan bagi kanak-kanak lelaki) dan embong (bagi kanak-kanak perempuan).

6.3 Tertib Perbualan Suami Isteri

Suami isteri mestilah menggunakan panggilan yang sesuai dan membawa makna hormat seperti Heei. Suami isteri dilarang memanggil nama masing-masing kerana dikhuatiri menjadi ikutan kepada anak-anak mereka. Perbuatan seumpama ini dianggap tulah kepada ibu bapa. Apabila pasangan suami isteri meningkat usia maka panggilan itu akan ditukar mengikut nama anak pertama contohnya bagi kent long anak lelaki.

6.4 Tertib Semasa Berjalan

Kaum Semai tidak boleh serenlong (berjanji untuk ikut sama ke sesuatu tempat, tetapi, ia mungkir). Jika perjanjian hendak dibatalkan, mereka harus mengatakan sersar serenlong. Pantang larang ini amat ditakuti oleh mereka kerana ia boleh mendatangkan sesuatu perkara yang tidak baik.

6.5 Tertib Bertanya

Ketika kaum Semai sedang membawa alat-alat buruan mereka tidak boleh ditegur sapa kerana ia dianggap sial kepada binatang buruannya. Jika berjumpa ketika dalam perjalanan bolehlah memulakan dengan panggilan menong heei atau nu belok heei yang membawa makna hendak ke mana atau pun selepas percakapan mengucapkan aboor hek yang bermaksud sejahteralah kamu.

6.6 Bertandang (berkunjung)

Apabila mengunjungi sesebuah rumah suku bangsa Semai, terdapat beberapa isyarat yang perlu diperhatikan yang membawa makna tertentu. Sekiranya rumah yang akan dikunjungi itu tidak mempunyai isyarat tertentu maknanya orang yang mengunjungi rumah itu tidak boleh terus naik, tetapi hendaklah memberi isyarat seperti batuk-batuk supaya tuan rumah menyedari kehadiran tetamu tersebut. Tetamu hanya boleh masuk ke rumah hanya setelah dipelawa oleh tuan rumah. Kasut hendaklah ditanggalkan.

Semasa masuk ke dalam rumah, tetamu hendaklah mengikut arahan tuan rumah yang akan menentukan tempat duduk tetamu sama ada di tengah rumah atau di tepi pintu. Sekiranya rumah atau kampung yang akan dikunjungi mempunyai tanda pantang, maka tetamu haruslah tidak melepasi tanda tersebut. Tetamu harus menyedari bahawa rumah tersebut sedang berpantang. Tetamu haruslah menunggu sehingga penghulu membenarkan tetamu masuk ke rumah atau kampung tersebut.

7. KEHIDUPAN HARIAN SUKU KAUM SEMAI

Pada suatu ketika dahulu kehidupan kaum Semai sama seperti Orang Asli yang lain di negara ini iaitu hidup secara nomad. Mereka berpindah dari satu tempat ke satu tempat lain di dalam hutan kerana mencari tempat baru untuk berladang atau pun berpindah atas sebab-sebab kematian, diganggu oleh orang luar, binatang buas dan wabak penyakit hawar. Secara tradisinya mereka hidup dalam kumpulan kecil yang terdiri daripada 10 hingga 50 kelamin.

Ketua keluarga atau orang tua dalam keluarga tersebut bangun lebih awal untuk menghidupkan api bagi memanaskan badan dan memasak makanan seperti merebus ubi kayu untuk bekalan ke ladang, ke hutan dan sebagainya. Kebiasaannya awal pagi lagi, mereka telah meninggalkan rumah menuju ke destinasi masing-masing.

Mereka mengamalkan ekonomi tradisional berasaskan pertanian sara diri. Padi huma, sekoi, jagong, ubi kayu, pisang, keladi dan berbagai jenis sayur-sayuran seperti labu, kacang panjang, timun, kacang bendi adalah hasil tanaman mereka. Kaum Semai mengamalkan sistem bertukar-tukar bahan makanan, perkhidmatan dan keperluan lain secara berkongsi. Tidak ada urusan jual beli dilakukan. Sistem ekonomi cara ini akan mengeratkan lagi silaturahim dan semangat setia kawan di samping mewujudkan kemesraan di kalangan mereka.

Memburu dan menangkap ikan merupakan sebahagian daripada aktiviti yang dilakukan kaum ini. Aktiviti memburu biasa dilakukan oleh lelaki sahaja.

Peralatan memburu seperti buluh sumpit, jerat, belantik dan perangkap mudah diperolehi di dalam hutan. Antara jenis-jenis binatang yang diburu ia lah monyet, kera, babi hutan, burung, biawak, tupai dan binatang kecil yang lain. Ikan adalah sumber utama protin. Ia ditangkap dengan menggunakan lukah, kail, racun akar tuba, serampang, jaring, tuar, dan juga dengan tangan. Pekerjaan ini dilakukan oleh kaum lelaki dan perempuan. Hasil seperti rotan, damar, buluh, cendana dan gaharu akan

dijual. Mereka pulang pada waktu tengah hari atau petang.

Pada waktu petang sebelum senja, mereka berehat di rumah atau ke hutan menyambung pencarian rezeki seperti memburu, menyumpit di kawasan yang terdekat atau melihat hasil jerat yang telah dipasang.

Pada waktu malam, mereka biasanya berada di rumah duduk berbual-bual tentang ladang, memburu dan sebagainya. Setengahnya membuat damak, mencuci buluh sumpit atau membuat persediaan peralatan untuk esok harinya. Walau bagaimana keadaan ini mungkin telah berubah mengikut peredaran masa. Kini ramai kaum Semai yang telah bekerja dengan kerajaan, swasta dan berniaga seperti di kedai runcit dan kraf tangan.

8. TEMPAT KEDIAMAN

Terdapat empat jenis tempat kediaman kaum Semai;

- "Rumah Yeau" (Deg yeau)
- "Rumah Ran" (deg Ran)
- "Rumah Pisang Sesikat" (Deg Pisang Sikat)
- "Rumah biasa"

8.1 Rumah Yeau

Rumah yeau dibina untuk menunggu padi yang masak dan mengelakkan gangguan makhluk perosak seperti burung pipit, belalang, tikus dan sebagainya. Biasanya dari rumah yeau ini dipasang tali ke kawasan ladang dengan objek-objek seperti tin yang digantung, baju kain yang diikat pada batang kayu yang apabila ditarik akan membunyikan tin atau mengerakkan bahan yang digantung untuk menakutkan makhluk perosak tersebut. Bahan-bahan yang di gunakan ialah empat atau enam batang tiang, atap dari daun bertam atau serdang, beberapa batang rotan direnggang ke kawasan ladang untuk menggerakkan objek dan lantai batang bertam/batang kayu disirat dan diikat dengan rapat.

Bentuk rumahnya sama seperti rumah pisang sesikat cuma yang membezakan dari segi tiang dan lantai. Rumah Yeau tinggi dari tanah. Penggunaan rumah yeau bergantung kepada padi masak untuk dituai. Selepas padi masak rumah yeau tidak digunakan lagi dan akan dibina di musim akan datang.

8.2 Rumah Ran

Rumah ran dibina di atas pokok supaya selamat daripada binatang buas seperti harimau, gajah, beruang dan sebagainya. Rumah ran dibuat untuk mencari rotan, menunggu padi, memburu dan menunggu buah.

Untuk membuat rumah ran beberapa batang kayu disambung ke dahan-dahan kayu sebagai tokok tambah kepada dahan-dahan yang sedia ada. Atap diperbuat

daripada bertam atau pun serdang. Lantai diperbuat daripada buluh, kayu dan diikat dengan rotan. Rumah ini digunakan pada musim buah-buahan sebagai tempat persinggahan. membuat ladang dan memburu binatang. Ia digunakan hanya pada masa-masa tertentu sahaja.

Rumah ran tidak ada bentuk khas kerana ia bergantung kepada keadaan semula jadi daun-daun kayu dan cuma ditokok tambah yang tidak dibentuk sesuka hati.

Tidak ada tempoh yang tetap, bergantung kepada tujuan dan cara rumah ran itu dibina. Jika kegunaannya untuk rumah persinggahan maka ianya dibina daripada bahan-bahan yang tahan lama dan lebih kemas. Tetapi jika untuk sementara ianya dibuat secara ala kadar sahaja.

8.3 Rumah Pisang Sesikat

Rumah pisang sesikat biasanya dibina di tepi-tepi sungai, ladang atau pun di dalam hutan sebagai tempat berteduh daripada hujan dan panas. Rumah pisang sesikat dibina dengan menggunakan dua batang tiang manakala atapnya pula daripada daun bertam atau daun serdang. Lantainya dari pokok bertam atau buluh yang dibelah atau dari batang kayu kecil yang diletakkan di atas tanah. Rotan atau akar digunakan sebagai bahan untuk mengikat.

Bentuk rumah pisang sesikat ialah empat segi dan atapnya mencerun dari atas sampai ke permukaan bumi. Kekerapan penggunaannya bergantung kepada tujuan ia dibuat. Jika dibina di ladang, ianya selalu digunakan tetapi jika di tepi sungai ia digunakan ketika mencari ikan atau sebagai tempat persinggahan sementara. Jika ianya dibina di dalam hutan, ia digunakan sebagai sebagai tempat berihat setelah penat bekerja mencari rotan, petai, buah-buahan, menyempit dan sebagainya.

8.4 Rumah Biasa

Mempunyai berbagai-bagai bentuk terpulang kepada kreativiti seseorang individu tetapi kebiasaannya rumah dibina dalam bentuk segiempat dan di tambah sedikitanjung untuk dapur. Bentuk ini hampir sama dengan rumah tradisi orang Melayu di Malaysia.

Tiang rumah diperbuat daripada kayu bulat. Atap dan dindingnya daripada daun bertam dan serdang. Rotan digunakan untuk mengikat. Manakala lantainya pula daripada pokok bertam, buluh, kayu yang telah dibelah (papan).

Kehidupan di masa silam dipengaruhi oleh keadaan persekitaran di mana rumah atau tempat kediaman hanya digunakan sebagai tempat untuk berihat atau tidur sahaja dan tidak timbul persaingan untuk membina rumah yang cantik dan selesa. Ini disebabkan hanya bahan-bahan tersebut sahaja yang ada dan cara hidup mereka yang sering berpindah randah.

Walaupun bagaimanapun rumah kaum Semai telah banyak berubah mengikut peredaran masa yang telah menukar corak budaya mereka. Kaum Semai sekarang telah menetap di satu tempat, mempunyai perkampungan, tanah bergezet, bercucuk tanam dan mempunyai rumah yang agak cantik dan selesa bergantung kepada kewangan masing-masing.

9. KEPERCAYAAN DAN PANTANG LARANG

Suku Kaum Semai amat percayai akan kewujudan kuasa ghaib seperti kuasa:

- a) *Nyenang* (Tuhan)
- b) *Nyanik* (hantu dan syaitan)

9.1 Kuasa Nyenang

Nyenang merupakan makhluk yang tidak dapat dilihat, disentuh atau sebagainya dan ia dipercayai wujud di kalangan kaum Semai. Oleh kerana setiap keburukan dan kebaikan yang manusia lakukan pasti ada balasannya. Ianya dianggap sebagai makhluk yang teragung dari sekelian makhluk, mempunyai sifat pengasih, penyayang serta berkuasa. Orang Semai juga percaya bahawa semua kehidupan di dunia ini tertakluk di bawah kuasa *Nyenang*. Walaupun tidak diketahui di mana *Nyenang* berada tetapi tetap ujud di atas manusia dan bumi ia itu di atas langit. Kepercayaan terhadap *Nyenang* menyebabkan kaum Semai takut untuk melakukan kesalahan yang boleh mengakibatkan *tengahak* (dosa) kerana yang bersalah akan menerima akibatnya dari *Nyenang*.

9.2 Nyanik

Nyanik amat ditakuti oleh Orang Asli kerana *Nyanik* dipercayai boleh menyebabkan seseorang itu sakit dan boleh membawa maut, juga dipercayai simati akan menjadi makanan *Nyanik* kerana *Nyanik* adalah makhluk yang jahat. Terdapat banyak *Nyanik* dan di antaranya ialah:

Nyanik Keramat
Nyanik Pechoch (penunggu)
Nyanik Ratah
Mai Tepas (bunian)
Ludat

9.3 *Nyanik* Keramat

Dipercayai mempunyai kuasa di satu-satu daerah atau tempat. *Nyanik* Pechoch dan *Nyanik* Ratah ada di bawah kuasa atau pengawasannya. Orang Asli Semai sentiasa meminta pertolongan dan perlindungan keselamatan dari semua jenis wabak penyakit serta bencana alam. Permintaan ini dilakukan pada tiap-tiap tahun melalui pawang di mana upacara ini dinamakan *gengulang*.

9.4 Nyanik Pechnoch (penunggu)

Dipercayai Nyanik ini menjadi penunggu atau penghuni sesuatu benda. Contohnya pokok besar dan redang. Pokok-pokok yang menjadi kegemaran Nyanik ini ialah Pulau, Gelutong, Jawi, Terap, Sena dan sebagainya. Manakala benda-benda lain ialah busut, lubuk,tasek, batu besar dan tinggi, bukit, gunung serta rumah yang ditinggalkan. Nyanik jenis ini dianggap sebagai pengganggu manusia.

9.5 Nyanik Ratah

Terdapat lima jenis Nyanik dalam kumpulan Nyanik Ratah iaitu kicmoc, Mai Berlag, Mat, Mai Cereg Teg dan Mai Cereg Song. Nyanik-Nyanik ini suka menyakat atau mengganggu manusia terutama Nyanik Cereg Soog.

9.6 Nyanik Kickmock

Nyanik ini bergerak waktu malam iaitu bermula di antara jam 8.00 malam hingga 5.00 pagi. Tempat kediamannya di kawasan perkuburan. Sebelum kemunculan dirinya ke penglihatan manusia, ia akan mengeluarkan bau yang wangi. Ia menjelma dengan hanya kelihatan manusia dan kadang kala kedengaran bunyi suara manusia yang parau dan kasar dari arah perkuburan. Menurut kepercayaan Orang Asli Semai, Nyanik ini berasal dari manusia yang telah meninggal dunia.

9.7 Nyanik Mai Berlag Mat

Ia menjelma menyerupai manusia (sedangkan orang itu telah meninggal) kecuali keadaan matanya yang berbeza. Ia tidak mempunyai anak mata kecuali mata putih sahaja. Nyanik ini tidak suka menyakat atau mengusik manusia kecuali manusia akan terkejut atau takut apabila terserempak apabila melihatnya. Ia berada di mana-mana sahaja. Ianya berjalan jika perlu ataupun pada masa-masa tertentu iaitu waktu malam ketika berlaku kematian dan di mana kematian seseorang merupakan makanannya. Salah satu sifat Nyanik ini yang aneh ialah membawa ambong (bakul) yang terbalik ke bawah.

9.8 Jeet

Jeet berasal dari Kickmoch kerana umur Kichmoch terhad sehingga 50 tahun sahaja bermula dari kematian seorang manusia. Apabila umur Kickmoch mencapai 50 tahun, ia akan bertukar menjadi Jeet. Ia bergerak di kawasan tanah perkuburan seseorang. Nyanik ini tidak mencederakan seseorang. Ia cuma memikul manusia yang masih hidup dan akan meninggalkan orang tersebut di atas kubur. Oleh kerana manusia takut kepada Nyanik maka apabila tersedar dan didapati dirinya di atas kubur maka manusia tersebut akan hilang semangat, demam dan seterusnya mati jika tidak mendapat rawatan pemulihan daripada bomoh.

9.9 Nyanik Mai Cereg Soog

Nyanik Cereg Song ini suka menyanyi sama ada ianya berada di tengah tasek atau di atas pokok. Ia menjelma sebagai gadis cantik yang berambut panjang dan apabila menyakat atau mengusik manusia maka manusia tersebut akan menjadi gila dan gila tersebut amat sukar untuk diubati.

9.10 Nyanik Cereg Teg

Nyanik ini suka tinggal di atas pokok pulai, jelutong dan terap. Bentuknya menyerupai siamang, biji matanya berwarna merah terutama apabila terkena cahaya lampu. Ia mengusik atau menyakat mangsanya dengan cara menerkam atau menggoncang pokok tempat di mana ianya menumpang. Ia berbuat demikian supaya mangsanya kehilangan ruai (semangat).

9.11 Mai Tepas (orang bunian)

Mai tepas merupakan makhluk halus yang mana wajahnya menyerupai wajah manusia. Ianya tinggal di bukit-bukit atau di gunung-gunung di hutan atau pedalaman. Makhluk ini tinggal berkumpul atau bermasyarakat. Walau bagaimanapun Mai Tepas ini amat sukar dilihat oleh orang biasa kecuali bomoh atau orang perseorangan yang kebiasaannya Orang Asli yang sering berburu atau mencari rotan di mana bermalam di pedalaman dan terus mengikut makhluk tersebut dan bermalam di pedalaman dan terus mengikut makhluk tersebut dan menyebabkan ianya tersesat. Kesesatan tersebut di sebabkan oleh ajakan makhluk halus berkenaan. Ini menyebabkan orang berkenaan akan hilang terus dari masyarakatnya atau bila kembali ia akan hilang ingatan, letih lesu dan akhirnya sakit dan terus meninggal. Kejadian ini dipercayai ia telah dijadikan oleh makhluk tersebut sebagai ahli keluarganya. Mai tepas tidak memakan manusia tetapi hanya memperdayakannya sahaja.

9.12 Ludat

Ludat tinggal di batu-batu, busut terutama di tempat tinggi dan sejuk. Seperti juga Mai Tepas ia tidak memakan manusia, ia sering merayau-rayau dalam hutan dengan membawa buluh sumpit. Ia mencari rezeki dengan menyempit binatang-binatang atau kehidupan di atas pokok. Ia jarang sekali menyempit atau memperdayakan manusia kecuali jika perlu, maka ia bergerak atau berjalan pada waktu siang.

9.13 Gunig

Gunig bertuankan Mai Halaq (bomoh). Kebiasaan Gunig adalah dari kumpulan Nyanik Ratah, Ludat, Mai Tepas dan lain-lain lagi. Peranan Gunig untuk memujuk Nyanik yang menyebabkan manusia sakit. Gunig boleh memulihkan orang sakit. Bagi Tok Halaq untuk mengubat pesakit, beliau memanggil Gunignya melalui Ramol (berbumbun). Penyakit-penyakit yang boleh diubati oleh Gunig ialah terkena sampuk, hiklang semangat dan lain-lain penyakit yang disebabkan oleh Nyanik.

10 PANTANG LARANG

Perubatan yang dijalankan oleh bomoh atau Tok Halaq secara perubatan tradisional terbahagi kepada tiga cara:

- a) Jampi serapah
- b) Berkebut (berbumbun)
- c) Cara bercagoh

10.1 Pantang Larang Daripada Segi Makanan

- Orang yang sedang menerima rawatan dari Tok Halaq harus mengikut pantang larang yang ditentukan olehnya seperti berikut:
- Dilarang memakan ikan yang mempunyai sengat (berbisa)
- Dilarang memakan rusa, siamang, ayam denak, tenggiling dan sebagainya terpulung kepada penyakit yang dihidapi dan mengikut yang dikenakan pantang oleh tok bomoh.
- Dilarang memakan kunyit, cabai, keladi dan kanan yang berwarna merah.

Jika sekiranya terdapat pesakit yang melanggar pantang larang tersebut, ia akan memudaratkan pesakit dan akan berlaku "*Tekreg*" (pecah pantang) dan boleh membawa maut atau Tok Halaq sendiri akan di timpa sakit yang teruk yang tidak dapat diubati.

Semasa *Tok Halaq* memberi rawatan, orang luar dari rumah atau kampung berkenaan melawatnya kerana ini juga akan menimbulkan *tekreg* juga semasa rawatan sedang dijalankan pesakit tidak dibenarkan menerima rawatan dari *Tok Halaq* yang lain selagi *Tok Halaq* berkenaan belum selesai.

Kepada pesakit yang menerima rawatan tidak dibenarkan membuat kerja-kerja harian kerana dikhuatiri tersentuh benda-benda yang dikirakan pantang. Pantang-pantang tersebut termasuklah:

- Memasuki kain melalui kepala.
- Kepala terantuk kepada satu objek
- Memasuki di bawah ampaiian kain.
- Berdiang di bawah sinaran matahari atau api.
- Mengelakkan diri dari terkejut atau terperanjat.
- Mengelakkan diri dari luka berdarah.
- Mengelakkan diri dari memegang benda yang boleh mengeluarkan cahaya putih.
- Contohnya mengupas ubi kayu, melihat cermin dan sebagainya.

Selain dari pesakit orang lain juga dilarang melakukan kerja-kerja yang boleh memudaratkan pesakit contohnya:

- jangan bisng
- mengibas kain
- menghebahkan berita yang boleh mengejutkan atau memeranjatkan.

10.2 Larangan Semasa Membina Rumah Baru

- Kedudukan rumah dilarang menghalang laluan matahari. Jika tidak mengikut peraturan tersebut penghuni rumah berkenaan kelak akan selalu demam dan sakit.
- Dilarang membuat kerja-kerja memasang rumah diwaktu senja dan pada hari-hari yang dianggap tidak baik iaitu bulan 15, 16 dan 17, dipercayai penghuni rumah berkenaan tidak tenteram dan aman.
- Kayu alang dan gelegar serta lain-lain pemasangan hendaklah dipotong mengikut segi rumah tersebut supaya tidak tertinggal lebihan kayu tersebut.
- Tiap-tiap pemasangan perabong atap, penutup gendang hendaklah di pasang pada hari yang sama.
- Sebelum rumah tersebut didiami, rumah tersebut haruslah ditepong tawar dahulu.
- Tetamu pertama yang datang secara bertandang ke rumah tersebut dari kampung/tempat lain dikehendaki bermalam di rumah tersebut, jika tidak ianya akan didenda.

10.3 Pindah Ke Rumah Baru

Bila sebuah keluarga berpindah ke rumah baru, sedikit jamuan, upacara "bersemah" atau tepung tawar diadakan bertujuan untuk menjamu hantu-hantu atau makhluk halus. Jika tidak dilakukan, keluarga yang baru berpindah akan diganggu oleh hantu atau makhluk halus.

10.4 Pantang Larang Dalam Rumah Baru

- Tidak boleh jatuh di dalam rumah yang sedang dalam pembinaan. Kalau jatuh, ini boleh mendatangkan sial atau kurang sihat kepada penghuni rumah tersebut.
- Seseorang yang akan bermalam di rumah yang baru dibina eloklah bermalam sehingga 3 malam, jika kurang boleh mendatangkan perkara yang tidak baik kepada tuan rumah.
- Setiap rumah baru mestilah diadakan kenduri atau ditepong tawar. Jika tidak melakukannya boleh mendatangkan sial kepada pencarian penghuni rumah tersebut.
- Tidak boleh tidur atau pindah ke rumah yang masih belum siap dibina sepenuhnya, kanak-kanak juga dilarang menangis di rumah tersebut. Jika berlaku keadaan itu rumah tersebut tidak akan membawa tuah kepada penghuninya.
- Sebelum rumah dibina, pawang atau bomoh akan menjampi kawasan tersebut untuk menghalau hantu-hantu yang ada. Kalau tidak dibuat, hantu-hantu akan mengganggu penghuni rumah tersebut.
- Bila rumah siap dibina, "Tiang Seri" rumah itu mesti dijampi dahulu oleh bomoh atau pawang. Tiang atau sudut rumah akan dipangkah dengan kapur atau bedak yang telah dijampi. Kalau tidak dilakukan, hantu-hantu akan mengganggu penghuni rumah tersebut.

10.5 Pantang Semasa Membuat Ladang Baru

Semasa menjalankan pembukaan ladang baru beberapa larangan perlu dipatuhi:

- Kerja-kerja harus dimulakan hari ke lima, kerana hari lain dipercayai tidak baik dan dilarang sama sekali "yong parong" ini disebut pantang yong (parong).
- Setelah 3 hari memotong pokok hari ke 4 kerja-kerja diberhentikan. Selepas direhatkan sehari iaitu hari ke 5 akan dimulakan kembali, kaedah ini dipanggil "Pantang Jex" (Pantang Beliong).

Perkara di atas dikenakan pantang kerana untuk mengelakkan perkara-perkara yang tidak baik, contohnya ditimpa pokok-pokok atau luka.

Ketika penanaman dimulakan, beberapa pantang larang harus dipatuhi sehingga ke peringkat putus menuai.

- Dilarang mengubah atau mencabut kayu atau tanda-tanda yang dijadikan sempadan antara satu ladang dengan ladang yang lain. Jika ini dilakukan boleh mendatangkan penyakit dan ladang tersebut tidak mendatangkan hasil yang banyak.
- Setelah menugal tiga hari, hari keempat akan diberhentikan. Ianya digelar pantang Pandang Keneh (Kaya Tunggal).
- Pantang Kanch Neck (kaya tunggal yang tidak baik) juga dilakukan pada hari keempat. Pantang ini diamalkan supaya ladang tersebut memberi hasil yang lumayan.

10.6 Kenduri Padi Baru

Pantang ini diamalkan untuk menunjukkan terima kasih kepada semangat padi (Ruai Bag) kerana semangat tersebut telah memberi hasil yang lumayan. Jika sekiranya ada orang luar dari kampung tersebut, orang tersebut hendaklah turut serta sehingga selesai. Jika tidak ia akan didenda dengan istiadat mengikut tok pawang dengan memohon restu dari jermalang tanah untuk memulihkan semangat padi tersebut. Tujuan diadakan kenduri padi baru tersebut ialah:

- Memuja semangat padi supaya rezeki pada tahun-tahun yang akan datang dapat memberi penghasilan yang lumayan.
- Manakala denda pulih Ruai Bag, supaya ladang-ladang yang akan datang, lumayan serta boleh "Mendangkan Penyalut Koul" (simpul urat dan simpul biawak) akibat kemurkaan jermalang tanah dan boleh menjadi lumpuh.

10.7 Pantang Semasa Kelahiran dan Melahirkan

- Anak yang telah dimandikan akan dijampi dan ditangkalkan supaya tidak disampok atau terkena sawan dan diganggu oleh hantu.

- Ibu yang baru bersalin dilarang memakan binatang-binatang dan lauk-lauk yang boleh menyebabkan anaknya terkena penyakit sawan kerana siibu menyusu bayi tersebut.
- Bagi bayi yang baru lahir tidak dibenarkan memuji-muji tentang kegemukan dan kecantikannya.
- Dilarang meminta untuk dipelihara oleh orang lain. Jika ini berlaku ianya mestilah ditukarkan dengan benda lain, supaya semangat bayi tersebut tidak hilang.
- Di bawah rumah sentiasa dihidupkan unggun api di mana tempat ibu bersalin - ini mengelakkan hantu akan mengacau tempat dimana daerah dan air tuban tumpah. Ini akan mengakibatkan bayi tersebut disampuk hantu dan sakit.

10.8 Pantang Semasa Kematian

- Simati disimpan sehari di rumah.
- Atas mayat diletakkan seketul batu/benda yang berat bagi mengelakkan perutnya kembong.
- Hari berturut-turut unggun api dihidupkan untuk menyedari simati bahawa dia telah berada di alam lain.
- Hari keenam dipanggil "alih palok" (aleh kayu yang dibakar) yang mana roh simati tidak lagi berkeliaran.
- Hari ketujuh keluarga simati akan menambak dan memperkemaskan tanah kubur dan membuat kenduri.
- Tempat dimana simati meninggal dunia, diletakkan makanan dan minuman serta apa sahaja makanan kegemarannya sehingga hari keenam.

Semasa dalam masa berpantang mereka ditegah:

- Bersukaria (menyanyi, bersiol, bersorak-sorak, menjerit dan sebagainya)
- Berpakaian cantik
- Semua jenis kerja ditangguh.

Berkabung menghormati simati dan rohnyanya oleh penduduk tempatan dan pelawat-pelawat yang ada di tempat tersebut.

- Barang dan alat simati - seperti pakaian, alat memburu - tidak boleh digunakan oleh orang lain kecuali harta atau pusaka peninggalan diberi dan dibahagi- bahagikan kepada kaum keluarga.
- Alat-alat pengkebumian - seperti cangkul, parang dan sebagainya tidak boleh dibawa naik terus ke rumah. Barang-barang itu hendaklah direndam dalam air selama satu malam sebelum dibawa naik.
- Orang yang pergi menanam tidak boleh naik turun rumah. Ianya mesti mandi dan pakaian yang dipakai semasa pengkebumian tidak boleh dibawa naik ke rumah.
- Keliling rumah dan di kubur dipasang api selama seminggu. Di kubur apabila api genap seminggu "dipaling" puntungnya. Tujuannya roh akan pergi terus.

- Anak-anak simati hendaklah ditangkal, ini pada yang belum dewasa. Dengan menconteng arang bertanda palang (+) di dahi di dada bertentang dengan jantung, di belakang tapak tangan dan di belakang tapak kaki.
- Pantang dan kepercayaan di atas adalah untuk mengelak hantu daripada mengikut balik ke rumah.

10.9 Pantang Larang Dalam Makanan

- Kebanyakan binatang-binatang hidup di darat tidak boleh dimasak atau dimakan bersama dengan binatang di air, seperti ikan dengan daging kerbau. Jika dilakukan juga boleh mendatangkan penyakit demam kuning, keguguran rambut, batuk darah, sakit paru-paru, kayap dan kudis.
- Sisa-sisa makanan tidak boleh dibawa oleh binatang, semut tidak boleh ditanam atau dihanyutkan di dalam air. Sebaliknya hendaklah dikumpul dan dibakar. Jika tidak, boleh mendapat penyakit dan kembung perut (busung).
- Semua air yang bertakung dalam tin, botol atau tunggul kayu tidak boleh diminum, dilangkah atau didekati, jika dilakukan juga boleh menyebabkan penyakit busung.
- Buah-buahan yang mana pokoknya tumbuh di bawah kayu teras atau yang berapit serta dahan atau batang bertakung air, tidak boleh dimakan. Jika dilakukan juga boleh mendatangkan penyakit.
- Mengeji dan mengata kepada benda makanan seperti ikan dikatakan babi dan lain-lain. Jika dilakukan juga boleh mendatangkan penyakit seperti cirit birit atau kembung perut (busung) yang berpanjangan.

10.10 Pantang Larang Semasa Berjalan Di Dalam Hutan.

- Tidak dibenarkan berjanji kerana jika sekiranya salah seorang tidak dapat pergi maka perjalanan tersebut seharusnya dibatalkan. Jika tidak yang pergi tersebut akan terkena "Serenglog" Contohnya, kemungkinan digigit ular, ditimpa pokok, jatuh dan sebagainya.
- Dalam perjalanan tidak dibenarkan bercakap takbur dengan binatang-binatang buas.
- Pantang menunjuk dan menegur sesuatu yang ganjil.
- Orang Asli sangat takut menunjuk atau menegur kepada sesuatu benda yang ganjil seperti melihat gua-gua yang besar, pokok-pokok yang menyerupai sesuatu bentuk binatang dan sebagainya. Akibatnya daripada menegur atau menunjuk seseorang itu boleh mendapat penyakit atau menjadi cacat pada dirinya.
- Ketawa pada benda-benda atau perbuatan yang menggelikan hati.
- Orang Asli sangat takut ketawa pada binatang. perlakuan yang boleh menggelikan hati seperti beruk, juga manusia yang merupakan dirinya atau bertopeng untuk jenaka, juga katawa kepada kupu-kupu dan cacing. Akibatnya dari melakukan perkara tersebut boleh mendatangkan petir dan ribut yang kuat serta banjir di tempat pantang larang yang tersebut.
- Tempat-tempat binatang buas membunuh manusia tidak boleh ditempuhi atau dilalui. Akibatnya kemungkinan terkena sakit dan mungkin mengigau atau terbayang-bayang binatang itu.

- Dilarang menyebut binatang-binatang buas semasa di dalam perjalanan seperti harimau, gajah, buaya dan lain-lain lagi. Tetapi boleh disebut dengan nama samaran yang boleh disuaikan dengan rupa bentuk binatang tersebut umpamanya harimau digelar pak belang.

10.11 Larangan Membawa Barang-Barang Hutan Ke Dalam Rumah

- Buluh tidak boleh dibawa balik ke dalam rumah bersama-sama daunnya. Dikuatiri akan didatangi binatang buas.
- Rotan tidak dibenarkan dibawa naik ke dalam rumah tanpa digulung terlebih dahulu. Akibatnya akan didatangi oleh binatang buas.
- Daun serai tidak dibenarkan dibawa masuk ke rumah kerana dikhuatiri ular masuk ke dalam rumah.

11. AMALAN KESIHATAN DAN PERUBATAN

11.1 Makanan

Makanan utama masyarakat Semai ialah beras dan ubi kayu. Mereka mendapat sumber protin daripada binatang buruan, ikan, sayur-sayuran, buah-buahan didapati dari ladang dan hutan yang berhampiran. Makanan yang disajikan adalah tertakluk kepada pantang larang makanan disenaraikan.

11.2 Perubatan

Daripada segi perubatan, masyarakat Semai mengamalkan cara berubat sendiri apabila seseorang daripada mereka sakit sama ada dengan menggunakan akar dan daun-daun kayu atau bomoh.

- a) Bagi sakit atau luka-luka herba digunakan secara meluas di dalam masyarakat Semai. Jenis-jenis herba yang digunakan adalah berdasarkan jenis penyakit yang dihadapi. "Slak Selendon", "Slak Mandi Alam", dihancurkan atau ditumbuk kemudian dipupuk di tempat yang luka dan dibalut.
- b) Kudis buta
Untuk mengubati daun "gelenggang" yang telah dilayu pada api dan dihancurkan kemudian disapu di tempat yang berkuldis.
- c) Bisul
Ia diubati dengan membakar kulit kerang hangus kemudian ditumbuk sampai hancur, disapukan pada bisul.
- d) Kayap
Batang kelubi dipancang serong dan diambil getahnya. Getah itu disapu di tempat yang terkena kayap.

- e) Kurap dan Panau
Daun gelenggang dilayu, dihancurkan atau ditumbuk kemudian dipupuk atau disapu di tempat yang ada kurap atau panau.
- f) Panas-Panas Badan
Akar lanang diambil sebanyak mana yang boleh, seelok-eloknya akar lalang yang masih muda direbus dan airnya itu diminum atau Batang Tepus dititik dan diambil sebelah dalam batang itu dan diletakkan di kepala.
- g) Pening Kepala
Halia dipotong kemudian dicium selama lebih kurang 5 minit. Ulangi lagi selepas itu atau bawang putih dipecahkan kemudian digosok di atas kepala.
- h) Patah dan Terseliuh.
"Daun temu urat" dan "buah jarak" dibungkus dalam daun pisang dan dipais. Daun yang telah dipais diletakkan di tempat yang patah atau terseliuh. Kemudian dibalut. Rawatan seperti ini dilakukan sehingga beberapa minggu atau bulan sehingga sembuh.
- i) Hidung Berdarah "Broh"
Daun sirih atau "Cawi" digulungkan dalam bentuk kun dan disumbatkan ke dalam hidung.

11.3 Perubatan Tradisional

Orang Asli Suku Semai mempercayai bahawa penunggu, hantu dan syaitan adalah salah satu punca seseorang itu mendapat sakit. Oleh itu bomoh atau pawang memainkan peranan penting untuk mengubat dan mengetahui penyakit-penyakit yang dihidapi dengan cara berikut:

- Jampi
- Bercadak
- Berkebut
- Sewang
- Gegabor
- Sangkak
- Tenghor
- Cekneat
- Ne-alin
- Bidan atau Bidat.

- a) **Jampi**
Jampi adalah ayat-ayat yang dibaca bagi sesuatu tujuan. Ayat-ayat jampi ini dikenali sebagai ilmu. Ayat-ayat ini pada asalnya didapati melalui mimpi dan ianya diperturunkan dari generasi ke generasi yang lain. Jampi ini selalunya digunakan untuk berbagai jenis penyakit atau tujuan-tujuan yang lain. Pesakit dijampi pada tubuh sendiri atau pada herba-herba tertentu seperti berikut:

Label makanan yang boleh dan tidak boleh dimakan

1	2	3	4	5	6	7	8	9	10	11	12	13
	A	Ikan	Telur	Kerbau	Rusa	Babi	Ular	Kunyit	Landak	Kulat	Ikan Pari	Minyak Masak
1	Ikan	/	x	x	x	x	x	/	x	x	/	/
2	Telur	x	/	x	x	x	TP	/	x	x	*	/
3	Kerbau	x	x		x	x	TP	/	x	x	*	/
4	Rusa	x	x	x	/	x	TP	/	x	x	x	/
5	Babi	x	x	x	x	/	TP	x	x	x	x	/
6	Ular	TP	TP	TP	TP	TP	/	TP	TP	TP	TP	TP
7	Kunyit	/	/	/	/	/	TP	/	/	x	/	/
8	Landak	x	x	x	x	x	x	/	/	x	x	/
9	Kulat	x	x	x	x		TP	x	x		*	/
10	Ikan Pari	/	x	x	x		TP	/	*	*	/	/
11	Minyak Kelapa	/	/	/	/	/	TP	/	/	/	/	/
12	Setai	/	J	J	J	/	TP	/	/	/	/	/
13	Berok	x	x	TP	TP	TP	TP	x	TP	x	x	TP
14	Burong	x	x	x	x	x	TP	/	x	x	x	/

Petunjuk : X - Tidak boleh (pantang) dicampur dengan ruang 2
 * - Tidak boleh dicampur dengan ruang 2.
 / - Boleh dicampur dengan ruang 2.
 TP - Tidak pernah dicampurkan/makan dengan barang-barang lain.
 J - Jangan.

- Jenaram (Jaram)
- Tabar (Setawar)
- Kelawi
- Serbok (Daun Babak)
- Pemulih
- Rempuyig/Berdag (kunyit tirus)
- Jerangau
- Sirih
- Pinang

b) **Bercadak**

Bercadak adalah di mana bomoh merawat pesakitnya di waktu malam dengan menggunakan gendang, gong dan lili diiringi oleh nyanyian bomoh lalu datanglah "Gunig" (makhluk halus) melihat dan mengenal pasti penyakit sama ada tersampuk atau lain-lain lagi. Bercadak ini dijalankan selama tiga hari hingga ke tujuh hari.

c) **Berkebut (berbunbun)**

Berkebut dijalankan pada waktu malam. Alat yang digunakan semasa berkebut ialah "Bumbun" (bentuk kun yang dianyam dari daun bertam),

centong, kejai atau kemenyan, selak Bert. Bomoh akan masuk ke dalam bumbun dan menyeru sambil menyanyi diiringi dengan centong sehingga datanglah Gunig . Melalui cara ini bomoh akan cuba mengubat dalam masa tiga hari. Pantang semasa berbunbun tidak boleh memasang pelita atau lampu.

d) **Sewang**

Sewang berubat dijalankan di sebuah rumah yang besar, semua bomoh-bomoh atau pawang berkumpul untuk menjalankan upacara pemutus ubat kepada pesakit yang pernah diubati oleh mereka. Setiap pesakit yang pernah diubati oleh bomoh tersebut mestilah hadir dalam upacara tersebut. Ia dikehendaki oleh gunig anak yang melalui perantaraan bomoh tersebut. Sekiranya upacara tersebut tidak dijalankan ada dua kemungkinan akan berlaku. Sama ada kepada pesakit atau bomoh itu sendiri. Sewang selalu dijalankan selama 3 - 7 hari.

e) **Tenghor/Ceknet**

Satu kaedah pengubatan segera dengan menggunakan daun pemulih, lebak , kemenyan. Kaedah ini digunakan untuk mengubati penyakit yang ganjil seperti rasa tajam dan bisa-bisa di dalam badan yang datang secara mendadak. Kaedah pengubatan ini hanya dilakukan oleh bomoh yang berpengalaman dan tinggi ilmu kebatinannya.

f) **Gegabor**

Bomoh menggunakan cara pengubatan ini untuk penyakit-penyakit yang dikenai secara kecemasan seperti sampok, pengsan dan ketegur.

g) **Sangkak**

Merupakan cara pengubatan yang terakhir dilakukan oleh bomoh setelah acara berkebut/berbunbun gagal dilakukan. Selalunya bomoh akan membuang bala supaya penyakit itu tidak berulang lagi.

h) **Ne-alin**

Cara ini digunakan untuk mengubat penyakit seperti barah, bengkok atau bernanah. Nealin penyakit dalam tubuh sahaja.

11.4 Perubatan Moden

Masyarakat Orang Asli Semai menerima rawatan moden. Di dalam sesuatu keadaan, mereka menggunakan cara rawatan serentak. Mereka mempercayai bahawa penyakit yang diakibatkan oleh kuman, rawatan moden adalah yang paling berkesan. Manakala penyakit yang disebabkan oleh keteguran (sampak) rawatan secara tradisional digunakan.

II. PANDUAN UNTUK BERINTERAKSI

- Apabila sampai di sesuatu perkampungan Orang Asli, Semai seharusnya berjumpa dengan Tok Batin/Penghulu terlebih dahulu. Ini ialah kerana Orang Asli sangat

menghormati dan memberi kepercayaan penuh kepada ketua mereka.

- Apabila sedang bercakap, cuba elakkan menggunakan perkataan yang boleh menyinggung perasaan mereka seperti nama kotor, jijik, bodoh, tak pakai baju, macam beruk dan sakai. Ini tidak boleh dilakukan kerana apabila masyarakat luar datang mereka selalunya datang untuk melihat lebih dekat lagi sebab mereka belum kenal masyarakat luar seperti orang Melayu, China, India dan sebagainya. Perlu diketahui Orang Semai amat mudah tersinggong.
- Jangan terus naik ke dalam rumah sebelum dibenarkan oleh tuan rumah atau Tok Penghulu. Ketika berada di dalam rumah, elakkan melihat atau bertanya tentang sesuatu barang, harta benda, anak dara tuan rumah itu. Mereka ini amat sensitif dan mudah memahami perwatakan negatif seseorang.
- Apabila dijamu seperti tembakau, ubi kayu, minuman hendaklah dijamah sedikit demi sedikit untuk menjaga hati tuan rumah itu. Walau bagaimanapun apabila tidak boleh maka hendaklah disentuh sahaja atau jika tidak dapat langsung hendaklah dijelaskan secara tulus ikhlas kepada Tok batin/tuan rumah di atas sebab yang tidak dapat dielakkan.
- Apabila berjalan ke suatu tempat, biasanya Orang Asli Semai berjalan di belakang dan menyuruh masyarakat luar (pelawat) berjalan terlebih dahulu. Ini berlaku kerana apabila di dalam hutan mereka mempunyai pergerakan yang pantas dan boleh meninggalkan kita.
- Jangan bercakap besar (takbur) bila berhadapan dengan mereka. Contohnya "saya berani boleh berjalan sendiri, saya kuat" kerana jika apa-apa berlaku, mereka akan membiarkan kita seorang diri ketika dalam kesusahan tanpa diperdulikan.
- Apabila berada di dalam rumah Orang Semai, janganlah berdiri seolah-olah jijik hendak duduk kerana rumah mereka kotor. Ini secara tidak langsung akan menyinggung perasaan mereka.
- Hendaklah berkelakuan jujur apabila berada di dalam kelompok masyarakat ini, tidak boleh menipu, mungkir janji kerana sekali mereka dapat mengetahui perbuatan seperti ini, mereka akan terus menganggap kita tidak jujur dan tidak boleh dipercayai dan mereka enggan bekerjasama dalam apa jua aspek.
- Kehidupan dalam masyarakat Orang Semai mementingkan keharmonian, kesejahteraan, tidak boleh mengujudkan sesuatu suasana yang tidak tenteram kerana ini akan menimbulkan tindak balas yang kurang baik.
- Apabila berada di kawasan perkampungan Orang Semai, haruslah menghormati harta benda mereka seperti buah-buahan, jerat, belantik, pisang, ubi, durian dan sebagainya. Mintalah kepada Tok Penghulu atau Tok Batin sekiranya kita berkehendakkan barang tersebut. Terpujang kepada Tok Penghulu untuk menunaikannya.

Bab 8

SUKU BANGSA
SEMELAI



(Seorang lelaki dewasa dari suku bangsa Semelai)

SEMELAI

1. PENGENALAN

'Semelai' adalah salah satu Suku Kaum Orang Asli dari suku bangsa Melayu Asli (Proto Melayu). Taburan petempatan Orang Asli Semelai terdapat di Pahang Tengah seperti di Tasik Bera, Sg. Bera, Sungai Teriang, Paya Besar, dan Paya Badak serta di sempadan Pahang menghala ke Negeri Sembilan seperti di Sg. Serting, Sg. Lui, dan Ulu Muar. Dari segi rupa dan bentuk fizikal Orang Asli tidak banyak bezanya dengan Orang Melayu.

2. SOSIO BUDAYA

Kaum Semelai juga seperti masyarakat lain, mempunyai susunan masyarakat dan kepimpinannya yang tersendiri seperti struktur berikut:



2.1 Lantikan/Kelayakan

Lantikan/kelayakan Batin, Menteri, Penghulu, Ketua Kampung, Jurukerah, dan Setin dipilih berdasarkan kriteria berikut:

- Keturunan - anak lelaki yang sulung
- Berwibawa
- Tahu adat resam
- Pandai menggunakan bahasa adat 'Bertawaran/Bermisal' (bahasa lembut/halus/sindiran/berbunga).

2.2 Pentadbiran

(a) Batin

'Batin' adalah jawatan dalam sesebuah komuniti/kampung Suku Kaum Semelai. Bidang kuasanya adalah yang tertinggi dalam kampung. Jawatan 'Kuasa Peradatan', berkuasa memegang adat, memutuskan adat, menjatuhkan hukum, dan sebagainya berkaitan dengan nikah kahwin, cerai, kematian, dan hal-hal yang berkaitan dengan penduduk setempat. Tugas-tugas lain batin adalah seperti berikut:

- (a) Pentadbiran kampung
- (b) Pembangunan kampung
- (c) Keselamatan kampung
- (d) Perantaraan dengan agensi/masyarakat luar.

(b) Menteri

'Menteri' adalah jawatan kedua tertinggi selepas 'Batin'. Ia juga sebagai penasihat Batin, Penghulu, dan pegawai-pegawai lain, tetapi tidak boleh menjatuhkan hukuman.

(c) Penghulu

'Penghulu' adalah jawatan ketiga selepas Batin dan Menteri. Bidang kuasanya adalah separuh daripada kuasa Menteri dan suku daripada kuasa Batin.

(d) Ketua Kampung

'Ketua Kampung' adalah jawatan keempat dalam struktur organisasi kepimpinan Kampung Orang Semelai. Bidang kuasanya separuh daripada kuasa Penghulu.

(e) Jurukerah

Dilantik/dipilih secara majoriti oleh penduduk kampung. Jurukerah hendaklah dipilih dari kalangan penduduk yang rajin bekerja, mengikut perintah, dan boleh diharap/dipercayai. Tugasnya ialah membantu Ketua Kampung dalam menjalankan kerja-kerja yang diarahkan (membuat rumah, bergotong-royong, dan sebagainya).

(f) Setin

'Setin' adalah pembantu Jurukerah. Pemilihannya sama seperti memilih Jurukerah. Tugas beliau adalah membantu kerja-kerja 'Jurukerah'.

2.3 Perubatan

(a) Puyang

'Puyang' adalah seorang pengamal perubatan tradisional yang tertinggi dalam kaum Semelai. 'Puyang' dan 'Batin' perlu ada di dalam sesuatu upacara yang penting. Puyang bukanlah jawatan yang boleh dipilih, dipelajari/dituntut, diperturunkan atau keturunan, tetapi ia wujud secara

semula jadi 'Cenroh' (Penemuan). Puyang boleh menjalankan pengobatan yang disebut 'Bebelian'.

(b) **Bomoh**

Bomoh adalah seorang pengamal pengobatan tradisional kedua tertinggi selepas 'Puyang'. Bomoh boleh melakukan pengobatan seperti 'tengprung', 'ten-bern, dan 'jampi'. Kebolehan bomoh tidak sampai ke peringkat 'Bebelian' seperti yang dilakukan oleh 'Puyang'. Selain 'Bomoh', ada lagi bomoh lain yang tidak boleh melakukan pengobatan yang dipanggil 'Bomoh Do'oh' (ladang). Tugas 'Bomoh Do-oh' cuma terhad kepada upacara pembukaan ladang dan pujaan semangat tanaman.

(c) **Tarun**

Tarun adalah pelengkap Puyang dalam menjalankan upacara perubatan bebelian'. Dalam upacara ini dua orang Tarun akan memikul rebana semasa 'Puyang' menjalankan proses bebelian.

(d) **Tok Mudim**

Tok Mudim adalah orang yang bertanggungjawab menjalankan kerja 'Bersunat'.

(e) **Bidan**

Bidan tugasnya menolong/menyambut kelahiran bayi.

3. SISTEM KEKELUARGAAN

3.1 Adat Perkahwinan

3.1.1 Adat Bertanyaan

Setelah pasangan berkenalan dan bercinta, mereka akan memberitahu keluarga (ibu/bapa) tentang perhubungan mereka. Jika diestujui isteri akan bertandang ke rumah perempuan. Mereka bermalam bersama sehingga tiga malam berturut-turut. Setelah tiga malam, bapa gadis akan bertanya 'Bertanyaan' kepada silelaki dan anak gadisnya tentang perhubungan mereka. Jika perhubungan mereka atas dasar suka sama suka, silelaki dinasihatkan membawa sigadis balik bermalam ke rumah ibubapanya. Pada pagi hari ketiga, bapa sigadis akan pergi ke rumah ibubapa silelaki untuk mencari anak gadisnya yang kononnya dibawa lari oleh orang lelaki yang tidak dikenalnya. Anak gadis yang berada di rumah lelaki itu adalah anak gadisnya yang telah dibawa lari oleh lelaki itu.

Bapa silelaki akan bertanya 'bertanyaan' kepada anaknya apakah tujuan membawa lari anak gadis balik ke rumah. Anak gadis itu juga ditanya mengapa dia mengikut lelaki itu. Jika silelaki dan siperempuan itu menyatakan hasrat mereka untuk berkahwin, maka pasangan itu akan dibawa bertandang kerumah keluarga mereka yang terdekat untuk memaklumkan perhubungan mereka. Acara ini dipanggil 'Menanggung.

Tarikh perkahwinan akan ditetapkan dengan persetujuan kedua-dua belah pihak.

3.1.2 Adat Bertunang ('Bertunong')

(a) Merisik

Pihak lelaki akan menghantar rombongan ke rumah pihak perempuan untuk merisik bakal isterinya. Setelah mendapat persetujuan kedua-dua pihak, maka tarikh untuk mengadakan majlis hantaran/bertunang pun ditetapkan.

(b) Hantaran

Secali lagi rombongan dari pihak lelaki berkunjung ke rumah pihak perempuan dengan membawa kelengkapan hantaran. Semasa majlis hantaran, bahasa yang digunakan ialah bahasa adat atau bahasa halus ('bermisal')

Senarai barang yang perlu disediakan dalam menyediakan hantaran.

- Kain sepasang
- Sapu tangan
- Cermin
- Alat solek (gincu bibir, bedak dan lain-lain)
- Pisau lipat
- Sikat
- Selendang
- Cincin Perak
- Kasut
- Minyak wangi

3.2 Majlis Perkahwinan

Perbelanjaan perkahwinan akan ditanggung oleh kedua-dua pihak. Majlis kenduri diadakan di rumah pengantin perempuan. Sebelum itu majlis berinai diadakan terlebih dahulu.

Pengantin lelaki akan diarak ke rumah pengantin perempuan dengan iringan biola/gendang. Sampai di perkarangan halaman rumah, pengantin lelaki akan disambut dengan persembahan pertandingan silat antara pihak lelaki dan pihak perempuan. Biasanya pihak perempuan akan tewas.

Pengantin lelaki dan rombongan dijemput naik ke balai (anjung) rumah pengantin perempuan. Pihak pengantin lelaki terpaksa berbalas pantun sebelum masuk ke bilik pengantin perempuan. Selepas berbalas pantun, pengantin lelaki dibenarkan berjumpa pengantin perempuan. Pengantin lelaki menjemput pengantin perempuan ke balai 'peradatan' dengan membawa peralatan hantaran keluar mengadap Batin/Menteri/ Penghulu/Puyang dan pembesar-pembesar yang lain.

Semasa majlis persandingan dilangsungkan, pasangan pengantin akan diapit oleh pengapit masing-masing sambil duduk bersila di hadapan Batin, Menteri,

Penghulu, Puyang, dan pembesar-pembesar yang lain. Upacara bersalam-salaman dengan tetamu dijalankan sebelum upacara akad nikah dijalankan oleh Batin, Menteri, Pengulu, dan pemegang adat dengan diwalikan oleh kedua belah pihak pengantin. Pasangan pengantin diberi nasihat oleh pemegang adat untuk panduan mengharungi hidup berumah-tangga.

Pengantin dihidangkan dengan jamuan makan sepinggan. Selepas makan, pasangan pengantin berkongsi menghisap sebatang rokok. Selepas itu tetamu dijemput makan. Pada sebelah malam, majlis dimeriahkan dengan upacara minum tuak/tari menari.

3.3 Tangkap Basah

Pasangan yang ditemui berdua-duaan di tempat sunyi/gelap akan dibawa kepada ibubapa sigadis. Bapa gadis akan membawa perkara ini kepada Tok Batin dan terus dibicarakan (*'Beri tonga'*). Pada lazimnya pasangan itu akan didenda dan dikahwinkan.

Perkahwinan melalui tangkap basah dianggap kurang baik. Pasangan dipandang rendah dari segi moralnya. Seboleh-bolehnya perkahwinan cara ini hendaklah dielakkan.

4. MENGANDUNG 'KHET'

Apabila usia kandungan isteri tiga bulan, satu upacara 'melenggang' diadakan. Tujuannya untuk memastikan kedudukan janin dalam kandungan berkeadaan stabil. Semasa mengandung pasangan (suami/isteri) terikat dengan beberapa 'pantang larang' seperti berikut:

Pantang/Larangan	Akibat / Sebab
• Mengetah burung	Anak dalam kandungan lekat, sukar dilahirkan sukar bersalin
• Melakukan aktiviti memaku	Sakit yang teramat sangat ketika melahirkan anak seperti dicakar labi-labi
• Memegang/menyentuh labi-labi yang masih hidup	Anak yang dilahirkan akan cacat
• Sentuh mayat	Anak yang dilahirkan akan cacat
• Membuat simpai	Terbelit tembuni
• Melilit kain pada leher	Tali pusat membelit leher anak

• Buat injap bubu	Tali pusat membelit leher anak
• Melebur timah untuk membuat batu pancing	Sukar bersalin
• Menyimen	Sukar bersalin
• Mengempang/menyekat perjalanan air	Mata anak kabur 'bular'
• Menyelam	Sukar bersalin
• Memegang/memukul ular	Sukar bersalin Bayi lemas Merasai kesakitan seperti ular kena palu ketika bersalin

4.1 Menyambut Kelahiran

Sebelum hari kelahiran, pasangan menyediakan beberapa alatan untuk menyambut anak mereka, antaranya:

- Kayu api - secukupnya untuk digunakan selama 44 hari
- Air
- Tikar mengkuang - Tempat bersalin
- Sumpit kecil - Tempat menyimpan tembuni/uri.
- Bilah buluh - Pengerat tali pusat.
- Ramuan akar-akar kayu untuk diminum selepas bersalin hingga 44 hari (kacip Fatimah, rempah gunung, bunga pakmar, kesenduduk, rumput tahi babi, sekecut, medang teja, dan sebagainya).
- Rumusan daun-daun kayu untuk dicampur dengan air mandi bayi.
- Tungku - untuk aktiviti bertungku
- Ran kecil dalam hutan/belukar - untuk menyimpan sumpit tembuni/uri sekiranya tidak ditanam.

4.2 Semasa Kelahiran

Apabila tiba bulan akhir kandungan, bidan akan sentiasa memastikan kandungan dalam keadaan selamat dan stabil. Jika didapati ada tanda-tanda kandungan terganggu, kedudukan bayi tidak betul, bidan akan berusaha untuk membetulkannya.

Setelah anak selamat dilahirkan, bidan akan membetulkan kedudukan rahim. Bayi dimandikan dan pusatnya dipotong.

Pantang larang semasa bersalin adalah seperti berikut:

Pantang/larangan	Sebab
<ul style="list-style-type: none"> • Tiga hari tidak boleh turun ketanah 	Takut diganggu oleh makhluk halus
<ul style="list-style-type: none"> • Daun-daun/duri-duri digantung di bawahtangga selama 3 hari 	Menakutkan makhluk halus
<ul style="list-style-type: none"> • Tidak boleh makan makanan yang pedas 	Takut sakit semula.
<ul style="list-style-type: none"> • Tidak boleh makan makanan yang dimasak pada hari semalam. 	Takut sakit semula
<ul style="list-style-type: none"> • Tidak boleh memakan sebarang jenis ikan yang mempunyai sengat seperti ikan keli,baung, sembilang dan sebagainya. 	Dipercayai ikan jenis ini bisa, takut sakit semula.
<ul style="list-style-type: none"> • Tidak boleh membuat sesuatu aktiviti yang boleh menggegarkan rumah. 	Akan turun darah.
<ul style="list-style-type: none"> • Tidak boleh menepuk belakang. 	Terkeluar rahim 'peranakan'
<ul style="list-style-type: none"> • Tidak boleh membawa barang yang berat-berat 	Terkeluar rahim 'peranakan'
<ul style="list-style-type: none"> • Tidak boleh memakan ikan yang memakan anaknya (jelai,toman, haruan,toman,haruan, dan sebagainya) 	Anak/bayi yang dilahirkan akan sakit 'sawan'.
<ul style="list-style-type: none"> • Tidak boleh makan lemak (lemak binatang) 	Terkeluar rahim 'peranakan'

4.3 Rawatan Selepas Bersalin

Melalui kaedah jampi serapah yang dilakukan oleh bidan.

Menggunakan akar-akar kayu seperti akar kacip Fatimah, bunga pakmar, rempah gunung, mendang teja, rumput tahi babi, senduduk, sekecut, dan sebagainya - rebus dan diminum selama 44 hari.

Kaedah 'bertungku' - tungku dipanaskan, dibalut dengan kain dan dialin/dieran. Kaedah 'bersalai' - pasang api/baru di bawah rumah dan pesakit duduk di atas. Menggunakan air panas - diusap dan dipicit dibahagian berkaitan 'Semrum'.

5. KEMATIAN

Apabila seseorang pesakit dalam keadaan nazak, orang ramai terutama kaum keluarga/sanak saudara akan berkumpul di rumah pesakit. Jika tiada harapan untuk hidup, ia akan dipindahkan dari rumah ke tempat khas (pondok kecil) yang disediakan di halaman rumah.

Simati tidak akan dikebumikan terus pada hari, sebaliknya ditungguhkan semalaman supaya saudara-mara dan sahabat handai yang tinggal berjauhan sempat menziarahi.

Masyarakat setempat, saudara-mara dan sahabat-handai simati akan turut memberi sumbangan barang keperluan seperti wang ringgit, barang-barang, dan tenaga untuk meringankan beban keluarga yang malang itu.

5.1 Pantang larang semasa berlaku kematian

Pantang/Larangan	Akibat/Sebab
<ul style="list-style-type: none">• Tidak boleh melakukan sebarang aktiviti harian pada hari itu.	Tanda penghormatan agar perjalanan roh simati tidak diganggu. Jika dilanggar boleh mendatangkan kecelakaan.
<ul style="list-style-type: none">• Tidak boleh mencerca simati.	Orang yang terlepas cagak akan papa
<ul style="list-style-type: none">• Mayat tidak boleh dilangkah oleh binatang (kucing, anjing, dan sebagainya).	Simati marah lalu bangun dan mengamuk.

5.2 Tepung Tawar Kematian

Selepas tiga hari kematian, satu kenduri kecil (kenduri 'Tepung Tawar Kematian') diadakan. Kenduri itu diadakan bertujuan untuk menjamu roh simati yang dipercayai balik ke rumah menemui keluarga pada hari itu untuk membersihkan diri orang-orang yang terlibat dengan pengkebumian agar dijauhkan segala mala petaka.

5.3 Kenduri Menambak kubur.

Kenduri itu diadakan selepas simati telah dikebumikan melebihi 100 hari. Tujuannya adalah untuk menanda atau menyimen kubur simati dan juga menandakan tamatnya edah antara simati dan balu/jandanya. Dengan itu balu/janda simati boleh berkahwin lain jika berkemahuan. Sekiranya balu/janda berkahwin sebelum lepas edah, keluarga simati boleh mendakwa kematian simati disebabkan oleh perbuatannya atau orang yang bakal mengahwini balu/janda itu dan Batin akan mendendanya. Kenduri akan diakhiri dengan majlis minum tuak (air tuak diperbuat dari buah tampoi, pisang, dan tebu).

6. PERUBATAN

Ada beberapa kaedah perubatan yang lazim digunakan oleh Suku Kaum Semelai, antaranya adalah seperti berikut:

Kaedah Perubatan	Pelaku 'Tukang Panai'	Penyakit
• Bebelian	Puyang	Jenis penyakit yang terlalu kuat yang tidak sembuh selepas kaedah tengpong.
• Tengpong	Bomoh	Jenis penyakit sederhana yang tidak dapat disembuhkan melalui kaedah ten-bern.
• Ten-bern	Bomoh	Jenis penyakit sederhana yang tidak sembuh selepas dijampi
• Jampi	Orang biasa yang mengetahui selain daripada Puyang dan Bomoh	Penyakit sederhana dan ringan

6.1 Bebelian

Bebelian dilakukan oleh Puyang. Untuk menjadi puyang bukannya sebarang orang kerana ia tidak boleh dituntut/dipelajari. Tetapi ia datang secara semulajadi/dapatan yang dipanggil 'cenruh'.

Bebelian tidak boleh dijalankan tanpa 'tarun' iaitu orang yang bertanggung jawab menepuk rebana untuk mengiringi puyang. Bebelian dijalankan pada waktu malam mulai awal malam hingga pagi (sebelum ayam turun mencari makan). Pada siang harinya kenduri kecil untuk menjamu puyang, tarun, dan tetamu-tetamu menjayakannya.

Peralatan Bebelian

- Pucuk palas - didandan
- rebana - sekurang-kurangnya tiga biji.
- cepot (calun) - tiga perdu/rumpun.
- air cepot - satu mangkuk
- kijai.
- dapur dan bara api (tempat perasap)
- beras yang digiling dijadikan tepung.
- pelita - tempat membakar benda -benda yang diperolehi dari dialin.
- Certih - kadang-kadang diperlukan, kadang-kadang tidak diperlukan.

6.2 Pantang Larang Selepas/Semasa Bebelian

Pantang / Larangan	Akibat / Sebab
<ul style="list-style-type: none">• Semasa bebelian, Puyang tidak boleh terkejut.	Takut 'Gek - Jadi harimau
<ul style="list-style-type: none">• Pesakit tidak boleh terkejut semasa/ sesudah bebelian selama tiga hari.	Takut 'kebencos' - akan membawa maut dan takut 'Gek' - pengikutnya bertambah teruk.
<ul style="list-style-type: none">• Pesakit tidak boleh turun ke tanah selam satu hingga tiga hari.	Takut kebencos/gek.
<ul style="list-style-type: none">• Orang luar dilarang naik ke rumah semasa bebelian selama satu hingga tiga hari pada waktu siang	Takut kebencos/gek.
<ul style="list-style-type: none">• Pesakit tidak boleh terhidu bau-bauan yang hangit seperti bau asap (membakar bulu haiwan, membakar sampah, dan sebagainya).	Takut kebencos/gek
<ul style="list-style-type: none">• Pesakit dilarang memakan makanan yang dimasak pada hari semalam.	Takut kebencos/gek
<ul style="list-style-type: none">• Pastikan ayam dan anjing tidak naik ke rumah.	Takut kebencos/gek.

6.3 Tengpong (Beralin)

Berlain dilakukan oleh bomoh, dijalankan pada waktu malam.

Peralatan yang diperlukan:

- Beras yang digiling dijadikan tepung (alin)
- Semangkuk air
- Seketul kijai
- Dapur arang/bara api (tempat perasap)

6.4 Ten-bern

Dilakukan oleh bomoh, dijalankan pada waktu malam dengan menggunakan peralatan berikut:

- cepot
- air cepot
- kijai
- dapur

6.5 Jampi

Peralatan yang selalu digunakan sebagai bekas jampi - kunyit, kapur, garam, pucuk kayu, air, dan sebagainya.

7. MEMBINA TEMPAT KEDIAMAN

Kaum Semelai yang bercadang membina rumah baru akan melalui proses berikut:

Menebas ladang untuk tapak rumah dan meninggalkan tempat itu.

Balik ke rumah untuk mendapatkan alamat/firasat dalam mimpi.

Mentafsir mimpi - jika mendapat mimpi (firasat) baik, kerja membina rumah akan diteruskan. Jika mendapat mimpi/firasat buruk, tempat itu akan ditinggalkan dan berpindah ketempat lain.

7.1 Tempat yang baik

- di atas busut
- di tepi sungai/paya/tasik.
- berhampiran saudara mara/keluarga.

7.2 Tempat yang tidak sesuai (Terlarang)

- Kawasan lidah jin (pertembungan dua sungai)
- Bawah bukit / dilindung bayang
- Tepi busut ('Kah kuh')
- Pintu / tangga menghadap ke barat

8. AKTIVITI HARIAN

Aktiviti harian Kaum Semelai adalah seperti berikut:

- 8.1 Suami - Sebagai ketua keluarga. Suami akan mencari nafkah (rezeki) seperti bercucuk tanam, mencari lauk (berburu, menjerat, memancing dan lain-lain), membuat peralatan rumah, serta peralatan menangkap ikan.

- 8.2. Isteri - Membantu suami mengerjakan ladang padi huma, membuat kerja rumah, seperti mengemas rumah, memasak, membasuh, menjaga anak dan membuat peralatan rumah (tikar dan lain-lain).
- 8.3. Anak - Anak yang boleh diharap (8 tahun ke atas) akan membantu kerja-kerja ibu dan bapa, menjaga adik dan mempelajari kemahiran ibu bapa mereka.

9. PERAYAAN , KERAMAIAN DAN TEMASYA KAUM SEMELAI

Antara beberapa perayaan, keramaian, dan temasya yang diraikan oleh kaum Semelai adalah seperti berikut:

- Mengulung Tahun (Februari)
- Musim Tampoi (Oktober)
- Keralai (Mei)
- Keruing
- Bersunat
- Berderau
- Berselang
- Tepung Tawar
- Bercukur
- Menindik Telinga (Cuk Teng)
- Menuba (Kak-ruk)

9.1 Menyulung Tahun

Menyulung Tahun diadakan selepas menuai padi. Pada hari itu diadakan kenduri makan padi yang baru dituai. Sebelum kenduri, padi baru akan ditumbuk secukupnya dan lauk pauk serta sayur-sayuran juga telah dicari. Tuan rumah mengadakan rumah terbuka dengan menjemput 'Bomoh Do-oh', saudara-mara, dan sahabat handai.

9.2 Musim Tampoi dan Buah-Buahan Hutan

Musim Tampoi adalah musim buah-buahan hutan. Buah Tampoi biasanya masak dan boleh dipungut pada penghujung musim buah-buahan biasa. Mengikut kepercayaan kaum Semelai, buah tampoi ada kaitannya dengan 'harimau' atau roh 'harimau jadian'. Mengikut kepercayaan mereka, jika pada musim tampoi ini tidak diraikan dengan meriah, harimau akan mengganggu dan membunuh penduduk kampung tersebut. Oleh itu pada tiap-tiap musim tampoi, kampung yang ada buah tampoi akan membuat sejenis minuman 'tuak' iaitu aduan air tampoi yang diperam selama satu hingga tiga bulan. Air tampoi akan dirasmikan oleh 'Puyang' dengan meminumnya terlebih dahulu. Majlis diikuti dengan makan kenduri dan tari menari yang disebut 'tarian balai'. Temasya ini ada kalanya berlarutan sehingga 3 hari atau seminggu.

9.3 Musim Keralai

Keralai adalah sejenis serangga yang mengeluarkan bunyi pada hari siang. Musim keralai ialah musim serangga in bersalin kulit. Pada masa ini diadakan istiadat menangkal perkampungan mereka supaya penduduk-penduduknya tidak diganggu oleh hantu jembalang. Batin akan menyelaraskan majlis ini manakala 'Puyang' dan Gabungan Puyang' akan menyempurnakan upacara menangkal kampung. Kenduri diadakan hasil dari sumbangan setiap keluarga dalam kampung itu yang berupaya wang ringgit atau barangan. Minum tuak 'Kemerling' dan 'Tari Balai' akan turut memeriahkan temasya ini.

9.4 Musim Keruing

Keruing adalah sejenis pokok yang terdapat di dalam hutan. Musim keruing ialah musim daun keruing luruh. Pada ketika ini dipercayai penyakit akan turun. Oleh itu kampung perlu ditangkal seperti yang dilakukan pada musim 'Keralai'.

10. Bersunat 'Besunot'

Seminggu atau dua minggu sebelum adat bersunat dijalankan, kanak-kanak lelaki yang dikenal pasti (umur 12 tahun ke atas) dikehendaki mandi tiap-tiap pagi dengan membersihkan kemaluannya 'Lok' di samping menggosok-gosok (supaya lembut dan kurang sakit bila dikhatan). Pada pagi majlis bersunat dijalankan, kanak-kanak yang terlibat dikehendaki mandi dan berendam. Sesudah itu kanak-kanak tadi ditandu 'Bedudol' dan diiringi dengan gesekan biola, paluan gendang, dan gong 'Tetawak' sehingga ke 'Balai'.

Tiba di balai, kanak-kanak tersebut duduk di atas batang pisang atau 'gong/tetawak' diikuti dengan penyerahan kanak-kanak kepada 'Tok Mudim'. Tok Mudim memberi sekapur sirih pinang yang dijampi kepada kanak-kanak dan upacara 'tepong tawar' dijalankan. Setelah itu barulah adat bersunat dibuat. Pada hari itu juga jamuan makan (kenduri) diadakan dan majlis minum tuak dan tari menari dijalankan pada waktu malam.

10.6 Berderau

Berderau bermaksud membuat kerja secara beramai-ramai untuk menyiapkan sesuatu kerja dengan cepat. Cara pelaksanaannya adalah seperti berikut:

Katakanlah untuk membuka ladang, mula buat ladang untuk orang A, dibantu oleh orang B, C, D, dan E. Esoknya buat ladang orang B, di bantu oleh A, C, D, dan E, lusa buat ladang C di bantu oleh A, B, D, dan E dan begitulah seterusnya. Kenduri kecil diadakan selepas habis menjalankan kerja-kerja tersebut.

10.7 Berselang

Berselang ialah memanggil orang ramai untuk membuat kerja secara gotong-royong, seperti membuat ladang, rumah, dan sebagainya. Apabila kerja-kerja

telah siap, majlis kenduri akan diadakan diikuti minum tuak 'Kemerling' dan tari menari 'Tari Balai'.

10.8 Bertindik Telinga 'Cuk Teng'

Suku Kaum Semelai menganggap belum lengkap seseorang gadis jika belum ditindikkan telinganya. Upacara tindik telinga dibuat dengan mengadakan kenduri secara besar-besaran dimulai dengan upacara berinai/tepung tawar. Gadis yang terlibat direnjis dengan campuran air dengan darah ayam serta beras yang dijampi. Sesudah itu si gadis akan ditindik telinganya oleh Mak Andam.

10.9 Bercukur

Upacara bercukur dilakukan kepada kanak-kanak yang baru lahir. Tujuannya untuk membersihkan diri kanak-kanak daripada mala petaka yang tidak diinginkan di samping membuang sial dan menolak bala.

Kanak-kanak dicukur sesudah ia berusia tiga hari atau pada hari ketujuh atau hari keempat belas atau hari ke dua puluh satu. Upacara ini tidak boleh dilakukan pada hari 13, 14, dan 15 haribulan pada tiap-tiap bulan.

10.10 Tepung Tawar

Upacara tepung Tawar adalah satu upacara yang dijalankan ke atas seseorang atau lebih dengan tujuan menolak bala. Biasanya upacara ini dijalankan untuk semua majlis yang diadakan seperti majlis perkahwinan, bersunat, bertindik, bercukur, selepas bersalin, selepas kematian, selepas mendapat kecelakaan seperti luka, jatuh, dan sebagainya.

Barang-barang/peralatan yang diperlukan untuk upacara ini:

- beras
- darah ayam
- neres (daun hidup yang ditanam)
- air

Setelah barang-barang itu dicampur, ia akan dijampi oleh puyang kemudian direnjis dari kaki hingga ke kepala yang terlibat.

10.11 Temasya Menuba.

Temasya Menuba diadakan setahun sekali pada musim panas/kemarau. Setelah pakatan diadakan kerja-kerja mencari tuba 'tuba akar' dijalankan. Akar tuba dipukul dan dilumatkan secara gotong-royong selama satu hari. Keesokan harinya, ketua tuba 'kepalak tubak' akan menjampi penaik bisa terlebih dahulu sebelum air tuba dituang ke dalam air. Selalunya kaum lelaki akan mengutip ikan, sementara kaum perempuan memasak jamuan secara gotong-royong (tempat temasya menuba diadakan - tepi sungai). Selepas berhenti makan, mereka akan meneruskan untuk mengutip ikan semula. Setelah habis mengutip ikan, sekali lagi 'kepalak tubak' akan menjampi menurunkan bisa tuba dan ikan yang ada

dalam air akan hidup semula. Sebagai kepastiannya 'kepalak tubak' akan minum air yang dituba tadi.

Peralatan Menuba

- Akar tuba
- Serampang
- Tempuling
- Tiruk
- Sauk
- Bakul 'rentang'.

11. BENTUK KEPERCAYAAN

Kaum Semelai percaya adanya 'Tuhan' yang mencipta sekalian alam. Kaum Semelai juga mempercayai adanya hari Akhirat, Qiamat, Syurga dan Neraka, serta Mungkar dan Nangkir.

Orang Semelai juga percaya akan berdosa 'pakak' jika melakukan perkara yang tidak baik dan dilarang. Pegangan dan kepercayaan lain kaum Semelai adalah seperti berikut:

- percaya adanya penunggu/jin, seperti penunggu pokok, penunggu gunung-ganang dan batu batan.
- Percaya adanya roh dan makhluk halus 'Sekok' (adanya roh yang baik dan jahat).
- percaya kepada semangat.

Pantang larang atau perkara yang tidak boleh dilakukan	Akibat jika melanggar pantang
<ul style="list-style-type: none"> • Tidak boleh menegur benda-benda atau bunyi ganjil. 	<p>Ken-rik - dimakan harimau/binatang buas atau Pak Rik - gik, sakit dan mati berdarah (kemalangan).</p>
<ul style="list-style-type: none"> • Tidak menjamah makanan yang dipelawa. 	<p>Penong - Mendatangkan kecelakaan seperti sakit, dipatuk ular, dimakan harimau, jatuh atau sebagainya</p>
<ul style="list-style-type: none"> • Mentertawakan atau mempersendakan benda-benda /haiwan/serangga/tanah liat yang berbentuk. 	<p>Celau - ribut, petir, hujan lebat dan bencana alam.</p>
<ul style="list-style-type: none"> • Menganiaya orang lain, menyiksa haiwan, memusnah tanaman, makanan. 	<p>'Papak' (papa) - keadaan hidup siksa, merana, menderita sepanjang hayat dan ketika hendak menghembuskan nafas terakhir.</p>

<ul style="list-style-type: none"> • Tidak menghormati atau melakukan perbuatan yang tidak sopan kepada ibu bapa atau saudara mara. • Mempersendakan makanan seperti menyamakannya dengan benda lain menyebut berulang-ulang kali 'Merekchek' • Melanggar pantang larang yang ditetapkan oleh puyang atau bomoh. • Bermain atau melalui tempat yang berpenunggu/tempat berair/berlumpur/hujan panas, membuang air kecil/air besar di tempat yang berpenunggu. 	<p>Tulah - Burut bagi lelaki. Ketet (keluar peranakan/rahim), rabun/buta dan ditimpa kecelakaan yang lain.</p> <p>Cikak - Sakit perut atau cirit birit</p> <p>Kebencos/Gek - sakit hingga boleh membawa maut.</p> <p>Terkenak - sakit bengkak. Keteguran - sakit teruk.</p>
---	---

12. Orang Asli Semelai amat mengalu-alukan kunjungan tetamu (orang tempatan, keluarga, jiran, penduduk dari kampung lain, dan juga orang luar) jika rumah itu tidak berpantang. Tetamu yang datang bertandang boleh menarik perhatian tuan rumah itu, jika tiada rumah tidak kelihatan, tetamu bolehlah :

- 'Berdehem' atau 'batuk-batuk'
- Memanggil tuan rumah dan bertanyakan sama ada tuan rumah sedang tidur 'Jetek'.
- Jika ada jawapan daripada tuan rumah dan ia menjenguk keluar, tetamu hendaklah bertanya sama ada rumah tersebut ada pantang atau tidak 'Memantang'.
- Jika tiada pantang tuan rumah akan mempelawa tetamu naik ke rumah.

Proses berinteraksi.

- Tetamu dipersilakan duduk
- Dijamu merokok atau tembakau dan makan siri pinang 'Sen Tep'
- Tetamu pula membalas dengan menyuakan rokok/tembakau dengan secara merendahkan diri (merendahkan bekas tembakau).
- Tuan rumah (tanpa disedari oleh tetamu) pergi ke dapur menyediakan makanan/minuman untuk tetamu.
- Selepas dijamu tuan rumah bertanyakan hal/tujuan tetamu itu datang (tidak

ditanya pada mula kedatangan tetamu itu kerana cara ini seolah-olah tidak suka tetamu berada lama di rumah).

- Tetamu meminta diri untuk pulang. Jika tetamu tidak memberitahu hendak pulang, perbuatannya dianggap tidak baik/tidak sopan.
- Jika terserempak dengan orang di perjalanan, orang Semelai akan berhenti seketika untuk bertegur sapa, bertanyakan khabar, dan berbalas-balas (sorong-menyorong) tembakau/rokok (Sen Tep).
- Ketika hendak melalui tempat mandi (tepi sungai/perigi/telaga) seseorang itu hendaklah berdehem/batuk-batuk/menyanyi sebagai isyarat kepada orang yang sedang mandi di telaga/tepi sungai/tepi tasik dan sebagainya bahawa ada orang akan melalui tempat mandi mereka. Ini bertujuan supaya orang yang sedang mandi itu menyedari dan sempat bersedia seperti memakai pakaian atau menutup anggota badannya dari penglihatan orang yang berkenaan.
- Semasa seseorang sedang makan, kita tidak dibenarkan lalu dibelakangnya. Hendaklah lalu di hadapan dengan menundukkan kepala dan menghulurkan tangan ke bawah, tanda meminta izin 'tabik'.
- Tidak dibenarkan duduk di tempat tidur tuan rumah apatah lagi di atas bantal.

Perkataan / perbuatan yang dilarang :

- sakai
- perkataan lucah
- mempersenda-sendakan barang makanan, orang, perkampungan, rumah kediaman, peralatan dan haiwan/serangga

Perkataan / ayat yang sesuai digunakan semasa berinteraksi:

- Perkataan atau ungkapan yang digalakkan apabila bersua dengan seseorang tanpa mengira usia atau jantina ialah 'mandey khabar' yang bermaksud 'Apa khabar?'. Kalau seseorang bertanya kepada kita, 'Mandey khabar?' kita akan menjawab 'khabar bai-ik, dak-dak mandey-mandey' maksudnya 'khabar baik, tiada apa-apa'.
- Bertegur sapa sangat digalakkan. Jika seseorang itu tidak bertegur sapa, dia dianggap sombong.

Bab 9

SUKU BANGSA ORANG KUALA (Laut)



(Seorang lelaki dari suku bangsa Orang Laut)

ORANG LAUT

1. PENGENALAN

Orang laut tergolong di dalam kumpulan Melayu-Proto. Mereka tinggal di pantai barat dan selatan Johor, dan di utara Singapura. Mereka terbahagi kepada dua kumpulan ia itu Orang Kuala dan Orang Seletar. Orang Kuala terdapat di pantai barat Johor ia itu di Batu Pahat (Kuala Rengit, Kuala Senggarang dan Tanjung Segenting) dan di Pontian (Kuala Benut, Kuala Sungai Pontian dan Kukup). Sementara Orang Seletar terdapat di pantai selatan Johor dan di utara Singapura.

1.1 Orang Kuala

Istilah Orang Kuala wujud disebabkan lokasi masyarakat itu sendiri yang kebanyakannya tinggal di kuala sungai dan di persisiran pantai barat Johor. Orang Kuala dipercayai berasal dari kepulauan Riau-Lingga dan kawasan berhampiran dengan pantai Sumatera, Indonesia. Kecekapan mereka di laut merupakan faktor yang membantu mereka dalam proses imigrasi ini.

Pengertian Orang Laut mengikut dialek mereka ialah "Dessin Dolak". Dessin bererti orang dan dolak bererti Laut. Penggunaan Perkataan Dessin Dolak kadangkala disebut juga "Dessin Doanak" yang membawa erti yang sama. Sebutan Orang Kuala hanya popular di kalangan orang luar sahaja, sedangkan bagi mereka nama itu agak asing dan tidak disukai. Mereka lebih suka dipanggil "Orang Laut". Tutur kata di kalangan Orang Laut adalah kasar, kesan daripada persekitaran mereka sebagai pelaut. Orang laut juga suka merendah diri dan merasa diri mereka serba kekurangan. Mereka juga sangat mengambil berat tentang urusan orang lain dan mempunyai perasaan cemburu yang tinggi.

Sebelum memeluk agama Islam, mereka percaya kepada amalan yang berbentuk animisme. Walau pun Orang Kuala telah memeluk agama Islam tetapi ada di antara mereka masih percaya kepada kuasa-kuasa ghaib dan semangat. Mereka percaya adanya penunggu yang menghuni sungai, pantai, gigi air dan laut.

1.2 Sosial Budaya

Orang Kuala melantik ketua dari kalangan orang tua dan pelayar yang mahir. Gelaran yang diberikan kepada mereka ialah Batin, Jenang, Jukrah, Panglima, Hulubalang dan lain-lain. Oleh kerana Orang Kuala di sini telah menganut agama Islam sejak sebelum abad kesembilan belas. D.M.M.M. Sultan Johor melalui Jabatan Hal Ehwal Agama Islam Johor (JAIJ) memerintahkan agar nama-nama kampung Orang Asli seperti kampung Orang Asli Kuala Rengit di tukar kepada

Kg. Bumiputera Dalam. Pertukaran nama kampung merapatkan lagi jurang pemisah etnik kerana selama ini Orang Kuala sebagai Orang Asli dipandang rendah oleh etnik lain. Perubahan ini melibatkan gelaran dari Batin ditukar kepada Penghulu.

1.2.1 Sistem Kekeluargaan

Suami merupakan ketua keluarga dan bertanggung jawab dalam semua hal mengenai keluarganya. Ahli keluarga yang lain akan mematuhi segala keputusannya. Sekiranya suami itu meninggal dunia, secara automatik anak lelaki yang sulung akan dilantik sebagai ketua keluarga tersebut.

Sistem ini menyebabkan ibu bapa mereka akan merasa keberatan untuk membenarkan anak mereka berpindah ke tempat lain walau pun anak-anak mereka telah mendapat pendidikan tinggi dan berumah tangga. Mereka mengharap agar anak mereka masih dapat menetap di rumahnya atau di kampung tersebut. Ini disebabkan ibu bapa tadi memikirkan tiada siapa yang boleh diharap dalam menyara dan mewarisi harta peninggalan mereka.

1.1.3 Adat Istiadat

Terdapat banyak persamaan tentang Adat istiadat Orang Kuala dengan masyarakat orang Melayu kesan daripada pengaruh persekitaran memandangkan lokasi penempatan mereka yang hampir dengan perkampungan orang Melayu dan hubungan rapat mereka dengan orang Melayu. Mereka juga adalah di antara golongan masyarakat Orang Asli yang telah maju.

Cara hidup mereka juga tidak jauh berbeza dengan orang Melayu walau pun dalam beberapa hal mereka masih mengamalkan kehidupan tradisional mereka. Mereka lebih bangga kalau mereka dipanggil "Orang Melayu" kerana ini merupakan satu penghormatan, malah ada di antara mereka yang berkahwin dengan orang Melayu.

Upacara perkahwinan mereka juga mengikut adat istiadat orang Melayu seperti bersanding, berinai dan sebagainya. Kebanyakan pasangan mereka adalah dari masyarakat mereka sendiri dan mereka jarang berpoligami memandangkan taraf ekonomi yang masih rendah. Secara amnya dapat dikatakan perkahwinan Orang Kuala adalah bercorak "endogami". Ada juga di antara Orang Kuala yang berkahwin dengan orang Melayu dari keturunan Bugis, Jawa, banjar dan lain-lain.

Cara mereka berpakaian juga tidak berbeza dengan orang Melayu. Pada hari perayaan seperti Hari Raya Aidil-Fitri dan sebagainya mereka juga membuat kuih mueh bagi merayakan hari tersebut. Mereka juga menghidangkan hidangan seperti ketupat dan lain-lain, walau pun tidak sehebat orang Melayu.

1.1.4 Kepercayaan

Salah satu kepercayaan yang masih dipegang oleh mereka sehingga ke hari ini ialah mereka tidak dibenarkan membawa wang syiling sewaktu menangkap ikan kerana ditakuti duit yang di bawa itu jatuh ke dalam air menyebabkan ikan tidak akan masuk ke dalam jaring mereka.

Istiadat Menurunkan Perahu Baru

Sebelum sesuatu perahu baru diturunkan ke laut, biasanya mereka akan mengadakan satu upacara ringkas yang dipanggil "Istiadat Menepung Tawar". Upacara ini akan dijalankan oleh seorang pawang yang mahir di laut. Ia dimulakan dengan meletakkan perahu baru di darat berhampiran pantai untuk memulakan istiadat "Mengasap Perahu". Pawang akan mengelilingi perahu tersebut sebanyak tiga kali sambil berjampi.

Selepas itu kanak-kanak yang hadir dalam upacara itu akan mengambil makanan yang diletak di dalam perahu tersebut (biasanya pisang dan gula-gula). Kemudian perahu itu akan ditolak hingga ke gigi air dengan kedudukan kepala perahu menghadap ke kiblat. Seterusnya pawang akan membaca jampi dan menolak perahu tersebut ke dalam air.

Selepas itu adat "Basuh Sampan" dimulakan dengan menyiram sampan dengan air laut didahului dengan bahagian kepalanya. Selepas itu tuan empunya sampan akan menaiki dan mendayung sampan tersebut ke tengah laut. Perahu tersebut akan dibawa balik ke darat setelah pawang meninggalkan tempat upacara.

1.1.5 Kesihatan

Disebabkan terdapat kemudahan perubatan moden yang ada pada hari, ramai di kalangan mereka yang telah mengubah sedikit sebanyak cara perubatan mereka dari menemui bomoh kepada doktor di hospital di mana mereka diberi rawatan secara percuma.

Taraf kesihatan juga masih tidak memuaskan terutama tentang kebersihan rumah dan persekitaran, amalan makanan dan pemakanan serta kebersihan.

1.1.6 Pendidikan

Taraf pendidikan di kalangan mereka masih rendah jika dibandingkan dengan kaum lain. Golongan tua kebanyakannya masih buta huruf. Hanya generasi muda sahaja yang tahu membaca dan menulis. Mereka hanya mendapat pendidikan setakat sekolah rendah sahaja. Walau bagaimanapun terdapat juga di antara Orang Kuala yang telah mendapat pendidikan di peringkat tinggi dan menjawat jawatan yang boleh dibanggakan.

Bab 10

SUKU BANGSA JAHAI



(Seorang lelaki dewasa dari suku bangsa Jahai)

JAHAI

1. PENGENALAN

Suku bangsa Jahai merupakan satu daripada Suku kaum Negrito iaitu suku kaum yang terkecil berbanding dengan kaum Senoi dan Proto Malays (Melayu Asli).

Mereka tinggal di Perak, terutama di kawasan Hulu Perak iaitu Banun, Sungai Tiang dan Persisiran Empangan Temenggor. Di Negeri Kelantan pula, mereka bertumpu di Sungai Rual dan Jeli di Hulu Kelantan.

Pada amnya rupa paras orang Jahai seakan-akan orang Habsi atau Negro di Afrika, Kaum Andaman dan Aeta di Filipina. Mereka berkulit hitam, rambut kerinting halus (woolly), hidung pasek dan mata bulat.

Kebanyakannya tinggal di kuala sungai dan persisiran tasik.. Rumah mereka berbentuk pisang sesikat yang dibina daripada buluh dan beratapkan daun bertam dan tepus. Suku bangsa Jahai suka membuat rumah yang ringkas kerana mereka mengamalkan cara hidup berpindah-randah. Mereka berpindah dari satu tempat ke satu tempat apabila berlaku kematian, penyakit ganjil, perbalahan kecil, kerana keperluan makanan dan pertambahan penduduk.

Kini, amalan berpindah-randah semakin kurang diamalkan kerana mereka telah menerima bantuan daripada agensi kerajaan.

2. SOSIO BUDAYA

2.1 Perlantikan Penghulu

Dalam masyarakat Jahai, penghulu merupakan pentadbir di sesebuah kampung. Penghulu dilantik mengikut keturunan atau warisan (saka). Penghulu merupakan seorang yang dipercayai dan mempunyai pengaruh di kalangan penduduk. Walau bagaimanapun, kini lantikan penghulu Sebagai pentadbir di kampungnya, penghulu memainkan peranan dalam menyelesaikan sebarang masalah berhubung dengan adat, aktiviti harian dan keluarga disamping menyampaikan dan menerima maklumat semasa.

2.2 Institusi Keluarga

Masyarakat Jahai mempunyai bilangan ahli keluarga yang kecil iaitu di antara tiga hingga enam orang.. Keadaan ini ada hubungannya dengan amalan hidup mereka. Mereka terpaksa menahan nafsu sehingga sianak putus susu. Mereka

juga memakan ubat tradisional daripada akar kayu seperti "Akar Gajah Beranak" dan "Akar Manang". Cara hidup berpindah-rahandah dan amalan makanan dan kesihatan yang kurang sempurna juga mempengaruhi jumlah bilangan ahli kaum Jahai.

Mereka memberi nama kepada ahli keluarganya yang diilhamkan daripada alam sekitarnya seperti nama sungai, tempat, pokok, benda-benda dan sebagainya. Walau bagaimanapun kesan pengaruh media-massa menyebabkan nama-nama penyanyi dan pelakon filem diambil diambil untuk menamakan anak yang baru dilahirkan.

Dalam aktiviti harian, kaum lelaki menjalankan tugas mencari nafkah dengan memburu, menangkap ikan, mencari rotan serta kayu geharu dan lain-lain lagi. Kaum wanitanya pula membuat kerja-kerja rumah seperti memasak, membasuh dan mengangkut air dengan buluh. Mereka mencari nafkah untuk hari itu sahaja.

Mereka juga bercucuk-tanam secara kecil-kecilan. Tanaman utamanya adalah pisang, jagung, padi huma dan ubi kayu. Mereka memburu menggunakan "Sumpit" dan anak damak yang dibubuh racun getah dari pokok "Ipoh". Binatang buruan mereka ialah tupai, beruk, cekah dan lain-lain lagi. Beliang dan parang pula digunakan untuk mencari kayu api dan juga untuk menjalankan aktiviti harian yang lain.

Peranan JHEOA dan agensi lain telah banyak mengubah cara hidup mereka ke arah kehidupan yang lebih moden. Hasil tangkapan ikan dan tanaman kekal seperti durian dan rambutan merupakan salah satu mata pencarian di mana ianya dijual kepada orang tengah untuk menampung keperluan harian mereka.

2.3 Perkahwinan

Masyarakat Jahai tidak mempunyai adat tertentu dalam menguruskan hal-hal perkahwinan. Pasangan tertentu boleh berkahwinan jika mereka telah bersetuju dan mendapat restu daripada kedua-dua belah pihak. Hadiah berbentuk benda seperti kain pelikat dan kain batik akan diberi kepada bakal isteri dan bakal mertua oleh pihak lelaki, namun ia bukanlah satu kemestian. Setelah mendapat persetujuan, kedua-dua pasangan dibenarkan tinggal dan tidur bersama.

3. KEPERCAYAAN

Kaum Jahai masih tiada pegangan agama. Mereka adalah golongan "Anamisme" yang mempunyai kepercayaan bahawa semua tempat dan setiap perkara yang berlaku disebabkan oleh penunggu yang di panggil 'Karei' atau 'Ungku' Mereka juga masih teguh mengamalkan pantang larang.

Mengikut kepercayaan orang Jahai, Karei berasal dari golongan orang Jahai sendiri. Karei berkelakuan ganas dan sukakan sex. Setiap pasangan kelamin yang pernah bersamanya akan mati termasuk isteri dan adik iparnya sendiri kerana Karei mempunyai alat kelamin (zakar) yang terlalu panas. Menurut cerita, setelah isteri dan adik iparnya

mati, Karei masuk ke hutan dan ingin menyetubuhi seorang perempuan. Untuk melindungi diri, perempuan itu mencari beberapa ekor lipan berbisa dan disimpan di dalam buluh. Ketika Karei cuba menyetubuhinya, lipan tersebut dilepaskan lalu menyengat alat kelamin Karei hingga ia sakit. Karei meminta pertolongan Tok Halaq untuk mengubatinya. Tok Halaq memukul alat kelamin Karei dengan ulu lesung padi dan Karei mati buat sementara. Karei hidup semula dan pergi ke sungai. Ketika makan ikan dilukah adiknya, Karei telah di bunuh oleh cucunya 'cheb-reb' dengan tombak batang tepus. Karei mati lemas dan roh Karei naik ke langit bergerak mengikut awan.

Kemarahan Karei amat ketara kepada orang Jahai kerana mereka telah membunuhnya dan berasam untuk membunuh kelompok tersebut apabila mereka melanggar pantang larang. Kemarahannya ditunjukkan melalui guruh yang kuat, hujan yang terlalu lebat dan kilat yang sabung menyabung. Mengikut kepercayaan orang Jahai, guruh terjadi kerana Karei menggolekkan batu besar di atas batang kayu atau buluh. Kilat pula merupakan sinaran tajam daripada matanya atau kilasan keris yang dicabut manakala hujan pula berpunca daripada air kencing dan bilasan awan.

Karei mempunyai isteri yang dinamakan karei betina bernama 'Takel' yang tinggal di lapisan kedua permukaan bumi. Takel boleh mempengaruhi Karei. Jika berlaku perkara sumbang di kalangan orang Jahai. Mereka akan dilanda banjir besar. Sekiranya mereka melanggar pantang pula, guruh yang amat kuat akan berlaku. Pada mulanya Tok Halaq memukul gendang atau mewujudkan suasana riuh-rendah bertujuan menghalau bunyi guruh. andainya tidak reda, Tok Halaq akan memanggil mereka yang melanggar pantang dan mengambil sedikit darah mereka. Darah tersebut dimasukkan ke dalam buluh yang dibelah dua dan disemah pada masa itu juga. Mereka percaya darah yang disemah itu adalah untuk meminim Karei dan atau menyapu muka karei betina "Takel". Mereka percaya bahawa papatung dan burung 'Chep-Chep kecil merupakan pengintip Karei untuk mengetahui kegiatan masyarakat Jahai. Selain mempercayai kuasa Karei, orang Jahai berpegang teguh beberapa kepercayaan lain dalam kehidupan seharian. Mereka dikehendaki memenuhi kehendak saudara atau sahabat terdekat. Kegagalan memenuhi kehendak mereka, dipercayai akan menyebabkan "penan" atau "selantap" yang akan menyebabkan berlakunya mala petaka.

Jika berlaku kematian pula barang-barang simati akan ditanam bersama mayat agar roh simati merasa tenang dan tidak pulang ke rumah mengganggu keluarga atau masyarakat sekeliling. Selepas mayat ditanam Tok Halaq pergi ke kubur berkenaan untuk berjampi dengan tujuan memberi ketenangan kepada simati dan memohon supaya ia tidak mengganggu ahli keluarganya.

Orang Jahai akan berpindah ke tempat lain untuk mengelakkan wabak penyakit dan hantu penyakit daripada mengikut mereka apabila berlaku sesuatu kematian. Rumah simati akan dibakar atau diruntuhkan untuk mengelakkan roh simati daripada menegur mereka yang melalui kawasan rumah berkenaan. Biasanya selepas kematian, penghulu dan anak buah yang diketua oleh Tok Halaq mengetuk benda-benda yang boleh mengeluarkan bunyi seperti buluh dan tin bagi menimbulkan suasana bisung untuk menghalau hantu simati pergi jauh dari kampung berkenaan.

Di antara perbuatan dan pantang larang yang boleh membawa mala petaka dan kemarahan Karei adalah seperti berikut:

- Melakukan persetubuhan di siang hari - Karei akan merasa cemburu dan ia akan menurunkan mala petaka
- Membawa cermin atau benda-benda berkilat ke luar rumah - dikhuatiri Karei dapat melihat dan terlalu suka hingga lupa diri dan menimbulkan rasa marah.
- Bermain atau mentertawakan rama-rama, pepatung, monyet, kera dan beruk. - binatang tersebut merupakan sahabat baik dan pengintipnya
- Ketawa bila melihat anjing atau binatang lain mengawan - Karei akan tersedar dan tidak dapat mengawal nafsunya. Ia akan marah maka hujan ribut akan berlaku.

4. ADAT RESAM

4.1 Masuk kampung

Setiap pengunjung dilarang melakukan perkara sumbang di kampung tersebut kerana dipercayai akan berlaku mala petaka. Pengunjung hendaklah berjumpa penghulu terlebih dahulu dan menyatakan tujuannya datang ke kampung tersebut.

4.2 Pergi Ke Sungai

Pengunjung atau orang Jahai sendiri hendaklah memberi isyarat melalui sebutan "Utt-Utt" (dua atau tiga kali) jika hendak ke sungai (tempat mandi) untuk memberitahu kehadiran mereka di situ kerana kebiasaannya Orang Asli mandi berbogel.

4.3 Menegur Ketika Mencari Rezeki

Dilarang sama sekali berpesan kepada orang yang hendak keluar memburu atau menangkap ikan atau pun pemburu tersebut memberitahu orang lain akan tujuannya. Contohnya "kalau dapat ikan, bagilah saya seekor". Pesanan seperti ini sangat dipantangi oleh orang Jahai atau orang asli amnya kerana ia dipercayai membawa sial pada dirinya dan punan pada orang yang berpesan. Biasanya orang berkenaan akan membatalkan hasratnya.

4.4 Isteri Yang Mengandung

Isteri yang mengandung digalakkan membiasakan diri mengasuh dan mendukung anak kecil orang lain bagi menyesuaikan diri dan anak dalam kandungannya supaya mereka selamat dan selesa semasa bayi dalam kandungan.

4.5 Menantu dan Mertua

Menantu dan mertua yang berlainan jantina, tidak boleh bertentang mata bila berinteraksi. Mereka hendaklah berinteraksi melalui orang perantara. Masyarakat Jahai juga dilarang menyebut nama mertua kerana ia dianggap "Tulah".

4.6 Bertandang Ke rumah

Seandainya terdapat daun bergantung di hadapan pintu, ini bererti tuan rumah tersebut sedang berpantang. Tetamu tidak dibenarkan naik kerumah. Tetamu juga dilarang sama sekali naik ke rumah ketika Tok Halaq sedang menjampi pesakit. Semasa berkunjung ke rumah mereka, kita mestilah menjamah walaupun sedikit juadah yang disediakan. Keengganan menjamah makanan seolah-olah menghina mereka dan tetamu dipercayai akan punan. Mereka dilarang membuat perbandingan (menyamakan) makanan dengan binatang contohnya "kuih ni bentuknya macam tupai" atau "kari macam darah". Jika kata-kata ini yang dilafazkan maka orang Jahai akan membuang makanan tersebut.

4.7 Berjanji

Setiap janji mesti ditepati dan mereka akan menuntuti janji hingga ke akhir hayat kerana dikuatiri "punan".

5. AMALAN PEMAKANAN DAN KESIHATAN

Makanan utama orang-orang Jahai ialah ubi kayu dan nasi. Pada kebiasaannya makanan ini akan dimasak di dalam buluh. Makanan ini akan dimakan bersama ikan dan daging binatang buruan. Ubi Gadung juga merupakan makanan utama orang Jahai. Ubi Gadung ini banyak tumbuh secara liar. Orang Jahai terpaksa mengali sedalam 1 hingga 1.5 meter untuk mendapatkan Ubi Gadung.

Perempuan yang sedang tenluck (haid) atau dalam pantang bersalin tidak boleh makan makanan seperti kari, susu, ayam, daging, gula dan minyak kerana akan menyebabkan 'sawan'.

Di antara makanan yang pantang dimakan oleh masyarakat Jahai adalah seperti berikut:

- | | |
|--|--|
| • Suami dan isterinya yang sedang mengandung | - monyet, beruk, tenggiling, kera, beruang, kancil, biawak, kura-kura, dan labi-labi. |
| • Kanak-kanak yang berumur di bawah tiga tahun | - keluang, tikus buluh, tupai, landak, memerang, babi hutan, katak, ikan, enggang dan siput air. |

- | | |
|--|--|
| <ul style="list-style-type: none"> • Kanak-kanak yang berumur di bawah sepuluh tahun. | - tenggiling dan beruang |
| <ul style="list-style-type: none"> • Semua kanak-kanak | - anjing hutan, harimau, gajah,, ular sawa, helang, gagak, pungguk, siput darat. |

6. AMALAN KESIHATAN

Sebelum perkhimatan perubatan moden diperkenalkan, Tok Halaq memainkan peranan penting dalam perubatan tradisi dengan menggunakan akar kayu. Tok Halaq akan menjampi pesakit berkenaan di samping menetapkan beberapa pantang agar penyakit akan pulih segera. Orang Asli Jahai percaya setiap penyakit ada penunggu dan hantunya. Ianya hanya boleh dihalau melalui jampi serapah. Perkhidmatan jampi akan dikenakan pengeras yang ditetapkan oleh Tok Halaq mengikut kemampuan yang dipersetujui. Penggunaan akar kayu seperti Tongkat Ali, Buah Jadam, Kacip Fatimah, Ubi Caring dan Bunga Palma diamalkan untuk mengecutkan rahim, membuang angin, terseliuh serta menguatkan tenaga batin.

ERRATA BAGI BUKU
BUDAYA PANTANG LARANG DAN AMALAN KESIHATAN ORANG ASLI
SEMENANJUNG MALAYSIA

Bil	Kesilapan	m/s	No.	baris	Pembetulan
1	dikening	7	2.4	7	di kening
2	kekampung	8	3.1	8	ke kampung
3	sipembuang	10		11	si pembuang
4	telor	10		22	telur
5	tepong	10	4.3	9	tepung
6	telor	11	2		telur
7	berok	11	13		beruk
8	burong	11	14		burung
9	berok	12	4.6	2	beruk
10	kekampung	13	4.8	4	ke kampung
11	kekampung	13	4.8	10	ke kampung
12	dirumah	13	5.1	5	di rumah
13	kerumah	13	5.1	5	ke rumah
14	didalam	13	5.1	6	di dalam
15	kekawasan	13	5.1	9	ke kawasan
16	ke lampiran	14	6	10	berhampiran
17	di sebaliknya	18	a	21	sebaliknya
18	dikembumikan	20	2.2.3	7	dikebumikan
19	di kebumikan	21	a	5	dikebumikan
20	kekiri	30	2.3	11	ke kiri
21	bekeluarga	30	2.4.1	1	berkeluarga
22	memuat	32	2.6	21	membuat
23	. jagung	33	3.1	1	. jagung
24	petempatan	36	1	9	penempatan
25	disebuah	38		3	di sebuah
26	dam	39		2	dan
27	ni	39	a)	1	ini
28	Buruh	41	8	3	buluh
29	ddtentang	44	1	4	tentang
30	oraganisasi	44	2.1	5	organisasi
31	bertanggung jawab	44	2.1	6	bertanggungjawab
32	Jenan	44	2.1	9	Jenang
33	semasanya	44	2.1	10	semasa
34	Rombonagan	45	2.2.2	3	Rombongan
35	masihterikat	46	2.2.3	2	masih terikat
36	kenyediaan	46	2.2.3	5	menyediakan
37	di hantar	46	2.2.3	15	dihantar
38	di anggap	46	2.2.3	27	dianggap
39	rumah tangga	46	2.2.3	32	rumah tangga
40	dirumah	50		5	di rumah
41	taradisinya	52	1	5	tradisinya
42	ia itu	54	3.3	6	iaitu
43	seteruna	63	e)	1	si teruna
44	buka	63	f)	3	baru
45	Kelamin	65	d)	4	Pelamin
46	ini	67	2.6	3	ini
47	Keuda-dua	68	a)	2	Kedua-dua
48	melor	70	c.	1	melur
49	ia itu	72	5.1	2	iaitu
50	di mulakan	72	5.1	8	dimulakan
51	ia itu	73	6.1	6	iaitu
52	sapaya	74	6.6	5	supaya

Bil	Kesilapan	m/s	No.	baris	Pembetulan
53	ialah	74	7	21	ialah
54	di gunakan	75	8.1	6	digunakan
55	sebagai sebagai	76	8.3	11	sebagai
56	ia itu	77	9.1	7	iaitu
57	berlaku berlaku	78	9.7	6	berlaku
58	cahaja	79	9.10	3	cahaya
59	hiklang	79	9.13	6	hilang
60	di timpa	80	10.1	10	ditimpa
61	di pasang	81	10.2	9	dipasang
62	ke lima	82	10.5	2	kelima
63	siibu	83		2	si ibu
64	daerah	83		10	darah
65	katawa	84	10.10	16	ketawa
66	atau	86	a)	5	atau
67	telor	87		5	telur
68	Berok	87		16	Beruk
69	Burong	87		17	Burung
70	tersinggong	89		7	tersinggung
71	padi	94	3.1.1	8	pagi
72	kerumah	94	3.1.1	16	ke rumah
73	berumah-tangga	96		5	berumahtangga
74	ketanah	98		3	ke tanah
75	di bawah tangga	98		5	di bawah tangga
76	barang-barang	99	5	8	barang-barang
77	melebehi	99	5.3	1	melebihi
78	selam	101	6.2	7	selama
79	Berlain	101	6.3	1	Beralin
80	ketempat	102	7	6	ke tempat
81	Menyulung Tahun	103	9.1		Mengulung Tahun
82	in	104	9.3	2	ini
83	berupaya	104	9.3	7	berupa
84	ke dua	105	10.9	5	kedua
85	rumau	107	12	4	rumah
86	ia itu	110	1	3	iaitu
87	Perkataan	110	1.1	7	perkataan
88	D. M. . M. M	110	1.2	4	D. Y. M. M.
89	dí tukar	110	1.2	6	ditukar
90	mueh	111	1.1.3	21	muih
91	berumah tangga	111	1.2.1	7	berumahtangga
92	Sebagi	114	2.1	4	sebagai
93	menyelisaikan	114	2.1	5	menyelesaikan
94	meneriam	114	2.1	6	menerima
95	iatu	114	2.2	1	iaitu
96	pengaruh	115		7	pengaruh
97	diambil diambil	115		8	diambil
98	"Anamisme"	115	3	1	"Animisme"
99	sex	115	3	6	seks
100	berasam	116		11	berazam
101	meminum	116		25	minuman
102	kerumah	118	4.6	2	ke rumah
103	dipercayai	118	4.6	6	dipercayai
104	dikuatiri	118	4.7	2	dikhuatiri
105	perkhidmatan	119	6	1	perkhidmatan